

美國視察記




2000000

伍廷芳博士原著

美國視察記

中華書局印行

民國四年十二月印刷  
民國四年十二月發行



(美國視察記)全一册

\*\*\*定價銀五角\*\*\*

原著者

新會伍秩庸

譯述者

吳縣陳政

發行者

上海河南路五號  
桐鄉陸費達

印刷者

上海虹口東百老匯路  
無錫陳寅

印刷所

上海虹口東百老匯路  
中華書局

總發行所

上海拋球場南首路

中華書局

分發行所

北京 天津 奉天 廣州 長沙 開封 溫州  
長春 漢口 南昌 南京 杭州 濟南 保定  
武昌 太原 常德 福州 成都 重慶 雲南  
徐州 西安 石莊 汕頭 香港 蘭州 吉林  
衡陽 貴陽 潮州 安慶 黑龍江

中華書局

03860

# 古 今 文 綜

本書注重實用不分駢散取參伍錯綜之義名為古今文綜其特色有五

選錄之博 本書選錄上自三代下至近世不分駢散不囿宗派鈎深索隱無

美不盡

類別之稿 本書別為六部十二類更析子目確定統系綜貫比較為有選本

以來未嘗發明之巨著

格式之備 本書以部統編以編統章每章之中符記明晰眉目粲然而所選

之文又復無格不收無式不備

評點之精 本書每篇精加圈點抉摘菁華示以義法而每章每目均有簡要

綴辨述其源委體要

校訂之善 本書選錄之際廣羅各書參較異同求古求是十易其稿可無魯

魚亥豕之患

▲華裝四十冊

▲分裝布套四函

定價 本連史十四元 洋本連史十元

(另有精緻木箱) 每只取價八角

# 庚子使館被圍記



洋裝一冊 定價七角

記者英國樸笛南姆威爾氏為庚子拳變使館被圍中之一人論當時各公使之懦怯  
 嫉妬……防禦線之疎密不稱……拳匪焚殺之慘酷……董軍鎗砲之  
 弱點……德公使之遇害……清營伙夫之竊售彈藥及雞子均及身親歷之  
 談已非他家記載僅恃耳食者所得比擬而況停攻使館之廣告牌……侍衛  
 房中之縊死者……美兵瓜分法醉兵之大銀袋……二十元出售德皇贈清  
 帝之黑鷹大寶星……俄委員等偷分慈禧宮之珍品……日兵隊裏之清慶  
 王……德兵手中之金扣帶則皆記者所目覩也哥薩克兵之焚掠當舖……  
 俄兵搜索戶部庫之掃興……搶劫民家之牲口車輛則記者亦其中之一  
 分子也坐清太后之御牀……作滿清親貴家庭之主人翁則記者亦自述  
 不諱也其他被圍中種種趣聞如各公使夫人之養尊處優……銀行經理夫  
 人之甜美歌聲……俄學生之風流笑柄……絕糧聲中貴婦人之以雞子洗  
 髮尤屬窮形盡相描摹盡致益以陳君貽先冷汰昆仲手譯敘事顯明考證詳確如觀劇  
 本如聽評話 津津有味不忍釋手 誠庚子拳匪書中第一信史也

# 美國視察記

## 目錄

原序

第一章 正名

第二章 美國之興

第三章 美國之政府

第四章 美國與中國之關係

第五章 美國之教育

第六章 美國之商業

第七章 自由與平等

第八章 禮儀

第九章 美國之婦女

第十章 美國之服制

目錄

0000003

910  
4



第十一章 中國之文化上

第十二章 中國之文化下

第十三章 筵宴

第十四章 戲劇

第十五章 樂部

第十六章 幻術與馬戲

第十七章 運動



伍廷芳  
博士著

# 美國視察記

原著係  
用英文

## 原序

環球各國最足資吾人觀感者莫美國若美新興之國也其初僅少數英人移殖新陸  
篳路藍縷狀類榛狉積數十年山林漸啓聚者漸衆歐洲各國之移民亦相率俱至始  
蔚然成一部落焉英於新陸移居最早設官敷治之權固屬之英後以英政不均羣起  
相叛奮厥才力與世界第一強國抗血戰七年伏尸累萬卒以百折不回之氣脫英軛  
而自立自建國迄今僅一百三十年不獨富厚甲於全球美國一言重於九鼎能使天  
下列強折節而聽之其疆土之廣初不過吾一二省地耳逐漸增購開拓迄今國旗所  
飛揚北憑冰區南臨赤道東西沿太平洋二岸泱泱然成大國之雄風其餘如文  
藝科學美術發明等亦皆能翹然有異於庸衆爲舉世所欽仰而寰人之子貧無儋石  
以勤忍奮勉之功積資數百萬作富翁者尤比比皆是也敵國之富自處儉約無珍  
奢之奉獨行市衢無侍從之屬蓋其所聚之財有不知所以用之者焉歐洲貴族自親  
皇以至勳爵懾其多財爭欲附爲婚姻富翁之女其所生子因有爲高官於異域者更

有富民孜孜焉。惟公益是謀。公其財於社會之中。而不以自利建設藏書樓等。不獨美人蒙其利。全球之人盡食其賜焉。倫區之法通行全美。(一)殺人者得從法律中求生。而免於死罪。其人民類皆醉心和平。厭聞兵革。和平會議一年之中。時有所聞。巨富某君貫注全神於世界和平事業。曾獨出己資建巨宮於異邦。為和平會議之所。(二)故雖至不得已而與他國戰。猶能引罪自責。戰而獲勝。不作得志驕人之態。橫施其憑凌弱小之威嚴。且反出資以償敗國之損失焉。(三)通國人民無一不知愛其國家者。有事之時。敵愾之心。全國一致。爭棄其所業而從事疆場。西美戰時。富家子某散家資。集一聯隊。身為之魁帥。而與於戰爭焉。一國之人皆為嗣主。衆意所推。即可身任元首。數年期滿。復為平民。工則為工商。則為商。素事律師。仍可任律師之職。即於其任元首時。所簡任之法。官前出庭辯護焉。女子亦可習法律。作律師。為男子辯護。言論自由之權。發展至於極點。時有為蜚語所中而莫之如何者。寡婦之冠。為女流所常服。處女得而冠之。已嫁之婦。其夫尚存者。亦得而冠之。了不以為駭怪。冠式之大徑可三尺。(四)鐵道周布全國。密如蛛網。可乘以徧行各地。客車之麗。擬諸宮室。入夜則有睡車。遲明而起。或有美女同車。共臥一室之中焉。人民猶有奇巧之才能。科學應用趨於神妙。股票

賣買之時。見熊或牡牛等獸。雖叫哮可懼。而從無噬人觸鬥之事。國中諸事。自吾國人觀之。無不足。咋舌稱奇者。其人民之純良勤勉。尤可師法。故最足資吾國人觀感者。莫美若而詳研是等民族之性質。其興味固彌覺深長也。余二次使美。前後計及八年。每有促余述對於美國之觀感。而筆之於書者。人事因循。迄未得當。總其原因。要有數端。職守所拘。公事叢集。無編著之餘暇。其故一也。美國幅員廣大。余雖厲居有年。而游歷所至。交友所及。或病未能詳盡。致遺掛一漏百之譏。其故二也。美爲方興之國。百政備舉。蒸蒸日上。而以余觀之。亦時有缺點。須俟改革。然以溫良恭讓之美人。而或加以貶辭。又爲余意所雅不欲。其故三也。坐是三因。蓄意未遂。願解余者曰。人之望君者。願君述個人之意見。非求君作偏袒之辭也。鍼砭之說。庸又何傷。余友美女士某之說。尤爲剴切。其言曰。「吾等所望於君者。願君以公正之筆。述吾國事。不爲偏黨之辭。溢美之說。過當之譽。非所欲聞。或君意以爲不合。而欲有所評論。慎勿躊躇。顧忌言不肯盡。吾國人固甚欲自知其短。俾得有所匡正於其間也。」余既受女士之言。感美國人士之虛心受物。因成是著。其不偏黨不阿譽處。悉如女士之言。雖不敢謂爲正直確當之作。然自信無過於吹求之處。美之讀者。苟於此有不能相同之點。余知其必能曲恕。蓋

余於美人初無偏激不平之論調。特以管窺所及。言而不盡。或描寫美國作極樂國焉。或文飾其缺陷而爲阿諛之辭焉。則余非美國誠率之友矣。

(一) 倫區爲美國通行之一種私刑。不依法律之制裁。而私行取決犯罪者之生死。爲獨立戰爭時。聖吉尼亞人倫區所創。

(二) 荷蘭海牙和平會會所。於千九百十三年八月二十八日正式落成。與行典禮者。有維廉女皇。卡匿奇君。(會所之建造人)及各國代表多人。

(三) 西美戰時。美既勝西。而得斐立濱羣島。仍以美金二千萬元償西班牙之損失。

(四) 此爲數年前舊式冠式時行更改。現時所行之式。亦殊可笑。

### 第一章 正名

名者實之賓也。名與實恆求其相副。故正名爲先。一名之故。友朋之情感。或於此繫焉。其爭執離索之因。或亦卽於此肇焉。故中國人命名。恆不肯苟率以從事。兒童之方生也。祖若父謹慎而命之以名。按其生年而錫以佳名。祝其以長以育而多福祉。故一家期望之意。恆包藏於名字之中。而快樂興盛長壽成功等義。爲中國普通名字所習見。女子之名。則多取義於花卉佳菓等類。字之含有惡義者。決絕勿取。無或用之。余嘗於

華盛頓某處乘升高機。遇一人名考芬者（考芬於義爲靈柩）余意大拂。乘升降機而遇考芬。則升降機不幾爲余之靈柩耶。又嘗遇一人名台司者（台司於義爲死）余一聞其名。卽欲掩耳以逃之。以余故不欲死也。抑余非迷信者流也。十三人之筵宴。星期五之行期。余嘗赴之而不疑（十三人筵宴。星期五遠行。皆爲西俗所忌）尋常中國人迷信之故實。余皆無所浸惑。然遇一人而其名曰柩曰死。雖無所迷信如余。亦不能自免其憎嫌之念。一人之名如是一國之名。亦何莫不然。北美洲殖民地之脫絆自立也。自名其國曰美洲合衆國。其義固甚愉樂也。合衆國原有之地十三州。約計三十萬英方里。今則合州四十有八。附以領土三。面積至三百五十七萬一千四百九十二英方里。疆域之廣。與世界最古之中國相頡頏。然其國名則殊博大而不切近焉。夫就名而論。宜若合南北兩美洲而并爲一國之稱。非得其一。部分者所得而名者也。故當時建國命名之際。必有其所以然之故。而卽名以論義。曰美洲合衆國。其蘊意亦深可知矣。余嘗質之此邦賢哲。謂此間人恆自稱曰美國人。其所謂美。爲南美乎。北美乎。墨西哥乎。披羅文乎。抑其他中美諸邦之一乎。其答辭則曰。余爲美洲合衆國之國民。然美洲合衆國。則墨西哥。阿根廷及其他合衆國皆是也。而彼則曰。於此而曰國民。僅明其

爲此美洲合衆國之國民。而非其他國人所得應用。余嘗以此同等問題。徧詢羣流。其答辭率出一例。吾國人之自名其國也。曰中國。意謂地居天下之中。若以地理學之知識言之。而不以美國國名謂有包含全美之意。則其命名之義。似較吾古人爲優。然以美國國名之博大。實不容人不致疑其有包含全美之義焉。雖然。以余所知。彼邦人民之品性。余固深信其爲公正慈祥。而足爲西歐諸友邦之模範者也。美洲各自主國。皆於此得切磋琢磨之益。提携進行。倍形親睦。故美國國民之品性。實爲民主國之良好模範。其政府爲自由組合制度。完備全國人民。有天賦平等之權。無尊卑貴賤之別。而其政府也。亦由國民而設。爲國民所設。且屬國民所有。不論誰何。苟具通常智識。而有觀察之能者。游於美之城市村鎮。見其秩序之整齊。市區之樸淨。一覽以後。每有不能復忘之勢。各處行政之權。皆操之地方政府。而當地人民。卽爲監臨督察之人民。權之張通。國如一。卽小學校中。民權自治之義。亦提撕教訓。俾之實行。余嘗於費蘭特爾費亞省參觀一公立小學。當時景象。印余至深。迄今不能忘之。校中學童。男女三四百人。率自七齡。以至十四齡。衆於羣中。選一人焉。曰市長。更選審判長一。警長一。以管理全校學生之事。凡市城行政區域。所應有之官司。無不畢具。亦有吾國學生數人。留學

其間中一人云被選爲彼中警務監。此不獨證民權之張亦足見數百學生之能同心合德而泯然於種族之見也。其教職員告余云。校中管理及教務方面絕少困難之事。學生過失極少。偶有違犯。卽由學中警察拘至審判。長前聽其鞫審。准其所犯之過失而判斷之。輕則科罰。重則斥退。依據公理。評判者無妄法。受罰者無怨尤。校務進行關係於此自治機關者。良非淺鮮。蓋一方面可減少教職員管理上之負擔。而一方面又能養成兒童自治之才能。於以激發其自尊心。而勉趨於正軌。學校之命名卽於以保全。也是等兒童。自少涵濡於自治之中。能尊重法律。範身正軌。及其長也。必深有味於地方自治。國家行政諸端。苟出任國事。則勝任愉快。自無疑義。更安得有有忝官守之事哉。以美國民權之昌明。民主制之完備。影響所至。普及於中南美諸國。自美國獨立以來。全美各部。幾盡革其舊有之君主政體。而採民主制。墨西哥之成共和國也。在一千八百二十三年。閔都拉斯與薩爾乏桃。則於千八百三十九年。哥斯德黎加及尼加拉瓜。於千八百二十一年。巴拿馬於千九百零三年。哥倫比亞於千八百十九年。委內瑞拉於千八百三十年。厄瓜多於千八百十年。巴西於千八百八十九年。玻利非亞於千八百二十五年。秘魯於千八百二十一年。巴拉圭於千八百十一年。智利於千八百

十年。阿根廷於千八百二十四年。烏拉乖於千八百二十八年。凡茲十數國。皆直接影響於美國。而改組其政體者。自美國一倡。而今日南北兩美洲。幾盡爲民主政體之疆土。惟加拿大仍爲英領。以英政府對於加拿大所設施之政策。能使加人於政治上。呈滿意之觀念。而不萌變更之想。故雖處民主政治潮流洄洑之中。而屹然不動。美國人民之一部分。則甚欲加拿大合併於美。以成更大之合衆國。嘗憶華盛頓曾開一公會。加拿大總理大臣韋爾福蘭勞蘭君與會。高等審判廳長某君以詼諧之辭。表其政見云。加拿大於理宜合併於美國。嗣後下議院議員民主黨領袖開撥克拉克君。復於下院建議聯合加拿大之事。雖事未見諸實行。然美國一部分人民之思想。於此要可概見。故使今日而有人能預斷加拿大政治之將來。不可謂爲非放膽之辭也。若以現在加人之態度而論。則曾無何等變更之意思。今茲所行之政治。當仍可保持其安全之地位。卽有更張。要亦非數年內所可發生。蓋加拿大雖名爲英之殖民地。而人民所享之利權。實與獨立國無異。憲法同於英國。亦有上下兩院。以可否本地之政務。惟殖民地總督由英皇簡任。然政事決之兩院。總督特虛擁其名耳。地方政務。有責任內閣以經畫之。各地庶務。則由本地長官自行治理。英國不得而干涉之。故加拿大人所享利



權事事與英人等。而不擔負維持海陸軍費。則其對於本國之義務。且較英人爲輕矣。數年以前。嘗憶加人有離英獨立之議。時已故投倍貴爵爲殖民部大臣。宣言云。加人苟真有自立之動議。英政府無靳不相予之意。惟加人亦當自思。經一變更以後。所得果爲何物。今加人已有自治之權。凡自由人民所享之權。加人亦既盡得之。政府所有之權。僅爲簡任總督一事。然須盡力保護疆土。勿俾尺寸有所侵佔。故加人於建議以前。必當深自籌畫於利害之間。自投倍貴爵宣言以後。加人自立之議。余遂不復有聞。自商業之眼光觀之。而以人民之安寧爲前提。則君主立憲與民主制。在今日曾無重大之利害可分。試以英美相較而言之。英國人民。其尊自由重獨立。與美人無異。雖臣屬於君主。而其所享之自由權。亦不下於美國之公民。惟民主制有較優之點數。則美國人民所給於總統之年俸。爲每年五萬元。新近每年益以游歷公費。二萬五千元。共爲七萬五千元。以之與各大國君主之帝室費相較。尤爲最小。民主國中。志高望大之人。易於自見。譬之白丁。能得衆心。卽爲元首。可於法定期間內。揉持國主之權。美國總統。有自行簡任國務卿公使及各大臣之權。每易一新總統。恆可有一萬餘之新任命。故以行政之權限而論。民主國之總統。恆較立憲國之君主爲大。然亦有立憲國君主。

所可行而總統不能行之者。如不得國會之同意。總統不得有與他國宣戰之權。於君主立憲國中。君主及內閣大臣。擔負全部之責任。皮根斯斐爾貴爵任英首相時。於千八百七十五年。以獨意購得蘇彝士運河股票十七萬六千六百零二股。投資三百九十七萬六千五百八十二金磅。並未交議於議院。蓋機會之去來。迅於傳電。苟事須俟議院國會之解決。則一國外交必多失機之處。而重大利益。或至交臂失之。如皮根斯斐爾貴爵所爲之往事。是等重大之舉。美國總統斷不敢獨負責任而舉行之。克利夫倫特君之爲美總統也。其言曰。一美國政治。皆於透明室中辦理之。華盛頓臨別訓辭。以美國地勢之遼遠。諄諄焉。誨其國人。注重於通商貿易。而勿與各國有政治之關涉。其所發簡賅切要之問題曰。何爲以吾美前途交織於歐洲列強。使彼得以其嫉妬猜忌之心思。而擾亂吾和平興盛之基耶。一千八百二十三年。卽華盛頓訓辭之後。二十七年。孟羅總統布告歐洲各國。戒後此無得再於美洲疆土上有新殖民地之建設。苟有是等舉動。皆當視爲損害美國和平之事。而認爲阻礙美國之行動。此卽舉世所知之孟羅主義是也。自孟羅倡此主義。而美洲各國皆克保有其疆土。而不爲外力所憑凌。故謂美洲各國自十九世紀迄今。胥受護於孟羅主義之中。非過語也。各國旣以

美國爲干城。美亦遂爲各邦之盟主。華盛頓有美洲各民主國集會之所。中南美諸民主國無不與會。會所爲美國巨富安特魯卡匿奇君（一）及各國捐資所建。值金七十五萬元。約翰牌勒脫君爲會中著名之顧問。評論斯會爲友誼商業之聯合所。交換意見之會議場。蓋紀實也會中經費由二十一民主國公集之。會務則由各國在華盛頓之外交代表主持之。而公推美國國務卿爲會長。（二）此會效果能使美國國力益行伸展。而其最大之功績則各民主國交互間之友誼因之愈形親睦。而永消操戈同室之虞。

（一）安特魯卡匿奇君爲美國鋼鐵大王。海牙和平會所亦由卡君出資所建。  
 （二）凡爲美國國務卿者。卽爲全美國際會會長。以職而定。不由人而變更也。

## 第二章 美國之興

綜美國興盛之故。雖有數端。而天然物產之豐富。實爲最大之原因。煤、石油、金、銀、銅、鐵及其他礦產。無不備具。人類所需之物。天產皆足以供給之。土地肥渥。五穀豐植。麥產既多。菓類尤夥。所謂膏腴之壤。天富之區也。然天惠雖厚。而人事不施。任其自爲消長。既稗草競長。五穀莫得繁其生。山火自焚。森林莫得彰其用。有礦而不知採。有物而不

知用雖富亦庸有何補。斐亞之間富源多矣。天賦之厚寧讓於美而沒沒無聞。遑論興盛。故美之興也。雖受天惠而人力尤其主。因原歐人之移殖新陸也。類爲貧苦之人。自謀生計而來。其存心在工作。其目的在求富。凡有足以達其目的者。不惜瘁其心思。勞其四體以赴之。堅忍勤忿之精神。有足以摧至堅而禦百難者。子孫稟此遺性。以至於今。故美國國民堅忍耐勞之天性。實有非歐洲及其他人民所可及者。尙有一端。亦爲美國興盛之主因。卽其人民人人所得享之自由權是也。天生美人卽爲平等。故美人自視其身恆與人等。而少年之人每執一業。慾望之高。不造峯極。不萌止念。天下巨富美爲最多。當其少壯固皆貧賤少年耳。貧困之人足跡未嘗履大學。以其自修之功而成文學巨子者爲數亦夥。蓋大學者使人入學之途徑而不能必其人之盡成學者。大學畢業生智識出常人下。或較彼自修之人爲不如者。世固不乏其人也。余爲此言。非以詆大學教育之無用。特以大學生徒既受高等之教育。則其情況必較恆人爲佳。成事亦必較恆人爲易。而未受完全教育者。於其國家之事業亦多有所扶助。使之日臻於興盛發達之域。若而人者。亦不可謂非英雄也。

普通美國人民恆以游歷爲要圖。此實其特優之點。老死不出里閭。則聞見有所囿。而

不廣積學之士。雖能以書史之助。而知天下事。然實踐之閱歷。終不若游歷者。身親其境。之爲能詳盡。美人重游。歷車轍馬跡。恆徧各處。以吾國人與較。殊有慚色。中國古俗。以舟車爲畏途。雖至今日。涉重洋。游異國。猶以爲險。夫生長村市之間。足跡不出百里。無聞見閱歷。以啟迪其智慧。則雖至毫臺。思想偏淺。意念卑近。亦終成其爲自私自利之人焉耳。美國人民。則不然。其上焉者。之徧游各國。無論矣。卽中人以下。勞動社會中人。積其辛苦之餘資。亦時渡大西洋。作舊陸之游焉。年前余在美時。華盛頓上院議員某告余。每年夏季。必渡大西洋。避暑於歐洲。勾留數月而歸。下次之行。已爲第二十八次之航程矣。然此君足跡未嘗及歐洲以外。余意苟能推廣其下次之行程。而至遠東之日本。若中國。興味必更饒於重溫其歐洲之行。且更可擴張其聞見焉。余曾游歐洲及南美諸國。然每余行踪所至。及所息肩之旅寓。同時必有美國人。且曾屢過華盛頓及紐約所熟識之友人焉。不僅其男子以游歷爲重。卽婦女亦多涉重洋。以自擴其見聞者。余居北京時。屢有前於華盛頓紐約及費蘭特爾費亞所識之女友。來過訪者。此實美國國民特長之點也。夫耗數百金。爲游歷費。得於以接異邦人。見異邦事。增長其閱歷。擴充其見聞。寧不善於購金珠爲華服。擲有用之金錢。供奢靡無益之奉者乎。

幅員廣大如美國者。其間尙多荒蕪未墾之地。勤儉耐苦之土人。從事開拓。實爲必要之事。然外國無用之僑民。源源流入。亦非有國者之福。雖當萬國通商時代。門戶洞開。交通本可無阻。惟亡命之徒。抱罪出奔。或無學之輩。爭相攙入。既不能受他國之歡迎。則美國之摒而出之。似非得已。蓋僑民得爲公民。即可享一切權利。與本國人無異。苟僑民而能爲合衆國造福。本可不加禁止。惜佳者百難得一。而敗子獨多。是以阻止僑民。又成一問題矣。反而言之。荒田遍野。亟需人工。凡能耐勞苦者。急應准其入境。不特無害。其有利於美國者。且至廣大。若因工價低廉。恐生生活上之競爭。此實不成問題。僑工之來美者。可定管理之法。遵守之條。入境之時。嚴定其區域。以免彼此衝突之患。亞洲工人。工價既廉。又耐勞苦。美人別無他過。僅以其爲亞洲人。而摒棄之一切。全賴諸白人。余不敢謂爲美國之幸。蓋農爲立國之本。今美國之所以雄冠一世者。亦惟賴財力耳。

美國富者。個人所有之財產。恆至數百萬。以至數千萬金元不等。其用途則多建設鐵道。振興製造等有用之實業。故國之強也。全恃其工業之富。海陸軍無與力焉。當一千八百八十一年時。美國全國陸軍之數爲二萬六千六百二十二。其海軍則有鐵甲

艦二十四艘。魚雷艇二艘。運船二十五艘耳。至千九百十年。陸軍之數。增至九萬六千六百二十八人。海軍則有戰鬥艦三十三艘。各等裝甲巡洋艦一百二十艘。近數年來。各國競以擴充海軍爲其惟一之政策。無畏艦之添造。年勝一年。惟恐不及。諸大政治家似皆中無畏艦之狂熱。一若國家之安危。全恃與戰鬥艦之多少者。雖溫厚長者。主持和平者。流亦爲狂熱所中。而鼓蕩於此潮流之中。不知世界日趨更新。今日已非昔比。二三十年前之方略。今已不復能用。攻城略地之方。在今日有無所恃於無畏艦。而亦爲無畏艦之力所不能及者。苟移建造無畏艦之巨款於其化有用事業。則國家安全。藉之以保護者。當有駕無畏艦而上之者。故一國有強大之陸海軍力。而無其化美備之需要者。可稱之爲強國。而不得謂爲大國。所謂大國者。必其尊和平。重人道。而有公正之行動。其國中復有多數公平正直之人。能發言於政府。美國人民素以公平正直著者也。國中男女多專志於世界和平之事。擲其光陰。耗其資財。以謀和平之實行。若安特魯卡匿奇君之操行。雖百無畏艦。又安能敵之。卡匿奇君及與卡君同操行之人。實美國之干城。而維係美國者也。美國疆土與歐亞各國遠隔重洋。無密切之關係。雖有強敵越境來攻。卽非不能亦屬難事。且美國宿重和平。向無仇怨。又誰欲攻之者。

兩國相爭必非無故。美與列強友誼素洽。外患之來。實可無懼。且即使強兵壓境而侵。占其疆土之一部分。敵國其果能佔而有之乎。強國能勝人。以兵終不能服人之心。未有民心不附而能久佔疆土者。史乘昭昭。俱可覆按。而美國人民固斷乎其不甘伏處於他國政治之下者也。故余深望美國不爲列國潮流所捲。隨聲附和。而日張其軍備。當益擴其公正之心。爲人道作保障。以開導世界之和平。使人知世界之上。固有不藉軍備而可強大其國者。弭兵一事。各國政治家多不然。其說至有比之於燐火。而謂爲必不能行之事者。然此惡名。非今日始也。釋奴一事。在當時固。有譽爲夢想者。而今日則夫人而知其爲當行矣。余不知二十世紀。其亦能見今時之所謂文明者。有傾覆之日乎。

世界兵備。曷爲日見增添。而有增無減也。以余觀之。其因有二。一曰誤解。二曰時行。甲國有無畏艦之創造。乙丙見之以爲是將害己也。因急踵之。如是循環靡復。有己是曰誤解。甲國創焉。乙丙不隨以爲示弱。踵事增華。因相競勝。是爲時行。然美國固不必有此誤解。或踵武各國之時行也。美爲大國。自當有其獨立不羈之行動。且美立一法焉。各國其亦將舍己而從之。如是而世界之和平。得完全保障。美之令譽。將永爲全球企



望和平者所稱頌。此豈非不世出之大事業與。隨聲附和。踵設武備。較其相去爲何如哉。

## 第二章 美國之政府

民權之說。見之中國哲學家言者。遠在四千五百年以前。中國君王以至執政。亦時欲援引其說。以入政治。然存焉而無以闡發。較之泰西今日。特土壤之於泰山。細流之於河海耳。故雖萌蘖東土。而闡明發育。使呈燦爛之光明。則厥功殊不能不歸之西土之聞人。民權主義之在美國。正如羣卉當春。奇花怒放。發育已至全盛之期。中國今日政體。共和不徒務其名。且將徵之實。考察美國之政治。詳研美國之要務。以爲他山之石。實吾政治家當今之急務乎。於此而欲得詳細之觀察。吾國學生宜以時訪其首都華盛頓。彼中有總統焉。內閣焉。各部總長焉。以共襄一國之政治。總統主持合衆政府一切諸事。時或有新進之流。選當斯任。於政治外交。素乏經驗者。然必須有方略。適時用而能通達政變。蓋國中諸要事。皆須進呈總統。於以日科其才智。而復時須晉接上下議院中人。國民代表。及因公干謁之人。每日時期。費於交接者。亦不在少。故總統必爲舉止溫厚。臨事勇敢之人。國人之選總統也。以此爲標準。總統之自律也。亦以此副國

民之望。上下交相勗。而無或踰越規矩之事。華盛頓有國民議會焉。合兩院而組成之。於以通過議案。而取決於總統。總統許可而簽字焉。則議案即爲法律。而爲國民所公遵。民權主義之精意。以國民爲全國之主宰。然一國國民散處四方。而政治又不能出之多門。於是全國國民集衆意而選代表焉。託之以大權。俾代衆意而行之。立法機關以定制。總統一人以理國務。是皆全國之代理人。而受人民之委託者也。於其受任期間內。所得人民委託之權。莫得而廢棄之。選舉者亦自束於法律之中。對於國會所通過之議案。有絕對服從之權。故受委任之公僕。當其執行職務也。反有若乎主人焉。然對於是等攝行主務之公僕。初不必懼其有恣睢放戾之行也。苟一拂乎衆意。期滿以後。斷無聯任之望。而任期不長。卽有謬舉。亦不足敷其設施也。其選舉法中。上下兩院之被選者。皆當爲其選區之土著。此意甚爲美備。蓋一州之人。必審其州人之賢否。而被選者對於其本州之民情利弊。亦必知之較詳於焉。而選爲議員。必能於本州有所造福。然每州議員有定額。不論其州之大小。僅得有上院議員二人。下院議員若干人。於是而較大之州。人才較衆者。每有幹練出衆之才。長於政治。以額滿見遺。而不得參與國事。此則美國選舉法之弱點矣。英及他國之選舉法。於選舉區域。初無限止。選

舉者可任意選舉其國內之人。不以其本州本省之人爲限。然議員之當選者。一省之代表。恆卽爲其本省之居民。特於法律無所限制耳。此較美國現行之法。同其利而無其弊。美國似亦宜倣而行之。雖於憲法須經修改之程序。似非易事。然一國亦如一人焉。當恆舍己之所短。而從人之長。以求適合於時會。美人其亦有意於斯乎。總統任期定爲四年。立意之精審。莫過於此。蓋被選爲總統者。雖其人必有經世之才。爲國人所信任。然理論不皆合乎事實。或優於才而絀於行。或忠誠於當時。而改操於顯達。迨身爲總統。而其政策。或不能洽乎衆望。乃得以任期之短促。而不至久困其人民焉。然是於理論上。雖至精審。而實行時。則窒礙殊多。美之有心人。當亦熟審之矣。新總統之知識才力。無論其若何卓越。初蒞任之數月。必不能遽有所設施也。總統之職務。全國之要機。及晉接臣工等一切諸雜務。非旬日之間。所可擘畫而條理者也。迨其週悉諸務。各得進行。則四年任期。已去其半。設欲更求聯任。又須分其強半之時間。於二次選舉焉。故四年之任期。而求新總統對於國家有重大之設施。事實上未免過短。選舉總統爲一國國民必要之事。然過煩數則民受弊。故爲國民安寧計。寧少無數。凡曾遊美國於選舉之年。見其選舉之狂熱。政治之運動。及種種關於選舉之情形者。當必以

余言爲不謬。當其選舉總統之年。全美人民。皆貫注全神於選舉事業。勿論其爲上流人。爲下流人。爲政黨。爲非政黨。食息視聽。所係無非選舉。各舍其恆業。而從事於選舉。如政客。如官長。於選舉結果。有切己之關係者。萃其全神。出其全力。以爲之。他若普通人民。雖不若政客之狂熱。直接間接之間。亦各傾注精神於其中。選舉運動費之消耗者。數以萬計。政客四出演說。各企其黨之勝利。無老無少。羣聚而聽之。蓋當狂熱之時。一若選舉以外。不復有他事業者。此雖美國人民。政治心之發展。然廢時失業。其弊亦甚。不獨工人廢弛其職業。卽商業經營。亦於以阻滯。而因之減少。工業之用途。一言以蔽之。當其選舉之時。全國陷於恐慌之地位。工商各業。無不受其損害者。華盛頓少年某婚娶有期矣。以選舉而中止。語余云。選舉事忙。不暇婚娶。須待事定。爲之選舉時。之億忙。觀此可知矣。若從法國制。而由兩院選舉總統。則美國種種選舉時之困難。費用等。當可消滅。然余知美國人民。寧受困難。而決不願舍其自由。選舉總統之樂也。故以余之見。既能減少困難。而又不奪人民選舉之樂者。莫如延總統之任期爲六年。或七年。而不得聯任。此制若行。則總統較得自由。可以發抒其政見。不以或將得罪其政友之故。而生失位之虞。於以得專注其心思於利國福民之事。而不爲恐慌所間斷。今

茲每以限於任期而不能爲者。展長以後。其弊可盡。而國中更可減少選舉所生之騷動。而不致頻擾國民。今者中國既改革其政體而行民主制。鑒於法美兩國之情形。余知後此關於總統制之規定。必將採取法國制。或定與法國相同之制。美國政治缺陷最大者。莫如朋分職祿之制。"Spoils System"。諺因有職祿屬於勝利之語。每新總統之蒞任也。必免舊有之職官數千人。以至數萬人。而位置其同黨友朋。及運動選舉時。與有勞力之人。四年一易總統。卽四年必有此大更動。自傑克遜總統首創斯制以來。蕭規曹隨。後此遂視爲成例。以奉行至今。不獨總統行之。卽各州總督之選舉。各地行政官之更調。亦無不遵行之。在美國政治界上。若已成爲不可動搖之定制者。然自私之見。人所公同。徧天下各國。以朋友之勢力而得優位者。固無地無之。然以公僕任公事。不以他故絀之。僮曰位置吾同黨故。此不可謂非一國之裨政也。晚近以來。美人亦深知其非。而思改革之者。於是。有文官職務改革之議。"Civil Service Reform"。候補人員。必先經考試。而後任職。其任期亦有一定之時限。不得率意更動之。苟此法厲行於全美。則總統之所以報酬其同黨戮力之人者。權力必且大削。余不知後此政客之運動選舉者。尙能如前此之狂熱否。蓋前之所以若是者。不僅爲總統

故。卽其身。亦有大欲存焉。改革之發生。前總統塔孚。脫實與有大功。塔孚。塔既爲總統。而有簡任大臣之權。其用人也。一稟至公。視其才能。而無分乎黨派。且援敵黨之一二才俊。以入其內閣。而使之共襄國政焉。

美國人民。雖皆熱心政治。然求官之心。則殊不見切。普通人民之有才智。而具商業知識者。社會之間。在在需用。無論工商各界。皆足自顯其殊能力。致富厚。殊非難事。故是等人類。皆不願投身政界之中。然慎勿謂美國政界。因之而有人才缺乏之虞也。以余個人之閱歷言之。美國政界之舉動。不特功效卓著。卽與歐洲各國較長短。亦嶄然可以露頭角。然以其薪俸之微。幾有使高才之人。不敢懷求官之想。余所識內閣人員。三數人。任職二三年後。以月俸不能自給之故。至不得已而乞休。政務以別資其身。總統於其去後。欲別求能勝斯任之人。以彌其缺。蓋大受困難云。然是等情形。僅指普通官員而言。總統不在其內。非以總統之俸。爲特優。美國總統年俸。與歐洲各國君主較。猶其微之甚者。特以位分之高。爲全美峯極。美人之力。所能餽贈者。此爲最巨。故自古迄今。有逃官者。而不聞有逃總統者。寧特不逃。且皆歡迎受之。樂至無地焉。余嘗與彼都人士友。有告余。彼等爲白宮直接之繼承人者。余甚信之。以時屆選舉。彼等咸爲合格。

之候補人員。候補總統之在美國固不殊。歐洲君主國之有儲貳也。卽女子亦有彼選。舉權。曾有一女子選舉時。亦以候補總統稱於時。惟以得票不多之故。終歸失敗。美有一事最足起余欽敬者。其人民之奉法是也。全美人民自總統以至編氓。皆自束於法律之中。妄敢有所踰越。然有時以解釋法文過於嚴酷之故。致失其公平者。其憲法第一章第六條云。『上下兩議院議員於其任職期間內。不得兼任美國其他官職。或新設之官守。亦不得取因以增加之俸給。』曾有上議院議員某。由總統簡任爲內閣人員。內閣職官之俸給。適於其在議院時議決增加。此議員在內閣之俸給。乃僅能依照未加時之原案。雖彼在議院通過此案之時。固未嘗知己身將入內閣而與有關係也。美國各州與中央政府之關係。至爲奇特。余於說明之先。當首解釋外國人對於中國省政治之誤解。歐西人士恆以中國各省爲自治機關。謂省行政署各有其單純獨立之權能。而與北京之中央政府無涉。實則自共和肇建以來。厲行中央集權之制。省中行政官吏。盡由中央簡任。卽將軍巡按。亦得以中央政府之命令而解免或更調之。省中諸要政。苟不請命於中央。胥不得自由解決。此與美國之州政治較。其相殊爲何如。美國人恆以其州政治之獨立。而無所係屬於中央。相誇耀。州中官吏自總督以

下無論何州。皆爲其州人所自選。州有州議會。亦爲兩院制。而由人民所選舉。各州各有其立法行政之權。而無所咨詢於中央。卽各州之間。亦單獨進行。不相統系。各州之民法。如財產繼承法。婚娶法。離婚法。賦稅法等。皆爲州政府權限內事。各州政府。胥按其本地之情形。而孜孜焉。促進其政治。以謀本州之福利。故甲州之賦稅。或較乙州爲輕。而乙州之離婚法。公司組合法等。或較丙州爲重。甲州之人。不能於其本州取得離婚狀。則可轉至乙州。或丙州而行之。本州律法所嚴禁者。他州或以爲可行焉。賦稅亦然。甲重乙輕。初非一致。異邦之人。初游美國。見是等政治。必深致駭異。謂以若是繁賾複雜之政體。何以能進行無阻。且有殊效。其故蓋以各州人民。互相移居。無杆格不通之病。復加以商業上之往來。社會上之交際。雖政俗各異。而其情感之聯係。仍得日加親密。而無水火之見。以余所知。各州間。蓋從未有爭執問題之發生焉。然苟各州間。能設一公共議會。於以會議各州之政治。修改各州之法律。而使之共趨於一軌。則於政治前途。不更有所裨補乎。以美國州政府之爲獨立機關。而不爲中央政府所統屬。外人之僑美者。因時有不便之事。發生數年以前。有歐人某。僑居美之某州。爲暴徒所攻。致盡毀其產。乃控訴於本州官吏。而要求賠償。訴詞屢上。終不得直。後乃報告其事。



於其本國駐美大使。其大使爲之轉訴於國務卿。國務卿既悉事狀。謂僅能移書州政府。請其受理訴狀。而無直接干涉之權。州政府以其本州情形爲言。此僑民乃終不能得滿意之賠償。雖經其大使之屢次交涉。然國務卿以美國法律。中央政府無干涉州行政之權。無能爲力。是等情形。於美國外交上。終爲窒礙之事。譬如僑民之寓居者。或受虐待。或遭謀殺。而無相當之賠償。中央政府乃不能有派員審察之舉。能力所及。僅可移書州政府。俾自清理。設州政府不願行。則更無其他救濟之方。幸美國人民和平謙讓。絕少是等意外之事。然苟能斟酌情形。而俾中央政府以更大之權。則外交事實。上不益形便利乎。願茲事重大。要非易舉。國會知各州行政。斷不容中央有所干涉。因必不肯以斯權畀之中央。使得於以干涉各州之行政。然異邦之人。移居美國。或僑寓其間者。日見增加。因之虐待僑民及爭執之事。亦在所難免。而時有所聞。雖今之州政府。對於是等交涉。類能爲相當之處置。然以忌僑民興盛之故。存偏袒之心。行不公之政者。究亦間有此。皆各州自爲之政。而非中央所預聞。苟使中央政府有監臨糾正之權。是等困難。當可決其日減。余爲聯系美與他國間之情感。並企解免其後此之誤會。計敢爲一言。以告美國。是等事。中央政府與州政府間。宜早有所籌畫。以定安全之計。

也。

居今之世。一國政治。宜取何制。此一難問也。美國人民。必以其現行之政治。爲最佳。反求之歐洲。各君主國。則又各自以其政體。爲適合。此係於一國之教育者。半係於其國之風俗習慣者。亦半有習於君主制。積久而相安者焉。有習於民主制行之。而有殊效者焉。設強前者。而爲民主。或易後者。而爲君主。其必皆無以相安。此無他。風俗習慣。各有不同。而利於甲者。不必其利於乙也。故秉其精義。而純心行之。則兩者。皆有其不可磨滅之點。苟能以利國。福民。爲主義。則民主。與君主。要又何擇。然中國。自上古迄今。其政體。非爲君主制乎。四千餘年之風俗習慣。其人民。非皆習於君主者乎。今驟易爲民主制。於風俗習慣之說。又有何解。曰。中國歷史上之情狀。自有其特異之點。不與日本及其他君主國相等比也。日本之建國也。相傳在紀元以前六百六十年。創之者爲神武天皇。自是以後。一姓相傳。以迄於今。若中國之清室。則滿洲族也。清朝之始。在千六百四十四年。且以兵力而據至尊。非相傳而承大統。晚近革命。清室既屋。雖國人中。固有聰睿異智之人。然無繼承君統之權。況加以猜嫌之見。省域之爭。苟欲再行君制。內亂之生。且將繼起。而靡已。故君主之制。在當時。實無置喙之餘地。且國民之強半數。又

皆深疾夫專制之故制而不願其再現。於是。以熟籌大局。顧念和平。而一躍以成現行之民主政焉。進化公理。於中國進行殊速。將來必有登造峯極之一日。以共增進人類之幸福。今雖爲雛形之民主國。然其長成之期。當不在遠。國中民人。對於其太平洋對岸之民主先進國。皆有懇摯之真誠。此兩民主國之所以當互相親愛者。其理由甚正。中國各地商業之可以擴展者甚多。美之斐立濱羣島。鄰近吾國海岸。而巴拿馬運河。開通後。兩國航運當益形便利。美國在東方之商業。必可以因以增加。故兩國伸手互握於太平洋中。而以兄弟之友情相見。交互間之利益。實非淺鮮。不僅商業上爲然也。卽東半球之和平。亦可於以保全。較之大隊之無畏艦。其力更厚。而植基當可益形鞏固焉。

#### 第四章 美國與中國之關係

美國大有造於東方者也。而於吾中國爲尤甚。然苟欲中國人表其純正之情感於美人。則評論之辭。非盡愉快。好與惡蓋相參焉。溯吾中國門戶開放之始。與各國通商互市。各國之民紛至並來。或發展其商業。或傳佈其宗教。或以遊歷。或懷別故。而吾中國人以其古有之文明風俗習慣。思想政教。與西方之民。常扞格而不相入。爭端時起。違

言常聞。馴至戰釁之開。亦非一次。然中美之間。固未嘗一次以兵戎相見也。雖困難之爭執。亦時或難免。要皆能和平解決。而不致釀成大故。吾民之所感謝。美國者。此其一也。當一千八百六十七年時。安孫倍林格姆君爲美國使華公使。滿洲政府特任之爲出使歐美之領袖專使。雖使命未竟。中道殞喪。其誠心於吾中國者。功業不可爲不巨。中美間之友誼。以其使臣之賢。而早植鞏固之邦交者。此又一也。中國留美學生。率能於美國得誠心之接待。無論入何學校。皆能享同一之利權。所受學業。無異於其本國之學生。又能所向得其社會之歡迎。而略無絲毫國故種族之見。吾民之所感謝。美國者。此又其一也。且美國略無利吾土地之心。此又爲國人所共信。拳匪之亂。美國首創維持中國門戶開放主義。而保全吾內地之安全。同時得列強之同心。而於以實行。事後國務卿海約翰君。得麥金蘭總統之許可。而宣言謂中國拳禍之賠款。苟各國允減半取償者。美國當首爲之創。不幸以不得同意之故。海君之意。不能見之實行。然自是以後。美國以獨意之行動。除其真實之損失費用外。盡以贏餘之賠款。還之中國。此美國對於拳匪賠款。二次之誠意行動。而足以表其仁厚公正之誠者也。凡茲數者。皆美之大有造於吾而爲吾民所歡忭感謝。不敢或忘者也。請更就他端而言之。中國學

生之留學美國者。約可千計。其數且年復增加。日事發展。凡此學子。類皆涵濡美國之政教。而有味於民權共和之制。其於中國前此滿洲政府之專制。實含有損害之意味。蓋彼既讀美國史。而知美國政府之所以構成。美國人民之所以得其自主之權。必且中心向之。而懷改締中國政治之心。中國士商之僑居美國者。習於其邦之美政。感於其民之自由。亦必人同此心。心同此意。反而自謀於祖國。此於辛亥革命。亦爲諸動因之一。而滿洲政府。因以不慊於美國。且美國對於政治犯爲安全之保障。政治之逋逃。恆以美國爲逃亡地。此又足以生滿洲政府之惡感也。坐是諸因。而滿政府之於美。恆抱不長之感念。抑余又不必言。此意於吾人民爲無關係者也。政治上之罪犯。得罪於己國而至出奔。不僅美國保護之。歐洲各國。以至日本及其他各文明國。無不保護之者也。自共和肇建。清室覆亡。而事實適一變。滿洲官吏及舊系之官僚。率擇香港日本青島等爲庇護之所。其餘則天津上海各租界。及其他通商口岸等。卽前此滿洲政府所深惡痛疾。而目爲國事犯之逋逃藪者。昔日以美國之保護政治犯而見怨者。今則自臨其身。前之恨其庇人者。今且藉以自保矣。

中國人不慊於美國之眞實原因。則美之禁止華工政策爲之也。故美國一日不除其

禁止華人之法律。則美之令名終有一污點之存在。其對於吾國人雖誠彬彬有禮。而二國之情感終不能呈圓滿之觀。欲於此問題詳加討論。非此短章所能盡。然欲使讀者明其真相。不得不略敘其歷史上所經過之順序焉。當一千八百六十八年時。美國以建築鐵道及其他公共工業之故。需工甚急。中美兩國政府乃訂立一專約。大旨謂中國人民之遊歷美國或僑寓其間者。所享利權得與其他優待國人民僑遊美國所享者相同。此條約爲美國大政治家國務卿西華德君所訂。而由美總統宣布之於國會。所謂正大榮幸之條約者也。當時美國歡迎此約。而認爲國交之大進步。中國則特委專使以訂立之。由雙方簽約。而爲正式之成立。美國外交家安孫倍林格姆君實爲中國專使之領袖。此約成立不數年。美國工黨不能堪華工之相競。羣起反對。美總統於是重委修約專使來華。欲廢弛舊約。而於原文有所修改。中國政府既深駭美人之忽反前言。自不願於美人所自願訂立。而以熱心請求中政府同意之條約。奉行未幾。訂約之善心。尙未收効。而遽行更動。以中斷其深長之希望。因不之許。磋商會議。至於多次。卒有第二條約之成立。其約文之第一二條如下。

第一條 中國無論何時。以美國政府之意。如中國工人之至美國或僑寓其間者。有

妨害美國利益。或其居留地之秩序者。中國政府承認美國政府有約束限制或停止其入口或居留之權。惟不得完全禁止。其暫時停止或限制。必須有充分之理由。且僅能適用於華人之工作者。其他華人皆不在此例。對於華工之法制。僅於其移居之行動。有約束限制或停止之權。移居之人。則不得虐待或凌辱之。

第二條 中國人民之至美國者。或爲教員。學生。商人。及從事考察者。其本身及其隨從。并已在美國之工人。皆有自由行止之權。所享各種利權。一與其他優待國人民相同。

中國政府自第二次順從美國之意。而改訂條約以後。於理論言之。當可副美國工黨之意。而免美政府第三次修改之要求。然於事實則大不然。二次訂約。不及十年。美國國務卿復提出訂立三次新約之要求。俾其國會於華工議案。可爲更嚴之禁止。而於居留美國華工之利權。加之以制裁。中國政府對此新要求。深用致疑。謂美政府其將盡食其前言。而悔其所已許之利權乎。然美國國會已於時通過一千八百八十八年之斯各脫議案。禁止華人入口。除官吏。教員。學生。商人。遊歷家。考察家不在其內外。卽華工之居美者。已回國後。亦不准復來美國。前國務卿國際法專家福斯脫君云。是實。

爲違犯一千八百八十年條約之舉。大理院亦爲同一之宣言。然中國政府以欲解除美國行政上困難之故。不惜自棄其利益。自抑其公正。違國際上之公理。而爲第三次之順從。於一千八百九十四年。結第三次改革之新條約。而俾美國國會對於禁止華工問題。以更大之權。其條約第一條所規定。謂於訂約後十年內。爲完全禁止華工入口之期。其第三條明白規定云。此條約之款項。於中國官吏教員學生商人遊歷家考察家所現享之利權。毫無更動。惟工人則不能享有是等同項之利權。由此條約而言。之則禁約所及。僅能施諸工人。工人以外。諸色人等。固非此條文所能適用者也。初訂約之數年。美之管理移民者。固亦以此爲範圍。而無所逾越。然無幾時。而其情態又變。條文之解釋。別成一說。謂僅約文所載之五種人。爲能入美國之口岸。其他中國人。無論若何尊重可貴。皆在摒絕之列。準是以言。則中國之銀行家。醫師。律師。買賣人。客。商業經紀人。學士等。皆將以此條約之故而拒諸美國國門以外矣。讀者諸君。其亦信有是理乎。且就條文之文義而言。固已顯然可明。而無庸若是奧妙之曲解。且其於理由又不充分。而今則已明明成爲事實矣。此條約宣布於一千八百九十四年十二月。按照約文所載。其施行之期限。以十年。若期滿前六月。兩國無別項意見提出。則



認爲繼續有效。而當再展十年。當一千九百零四年期滿之時。中國政府提出意見於美國。此約乃遂失其効力。而不復存在。自是以後。美國對於華工問題。亦不復有新條約之要求。然美國稅關及管理移民之官。則仍依照其國會所通過之議案。而禁止華工之入口。以一千八百六十八年倍林格姆條約而言。則美政府固嘗許中國人以遊歷。住居之權。而允其享與優待國民同等之權利矣。此事既已。然而一千八百九十四年之條約。又以期滿而已。失其効力。以福斯脫之法律眼光觀之。及其他法律專家言之。現行之繼續禁止華工及限制中國商人與他色人等之來美。不特出於國際權能以外。且大背乎條約之規定矣。若夏威夷與斐律賓羣島之華工禁約。則尤其無理者也。美國本土之禁華工。猶曰華工之來有害於白工。而由工黨提出反對之怨言者。也。若夏威夷與斐律賓。則曾不聞有是等之怨言。寧特無之。夏威夷華工之禁約。且違反其當地人民政府之意向者也。中國與此羣島間之自由移殖。蓋已數百年於茲矣。其尤失公允者。則其他亞洲民族。如日本暹羅馬來等。皆可自由出入於美國國境。及其領土。而所被禁絕者。乃獨爲吾中國人也。余知華工禁約之真相。有爲多數美人所不知者。蓋苟或知禁約條件之嚴酷。至於此極。則公正之美人。必不願以斯無理施諸

其誠率之友人也。且吾國人又無所奢望於美國而求其特加青睞也。能享他國人所享之利權而不加歧視。斯已足矣。美國人素以公正名者也。抑仍將摒絕斯求耶。欲解決此移民問題而使兩方皆得其平。誠非易事。蓋其間固含有絕大之困難也。然要非必不能行之事。苟有有心人願睹其早日和平解決而欲聞解決之方。則余固嘗思得一法焉。且余思苟不誤。余知美之工黨固亦甚欲此問題之得以解決也。當一千九百零二年。余在華盛頓時。紐約屏海姆頓中央工黨聯合會要余蒞會演說。余不欲拂其意。乃受其請。余駐彼之時甚短。然雅得彼中誠意之接待。不特地方官吏及人民表其歡迎。卽工黨會員以至工人等亦深有厚意。工黨中領袖及工人率爲有意識之人。其主意以不願有廉價之工作與之相競爲主。而毫無種族國故之見。介諸胸中。故苟美政府能以工黨廠家及商家各代表組合一會。而與中國同一之團體相提議。於以自由交換其意見而爲直接之討論。則前此兩方之種種困難。胥可解決。而中美兩國各得其滿意之結果。此問題一解決。則中美之間。乃無絲毫之嫌隙。兩民主國之友誼。益形誠摯。相互間之利益。於以日進。不特商業之發展。至於無極。卽遠東和平之基。亦可永臻於鞏固之地位。

## 第五章 美國之教育

美國人口九千一百九十七萬二千二百六十六人。而於一千九百十年。全國學生之數。爲一千七百五十萬六千一百七十五人。學生與人口相較。其差數之近。世界各國罕有與比者。教員之總數。爲五十萬六千零四十人。教育廣溥。至於如此。當必有甚大之經費以維持而進行之。夷考其教育費。則學費所入年爲一千四百六十八萬七千一百九十二美金。校產所入年爲一千一百五十九萬二千一百十三元。由美國政府所補助者。年爲四百六十萬七千二百九十八元。其總數爲七千零六十六萬七千八百六十五元。世界各國。其有以若是巨款。供教育之用途者乎。各州各地。學校如林。公私並有。每一市鎮。必有公立學校。即至小之鄉村。亦自有其小學校焉。農產各地。例如 Wyoming 等。人口稀少。不能建設小學。則由政府出資。俾教員至農家就教。聚三四小學生而施其教授。若繁盛市區之公立學校。則兼收並育。無嚴重條規。以限制就學之人。惟南方諸省。則異色人種。另有小學以教授之。求學之途。既若是其便利。全美人民。因絕少失學之人。然此僅就固有之美國人而言。若新移斯士及黑人等。則不在此例。惟黑人等。今亦不少積學之士。如薄開脫華盛頓等。固皆能以學問鳴而爲通流所欽。

仰者也。美國學校制度之優點。則取費廉而包涵廣是也。小學及高等學校中。富貴家之子弟。與貧苦之生徒。同堂教授。無分彼此。總統之子。亦入通常之學校。以就讀。故在美國。貧苦之人。亦不至鄙野無文。苟有求學之誠心。不難於大學校中得一學位焉。各州大學。對於其本州學生。恆可免費。即異地學生。所收學費。亦殊低廉。普通人民。因不難遣其子弟求學於大學。而大學生徒。爲自給之故。恆於上課時間外。謀一營生之地。雖至卑下。不爲可羞。若假期內。就短期職務者。猶比比然也。余於暑假期中。常遇大學生徒。之爲旅館侍役者。見其彬彬有禮。而能盡職。且復謙抑自處。不因其蘊學而驕人。意立脫總長。偕余參觀哈佛大學時。見諸生於膳堂。適當午餐。膳者甚衆。余見其侍者。亦皆爲清潔之少年。異而詢之。則諸侍者。固皆校中生徒也。苟有侍者缺出。諸生爭相應召。蓋貧乏者。皆樂得一職。以自供。而美人尊重。自立。略不以執業之貴賤。爲榮辱。以汗血。易金錢。雖至微細。不爲可恥。積學之士。亦從無羞之者。東方諸省。以僕傭之少。烹飪灑掃諸事。皆家人躬自爲之。數年前。余遊馬賽邱薩州之阿許。僕痕海姆。所屬之女主人。不特躬操烹飪。即余臥室之整理。亦皆親自爲之。大學教員某。邀余同飯。其二女公子。乃侍席焉。此正與吾內地各省之情形相同。中國內地。雖富有之家。亦躬親操作。

廣東鄰近各地。富家之子。其家長恆使之出就僕役之職。俾有以知物力之艱難。庶成人以後。不致浪擲金錢。無所顧惜。嘗有富翁某。家資鉅萬。僅生一子。翁欲使之知財聚之匪易。而於將來能撙節其家財也。挈之至廣州。俾就僕役之職。既至廣州。傭於一中人家。主人令之管理家事之一部分。并值花園事。一日此童偶以不慎。碎金魚甌一。爲此家之上珍。於是主人大怒。責其疏忽。童子則冷然報之。謂苟至其家。可於其父所有之金魚甌中。任擇其一。以爲賠償。主人益怒。意此童子於疏忽以外。更增侮慢之罪。後乃偕至其家。則見其家所藏之金魚甌。品物之佳緻。固什伯倍於童子所毀碎者也。故富家操作。在中國亦未有以爲卑下者。惟中美兩國操作之原意。則微有不同。美人之工作。有迫於境遇。而不得不然者。中國則欲以是勞苦少年之筋骨。俾知物力之艱難。而不致妄費也。

美國學校所授之課程。科目甚繁。賅括至廣。學校中畢業生徒。秉其所得。已可出應社會之需求。而不虞缺乏。不特畫圖等美術。在所當學。即木工及其他藝術。亦皆列入課程之中。余嘗見一精製之小箱。云爲小學生所造。余初不解小學生徒。何必教以是等藝術。後知蓋所以磨練其才能。使之能實用其心思。而排列其用材。以成整齊之秩序。

者。美國學校。除教會所設立者外。校中課程。皆不及宗教。而尤以省立學校爲嚴。聖經及其他宗教之說。皆不得攙入教科。校中校長。以至教習。雖或爲篤信宗教之人。然不得以其宗教之思想。灌漑學生。顧少年心思。感覺靈敏。變動至易。苟學校中。無道德倫理之說。以扶掖之。則誤入迷途。殊至易。易古諺有云。有學問而無道德。則如行船之失其舵。必將漂泊中流。而無所抵止。不學之人。違法害理。與所知也。其過易見。若有學問而無道德。則行僻而堅。言詭而信。作奸犯科。人且稱頌之。欲偵察其故失。蓋有出於警察才能之外者。詐詭之罪案。一至披露。其犯罪者。率爲大奸慝。不特具高深之學問。且有特殊之才能焉。故爲社會安寧計。愈有學問。則愈當範諸道德。俾有以善用其才能。教育如雙鋒之刃。柄持不得其法。則時或自割焉。美國素無國定之宗教。而教派紛歧。勢不能以特種教派。採入學校教科之中。然胡不以道德上之根本原理。編成教科。頒之學校。俾生徒奉爲圭臬。而不致有失足之虞乎。以下數則。皆可舉以例爲者也。

(一) 主忠敬

(二) 敬父母

(三) 四海之內皆兄弟也

(四)人已無間

(五)博愛

(六)言行主純潔

(七)慎飲食使身體自潔

(八)身心俱泰爲真快樂

(九)安身立命

(十)敬人以德毋取財勢

(十一)天可傾正義不可易

(十二)勿以惡意向人

(十三)待人以誠勿生歧視

(十四)尊自由勿放縱

(十五)己所不欲勿施於人

以上數則。適爲余思慮所及。顧皆切實可行。而足爲普通學校中道德之基礎者。以余思之。世界上。不論何種民族。其教育之主旨。皆當以道德爲歸。束之地。苟道德不講。則

皮之不存毛將安傅學問何爲哉。

共同教育（男女合校）在美國甚爲通行且年事進行漸就發展不若他國之拘泥。全國小學及大半之高等學校皆男女同校且同班教授不分課室即大學校中女生亦得入學女子求學之權同於男子雖進行甚遲而各處皆漸就普及已公認爲正當之舉有數處大學則爲半開放制校中雖收女生其教室聽講之處皆與男子隔絕爲特造以供女生之用者以教員而論則小學校中盡爲女教員中學以上男女參半大學校中則男教員爲多女子或間有之焉蓋天然求學之才能女子本不讓於男子也。反對合校之說其立論大率以女子及笄時期知識及身體過於發展之危險及男女學生中學時期進步不能相等之害爲中堅且謂男女同學之校所授課程無分彼此往往因求教授上之便利不得不略爲遷就於是女子所習之必要科目如美術家政等遂付諸闕如然余以爲教育一面不難補救使男女同受其益惟在教育家之悉心規畫苟有適宜之課程而兩無扞格則其患自免或又謂男女習處既久則氣質上將有所變易其結果必致丈夫失鬚眉氣而巾幗有男子風不知此種問題不免過慮僅屬之理想而未必現於事實如當教育經費不敷時則男女同校於教員課堂藏書樓試



驗室等。均可公用。殊不必斤斤於以上反對家之諸問題。而遂遲疑審顧也。若謂男女同校。於婚姻上恐發生阻礙問題。則未必然。男女於青年時朝夕相見。切磋有素。則品性行爲彼此深悉。靡遺。且女子好高之心。較男子爲尤甚。既同處一堂。則於智育上必力爲競爭。思駕男子而上之。男尊女卑之說。可鏟除於無形。結婚之後。靜好無間。必有彌形和悅者矣。

美國學校日盛。未婚女子入學之數。亦與之而俱增。蓋女子讀書後。於教育界中。或商業場中。均可佔一位置。而自謀生計。一有學問。獨立匪難。獨立之性。既萌。依賴之性。自去。徵諸列邦教育之事。操諸女子者。居多。然吾國女界。亦無難勉而致也。使女界亦能如美國女子之獨立謀生。詎非余所深願而國之大幸歟。

學校內運動之益。盡人知之。於正課外。使學生練習之。可謀身體上之發育與強健。然亦不可過度。否則於學業上有妨礙。如賽船一事。數月之前。卽已預備。在預備時。置功課於不問。所中心藏之。而寤寐不忘者。惟賽船時之若何爭勝。及得勝後之若何榮耀耳。以遊戲快樂之事。而視爲必不得已。自尋煩悶。不已。失運動之本旨耶。且既賽之後。則執舵之船主。與賽之船員。必有極長之時間。以資休息。耗時尤多。故余所主張者。運

動中須有節制。使體育發達。身心愉快。而後已。特無競爭之意。厲乎其中。則運動亦無與會。故學生至運動場時。須於放任中加以限制。於身體有妨礙者。當力禁之。不過於劇烈而有益於身體者。當鼓勵之。庶不背智力與體力並重之意矣。

## 第六章 美國之商業

設有人問余。美國商業之所以發達。其主因何在。余必答之曰。廣告。美國商人苟欲發展其所業。無不登廣告者。月報旬報日報之可以致遠者。無論矣。即市衢之中。亦所在有特製之告白。以引途人之注意。謂美國今日之大商家。其始不由廣告以得之者。余不信也。印刷品中。若書若雜誌。無不有多數之廣告。有時雜誌中貨物之圖樣廣告。等。幾佔全書之大半焉。足跡所及之處。無不有特製之廣告牌。即火車駛行之時。開窗一眺。亦每有巨大之廣告牌。映入吾人眼中。大抵貨物愈新出者。廣告愈多。字畫亦愈大。若市衢通行之電車。則其中可以容字之處。無非各家之廣告。苟見一廣告而去書問詢。則覆書之來。恆至再至三而不厭其煩。余在美時就詢之件。至今猶有來書勸余購買者。入夜之廣告。尤爲奇特。苟閑行市衢。常可見智巧之廣告。爲各商人自出心裁而創造者。有爲五色電燈。時明時暗。而成其店舖或貨物之名者。或成其貨品之象形。

物者猶以此爲不足。則廣發傳單。徧贈廉價券。以聲明其貨物之佳妙。機會之難得。更有店舖。例於每年賤賣一二次。減其價額至百分之十或二十五。然商人買遷爲利。斷不肯爲虧本之買賣。故當其賤賣之時。能減原價百分之二十五。則其平時所取之利息。吾人當可約畧計算得之。以廣告之助。每有以薄本起家。而數年以後。頓成百萬之巨富者。欲知廣告之重要。請舉一以爲例。現今舉世所知之一種衛生飲水。可代咖啡及茶類之用者。因廣告之徧布。各國各處之報紙印刷品等。幾無一不有其廣告。而成爲通常習用之飲料。發賣之主人。已成爲數百萬金之巨富。聞其每年所耗之廣告費。至百萬元以上云。尙有一事。附麗於美國商業而不可須臾離者。其電話是也。各商店各事務室。無不有電話。馴至每一商人之辦事檯。亦各自有其電話。買賣交易。多於電話成之。無奔波往返之勞。華盛頓各大公司中。電話之多。率以數十計。公司總理之命令通告等。皆由電話傳達之。居家差足自給。亦無不裝設電話。故自電話發明以來。人類幸福之因。以增進者。殊非淺鮮。朋友遙隔。可藉電話以通音問。如晤言一室之中。而無奔走之勞形。男女好合。可藉電話以互通心曲。卽婚嫁問題。亦時由電話交換意見。而因以成就者。惟電話總公司之誤接。及友人之惡謔。常釀成重大之錯誤。余在華

盛頓時。嘗因誤接及惡謔之故。而失余午餐於使館。一日侍者接一女友之電話。云邀余午餐者。准期前往。則其家未嘗請客。余因之受枵腹之苦。

新出之貨。未能暢銷。商人因有旅行各處。徧贈貨物。毫不取償者。然因是而得推廣其銷路。則第一次所失者。不難於後次取贏之時。至三四倍或十餘倍焉。是等行商。挾其貨物。徧游全美各處。見有可以銷行其貨物者。無不竭力推廣之。或見坐賈之業。與已相同。而爲小商舖。則招之爲分公司。以發售其貨物。終年僕僕道途。不遑暇處。蓋直以火車爲居家者。食息坐臥。以至營業買賣。無不於旅中行之。有告余者云。一月之中。足跡所及。已至三萬八千里。自出行以來。蓋三月未回其本號焉。故美國商人之活潑奮發。實爲其天稟之才能。苟有謀利之處。雖行長途歷萬險。亦非所怯。一年之中。大半費其時於長行。而無論何時。苟需啓行。畧無延滯。近有美商晤余上海云。在紐約啓行之日。當離家赴公司時。略不知將於是日有遠行。抵公司後。總理告以將有所事於中國。詢其願作長行否。當卽同意。乃以電話達家中。備行具。二小時後。卽於紐約乘火車至舊金山。而抵中國。且言數月內。已至中國二次云。

美國商賈。大概皆有貿易之才能。而知所以銷售其貨物者。苟入一肆。觀其陳列之貨。

物初若無一二足合吾意者。然一經肆人之繒染。謂用途若何廣。工效若何大。貨質若何佳。則雖欲不購。有所不能。全美之行商坐賈。迨無一不長於語言者。然亦嘗見例外之事。有美人某君。拙於辭令。行商中國。事垂成矣。卒以一言而隳其全功。其言謂彼來中國。并無所謂仁慈之意。目的所在。僅爲謀利。夫商人之。質利。世人所皆知。普通商人。決不能如卡匿奇。或披樸台。故此君。殊不必自宣其意。謂其來中國。目的。乃在吸取中國之利源也。

十年以前。美國資本家之眼光。僅注於歐美。而不能遠矚東方。投資中國。爲其所不願聞之事。余嘗憶及前此鐵路借款時。所經之困難。當一千八百九十七年時。余得政府訓令。爲建築粵漢鐵路事。命爲招集外資。余乃首晤紐約著名之銀行家及資本家。詎知皆不願聞。以爲彼等資財。應本國之用。殊爲得利。且甚穩固。較愈於投諸中國也。經十二月之辛勤。費無數之口舌。廣爲解說。始得一資本家之同意。而願研究此問題。今則形勢大異。美之銀行團及資本家。皆知投資中國之利益。且至爲安妥。咸遣代表至中國。以謀國際之投資。其視中國。不殊於歐洲。而願以同一之條款投資。且與歐洲各資本家聯絡一氣。成一強有力之資本團於中國。以應中國之借貸。迨至晚近。一千九

百十三年）美人始脫離此資本團云。

謀財生利之機會。於美至廣。少年之人。苟有中庸之才智。而副以誠實。恆不患失業。若復能勤奮刻苦。而有忍耐勇敢之性。則進其所業。而至自立之地位。亦殊易。全美巨富。不下數十百人。當其發軔之始。要皆貧苦少年。一無憑藉。如雪中之餓雀。以刻苦堅忍。勤奮節儉之故。迨其成功。有非彼時始願所及者焉。吾人於此。不能不佩其毅力之巨。苟中國商家。能遣其子弟。至美。於以學習其進行之法。裨益當非淺鮮。惟世界上無完人。即各色人種中。無完全之民族。美國有一種聚財之法。於余意殊有所未愜。例如一公司欲增進其資本。常有新股份之添入。然所添之股份。恆爲空股。而真實之股本。每每未嘗加入。所添之股份。或居原本之半。或與原本等巨。然持之者曰。公司之特權及資本。既增加其價值。則欲表明現有之時價。自宜增加其股份也。聞有數處鐵路股份。其所增加空股之數。至可駭人。大半盡爲無資本之股票。然股份雖僅存在於紙上。而買賣之時。則與真者同其價值。此等聚財之法。其爲公正與否。或與道德合符與否。姑不詳論。以俟耶教長者之評判。然公司中發行空股之人。其計畫之巧。聚財之精。則實不可謂非至奇極怪之事也。設使新股增加。而無損於舊股東之利益。或實股空

財之間能公。分利益而不生窒礙。則或者可稍卸其罪名。然自吾東方人觀之。斯實新奇之事也。顧有一事爲余所不忍湮沒者。則其普通人民之悉能自重是也。例如公車中。僅有駕駛者而無收費者。乘客車費各投之小箱中。而無人顧問。投與不投。悉聽客意。然曾無有不給者。余從未見有不自尊之人。或者此車費者。此等自重之風。美國而外。余實未之他見。或者美國人民皆足自給。其力恆可付此幾微之費。因不願以之自喪其尊貴。故鼓勵人民之自尊心。實爲至要之法。民既自尊。然後因而信任之。使各以其良心爲監督。而不必由在上者加以制裁。

余所見美國商業中最奇之事。莫如紐約之股票交易者。股票交易所爲各貨買賣之大市場。然曾無絲微貨物之陳列。商人在所中談論叫囂。往來不已。苟非先告余此爲交易所者。余必將以爲集人交關之所矣。然雖叫囂甚劇。而從未有流血互鬥之事。其尤奇者。則人數雖多。而從未見一婦女。或所中章程不容婦女入會。余實未嘗深知。不敢憶斷。當俟婦女選舉會中人考查之。惟余知所中會員有一千一百人之多。其入會資格必須爲美國公民。年在二十一歲以上者。會中人數有定。入社之法。或由選舉。或由讓予。(如會員死亡或辭退者)新會員由讓予而入會者。須納入會費二千元美金。

另予老會員以讓予費若干。其數恆甚巨。苟得會中允可。老會員亦可以其會員資格傳諸其子。而不納他費。然二千美金入會費。則不論何人。皆須付納。會員讓予費之價額。隨股票交易之盛衰爲轉移。初無一定。近年股票交易。至爲發展。讓予費因之大增。有以九千五百元美金購得一會員者。此較之歐洲股票交易所之入會費爲巨矣。然每一缺出。購者爭集。則其位置之重要。吾人亦可約畧知之。交易所中。每人各有一小室。一棹一椅一電話。庶可以所中股票市價。告諸其本地及他處之特約人。如華盛頓之特約人。得報告後。欲買何種股票。卽由電話告之而成交易焉。余曾見是等交易。成就於十分鐘時。雖買者賣者之間。程途相去。乃在七百英里之遙。每日股票交易所之買賣。爲數甚巨。恆至數百萬元。紐約亦有各種貨物之交易所。如穀米咖啡棉花等之買賣。故紐約全市。每日交易之總額。爲數之巨。有非巧歷所能算者。紐約而外。如芝加哥。如波士頓。如星星難的。如聖魯易。如費拉特爾費亞。如白爾鐵麻。如華盛頓等。亦皆有股票及他種貨物之交易所。然市價則恆操之紐約商人之手。是等交易之法。簡易便利。至堪注意。余信歐洲及南美各市場。皆不若紐約之盛也。且美國工業及實業各事。亦皆足爲各國之模範。數年前余於馬德里地（西班牙京城）見市街之電車。純如美



制詢之邦人。則固美公司所管理者也。美國人求財之心最殷。致富爲其唯一之目的。無間貴賤。全國一致。因其急於求富之故。行動舉止。無一不取急迫主義。行於市途。幾如競走。進膳之時。不暇辨味。午餐不及十分鐘。即僂僂上道。就其職業。終日營營。皆浸淫於急迫主義之中。因之急病致死。常有所聞。醫生謂爲心疾。余意當即急迫無休所致。人莫不欲富。而美人之求富。則越於常軌。宜其受弊也。美人壽命統計。不若歐人之長。世人亦既共信之。蓋美國人致富。雖易。而其慾望之高。幾無止境。余識美人至夥。以余之見。皆爲有家。而彼等自視。則恆若貧人。有某君者。積貲已逾五十萬金元。余嘗詢之。以何時當萌退志。作安樂念。其答辭云。苟積貲不及一二百萬。則其人不足爲富。故尙不能棄其所業。夫美人之慾望。既常過高。而無節。則其工作之堅苦。自不足怪。願以余之見。人生於世。當以求快樂爲正宗。韋勃斯脫云。快樂者。人生於世所應享之境地也。然快樂之概念。亦非一致。各隨其心理而定。此則至可怪也。英人有行商於中國者。嘗以長於貿遷。勤忍自刻。積資至無算。在其居留地之富人中。首屈一指。行年七十。猶屬鰥居。且自奉儉約。而每日操其所業。寒暑無間。若以工作自活者。然人有勸之者。曰。翁年已高。且復富有。何自苦若。是一旦鐘漏歇。則分毫不能攜。而戚屬之得遺產者。或

將浪費之而不復顧惜。其答辭之堅毅。乃殊足表此翁之性質。其言曰。積貯金元與鈔票。爲余所酷嗜。聽金元之聲。數鈔票之數。能使余怡然自樂。苟戚屬之繼承余產者。以浪用爲樂。則其用之之樂。當不減於余積貯之時。余知彼等亦必歡迎承受之也。世間人同於此翁之言者。以余思之。當不甚夥。余嘗勸紐約某巨富以息肩。俾其子承繼其所業。其答辭云。非有所貪而不願止。特以一生習於所業。一日作輟。則中心不怡。每日常事。其樂至永。非他物所可奪也。世每有康強之人。以退職之故而致死亡者。蓋生命之存在。不僅關於身體之健康。必求其心有所係。屬營業時。心有所係。迨一退職。則心思虛無。所屬心死。而身隨之矣。故快樂之概念。各隨其境地。學問及所處之風土。爲轉移。而統之於其個人之趨向。然要不可純以自利爲主。或害及己身。知識身體上之健康。阻礙精神上之活動。且并以之而侵及他人之利益也。

### 第七章 自由與平等

東方民族久處專制政體之下。惟知君上爲神聖。不可侵犯。自由平等之說。未之或聞。一旦涉足美洲。耳聞目見。無一不頓改前觀。行動言論。均可自由。試披覽報紙。對於當道之稱職與否。率皆任意評論。無所忌諱。居之既久。始知美乃自由發生之地。英雄崛起。

起之邦。人民無束縛。種族無階級。有非他國所可同日語者。總統居無上之地位。爲一國之首領。而偶有違法舉動。亦必受高級法院之裁判。與平民無以異。惟不多觀耳。腐美僑民濡染既久。性質恆默。爲之移作此間。樂不復思蜀之想者比比然也。美國兒童入學。其開始所授之課。即憲法上所規定之一人民一律平等。無階級。無種族。無派別。同隸美國之土。即同爲自由之民。一數語成人以後。遂永留此種觀念於腦海。而莫之能奪矣。

自林肯釋奴問題奏效後。美國遂無奴隸之迹。曾掛名奴籍者。一至美國。即恢復其身體上之自由。無有能摧殘之者。他國之政治。宗教。犯均視此爲逋逃藪。每年內如猶太及他種人之欲享信教自由權。而徙居於美者。不知凡幾。英雖爲信教自由之邦。然君主原隸何教。何派。終其身不能變易。美則總統信從何教。並不加以限制。如前任總統爲浸會派。或獨神派。而繼起者。乃欲改變所奉之教。無論爲猶太教。回教。孔教。均可從其心之所欲也。昔有數猶太人居美國之顯職。歷任總長。足爲美國無宗教。上及種族上派別之明證。此蓋根據合衆國憲法第七條規定之一人民爲官吏。爲商賈。不得因宗教之不同。而加以限制。並不得因宗教之有無。援爲一種資格。一數語而然也。

自由平等。美人視爲第二生命。既如上述。茲更以他事證之。當益信美國國民能自尊。其品格以求脗合乎自由平等之旨也。昔英國公爵某氏。人曾詢之曰。設君貴爲中國之君主。惟須永居皇宮。不出都門一步。君願之否。彼乃答曰。一此等最高之位置。羨之者固大有人。而余則不願受此無形之禁錮也。一夫王國之民。猶知崇尚自由。遑論習聞共和政體之美民乎。美京大理院法官某氏。余素識也。曾語余云。彼膝除上帝外。未曾爲他人屈。美人能盡如某法官之所爲。余不敢必。因嘗見少年求婚時。有屈膝以冀彼美之承認者。或夫婦反目時。有屈膝以求釋前嫌者。但此等舉動。究不當與奴顏婢膝之行爲等量。而齊觀。僅對於處同等地位者。有所請求而出之。惟某法官之意。則凡有屈膝以求人者。彼終不表示贊同也。

美國崇尚平等自由。故於階級制度深惡而痛絕之。遍歷其境。未見事物之有以等第判者。如鐵路火車。在歐洲亦分頭二等及三等。美則無之花車。睡車內容華麗絕倫。外面則除花車睡車等字樣外。並無等級之標明。出資如定例。即盡人可乘。惟美國南部情形。不無稍異。黑白兩種人所乘車輛。劃若鴻溝。不稍混淆。一日余至某車站。見客房二。一盡白種人坐。一盡黑種人坐。苦力肩余之行李。入白種人所坐之室。此時余心中。

頗惶惑不自安。因余明明屬黃種。介黑白二色之間。幾疑無適合之坐位也。若街市電車。則並無限制。無分男女。人種及等級。均同乘一車。常見勞働工人。破冠敝履。與錦衣華服者。聯座或與閨秀名姝相促膝。即各長官之眷屬。坐於工人之側。亦不以爲恥。他國公使及大使之置身其地者。亦與之同化。而自忘其尊嚴。在歐洲境內。凡各國使臣。必高車駟馬。御者揚鞭招搖過市。美則未之見也。英國已故駐美公使 Lord Paunce-  
lote 氏有事謁美之外交部。亦乘電車而往。余在美時。曾仿行之。然中國大員之曾作美游者。見之詫爲奇事。返國後。控諸北京政府。以余爲自忘尊榮。有失國體之數人。內亦有具新智識。而明於美之風俗習慣者。不意竟聯名控余。斯誠欲索解而無由矣。從大夫之後。不可徒行中國之古禮。余詎忘之。特入國當先問俗。作事尤須從衆。在美而高車駟馬。美人必目爲無謂之耗費。欲以求榮。適取辱耳。使臣銜命出疆。當先與彼國之民情相融洽。高自位置。必反形隔膜。彼此感情。何由而生。風俗人情。何由而悉。自命爲外交能手者。當不以讐言視之也。在歐洲各都會。風尚稍異。外交官喜講體制。一切服御。必求美觀。然余在英時。亦曾見居高位之 Lord Salisbury 氏。步行於道。可見此等自由行動。出於人之志願。非可強制。各國同然。美乃尤甚。猶憶某日。白宮開跳舞會。蒞

會婦女有御常服者有作男裝者(Dr. Mary Walker作此裝束)蓋就美之習俗而論固不得以放浪不羈譏之亦屬於行動自由範圍以內者也

在自由最發達之美國人人心目中必以爲其民隨時隨地可以使其自由權而非他國之所可企及矣抑知事實上有不盡然者數年前余返自南美船泊紐約海口外四小時先有醫生上船檢驗旅客身體繼則稅關官吏搜查攜帶之行李又有管理僑民之官詢問他國人民之欲居留美土者所費時間至多不經此種手續船即不允入口旅客雖腹中極端反對而俯首順受無有敢顯之於辭色者夫醫生及稅吏之檢查於勢固不容已然究以迅速爲貴不可過於留難余曾游歷南美歐洲亞洲各地從未見有船隻進口停留若是之久者不意竟於自由之國遇之殊出意料之外矣猶憶某美婦囑余代帶一犬余託友人某君轉交事前往詢美領事領事不之允謂若實行帶往不特舊金山之海關須抽重稅且必勒令該船定泊四十日受關於瘟疫之檢查初不深信繼有他友告余謂事屬確切此舉遂寢蓋不敢輕於嘗試也竊謂海關關於國稅僑民關於戶口驗疫關於衛生立法之初固欲國與民交受其利彼海關官吏等不能體立法之本意順民情而出之於是狡黠者遂越境盜稅希爲漏網之魚謹愿者遂

忍。受。吞。聲。不。啻。籠。中。之。鳥。本。欲。利。民。適。以。擾。民。文。明。如。美。猶。不。能。免。無。惑。乎。滔。滔。者。之。天。下。皆。是。矣。

美國無貴族。因政府無權力以造成之也。然人民喜得異國之勳位。以誇耀其鄉里。受此勳位時。必經本國議會之承認。不能如己意而行之。猶帝國臣民得他國之勳章。必經君主之許可。此亦美國於事實上不能純粹平等自由之確證也。凡在美有榮典及官銜之人。美人未必十分重視。然望得他國之勳章者。則數見不鮮。昔有駐於某國之使臣。得有寶星。不待本國議會之承認而私受之。蓋恐告則不得取耳。

喜新惡舊人之常情。美人普通之稱用 *Mrs.* 但習用既久。喜於進行者。遂視若尋常。而心存厭惡。因於姓名上加大將、大佐、少將、總統、法官等字。如爲律師者。加以法官之譽。置身軍界者。稱以大將、少將、籍隸海軍者。尊以司令、艦長。縱名位不符而受之者。必愉快異恆。此等銜名。美國中央政府及各省行政公署。無權力以賚與。或規定之。各出於個人之私意。且彼等欣羨歐洲各國之有公爵。有貴族。故商界中如大公司之巨東。恆稱商業大王。一若非此。則不足以高其位置而崇其名。稱者此鐵道大王、紫銅大王、烟草大王等。所以赫然出現於世界也。然此等名稱於美果適用與否。實猶待研究。彼總

統爲一國之元首而人民所用名稱高出其上當乎否乎如欲相符則總統必稱君主 Emperor 而後可竊嘗代爲籌之其利有二(一)改稱君主則元首所用之名號可不  
在人民之下與各國元首立於同等地位余聞美之總統與平民無異四年任滿仍退  
爲平民決不能如他國君主之尊榮儼異日美總統竟易名爲 Emperor 君主庶幾輕  
視總統之心可以掃除且總統之地位原與貴族國元首無異易稱帝號何不可之有  
(二)美既以民權發達號於世界如議院中能有改總統爲君主或否之權力則民權  
愈重而各國將愈致其敬仰(三)合衆國派至俄奧德各國使臣均稱大使照國際公  
法而論大使有代表之意可代表本國之元首故可享與元首親往同等之尊榮共和  
國之元首亦一公民全國之權操之於民所派大使僅代表元首之權而非代表其人  
故美國公使必爲皇帝之代表不僅爲總統之代表庶與大使之意相膺合君主之名  
反對者固多然獨不可加以新意乎英文中一字恆具數義如美國國會承認通過改  
總統爲君主僅名義上有所不同實際上並無變更如謂歷史上及論理學上君主一  
字僅爲世襲帝位者所適用余竊未之敢信敢貢私見以冀美之採納焉  
美之婚制較諸歐洲更爲通融如英在數年前曾制定妻故不得與妻之姊或妹聯姻



然叔與嫂則例所不禁與中國適成一反比例中國凡妻故後與妻之姊妹議婚風俗習慣上既極普通法律上亦所不禁致兄對於弟之未婚妻雖弟已作故亦不得蟬聯於美則二者均無不可昔吾聞美有父娶其子之妻者初甚駭異繼乃知新臺之詠於美固數見不鮮也試舉大陸報所記證之（大陸報之紀載由美傳來之消息較他報爲翔實）巴士頓二月廿四號專電云「某部部长 George C. F. 之女即 Charles A. B. 之寡婦名 Katherine, M. B. 與其翁 Frank A. B. 訂婚約」原電甚長原本因電碼不明多闕漏處譯時從畧譯者注夫翁可妻其媳換言之則子亦可於父故後而妻其母矣美國各省中曾定凡血族近親不准結婚之律余舉而臆測之覺愈研究而愈入迷途不知所謂血族及近親其限制果若何也

此等事於中國法律上限制最嚴違者亦鮮余從未聞有故意破壞婚制者猶憶某說部曾載一古事謂一年輕寡婦與其子結爲夫婦徙之遠方無有知爲母子者相居怡然歷年既久育有兒孫忽一旦爲衆窺破控諸有司有司以其違反天倫將二人及不正當所育之兒孫悉付之一炬以示懲儆此事似不可盡信或著書者欲以勸世假託而出之亦未可知設或有之則此種刑罰不免失之太酷彼所育之子孫何辜胡竟同

爲灰燼。即對於犯罪之本人所施之刑。亦過於野蠻。余所以引用此事之意。亦欲使世人知親族上奸淫其惡果曾至此耳。

平等如美無階級之可言。惟亦有不盡然者。或生富貴之家。或爲貧賤之子。富貴者襁褓中已享無窮之幸福。貧賤者則父母且自顧不暇。遑論子女哉。就人之體力與心思。言或爲上智。或爲下愚。或則具賁育之勇。或則無縛雞之力。是社會固有之階級。有非人力所能破除者。美國於此種問題。吾不知有如何之確解。惟吾國則恆付諸因果之說。欲觀今世果前世作者是欲知後世果。今生作者是古今確守莫之能易。然平等之說。有益於國家社會。實匪淺鮮。使人知獨立而不生依賴之心。凡昔人荒謬之言論。可舉而廓清之。蓋有獨立之心。則昔人已謬誤於前者。必不膠執而盲從之。美術之發明。科學之進步。工藝之振興。商業之擴充。胥由於此。如美之紐約芝加哥二埠。不數年間。臻於繁盛。非皆恃獨立之精神以經營之者乎。在人民不知自由之國。行動輒多阻礙。宜其安居而不求進取。以知命樂天爲高品矣。

美國加利福尼亞省之憲法。統省人民均自由獨立。惟就其地方情形論之。亦有可議之點。加省工業最發達。工黨之勢力至鉅。當地人民悉聽工黨領袖之指揮。投票選舉。

尤須視領袖之意旨。若何黨會沿相傳之習。無有敢獨標新諦者。所定規則。世守勿替。具獨立之性者。似不應若此。且既云獨立。何以衣服必採取巴黎流行之式乎。何以家庭。中非丈夫受制於婦女。即婦女服從男子之命令乎。至對於金錢重視者。尤多畢生之精神。自由半爲謀利而消失目的。既達能享者。實寡甘心爲金錢之奴隸。何以自命爲平等自由者。亦爲之而不疑耶。夫善良之社會。當先服從有益於公衆之法律。家庭之內。互相謙讓。自有雍睦之氣象。人類之有法律。所以保護人民身體上及財產上之自由。苟能遵守。則互享和平之福。而平等自由之本旨。乃得就美之情勢。而論雖多可議之處。而其爲後起中突進諸國之一。則可斷言也。

## 第八章 禮儀

美人之禮儀。若何余已屢言之。然缺而不備。簡而失當。有難掩者。人每謂美人之行動。舉止不中禮節。確否雖不敢遽必。而歐洲外交家。因美之不講禮節。遂不願蒞其境者。頗有所聞。中國禮儀。號稱完備。禮記一書言之綦詳。人於少年時。卽已銘刻於心。然議者亦頗多。吾人於總角時。已熟聞人之譏爲繁雜。但因禮儀之繁雜。而生裹足之心。則未嘗聞也。雖謂過猶不及。厥弊維均。乃過繁者。猶未致見棄於人。兩者相衡。吾國不仍

較勝一籌乎。

美人性多抗爽。人有善面稱之。人有過面斥之心。有所觸言。卽隨之譽之。不爲詔毀之。不爲謗於英。則大相反。英人對於個人之行爲。緘若金。人不輕加評論。蓋譏恐人之視爲孟浪。譽恐人之視爲諂媚也。如對於他國人之能知英語者。致其敬意。時語前必祈人原宥。而預爲請罪。其審慎可知矣。美與英有密切之關係。而不同之處。難以指計於行爲上。更顯有特異之點。英之殖民於異土也。其言語禮儀。恆棄其母國。而從其所至之地。加拿大近於美。於氣候上。歷史上。地理上。兩相混合。其同化也。固宜。乃不特加拿大爲然。卽南非洲。新金山。各地相距絕遠。與美亦有風馬牛不相及之勢。而風尙實不相逕庭。於此可見英之僑民。無論至寒帶熱帶。南極北極。於母國之情狀。日以異。而對於他殖民地之舉動。及互趨於一致也。

美人之抗爽。不特言語爲然。卽言語時之形狀亦然。欲言其人。卽直言之。從未有迂曲其詞。而駢生枝節者。其謁人也。至卽發言。畢言卽去。且簡括明晰。罕與倫比。較諸吾國之賓主相應對。截然不同。吾國凡賓主相遇時。必有無謂之套語。泛論天氣。暢言政治。互談交際。於所以相見之目的。反置之腦後。空談既畢。始及目的。言語時。又必互相謙

遜彼此交譽。此等酬應。在吾國固視爲長於交際。善於談鋒。惟使性急之美人。遇之必有痛心疾首以拒之者矣。但議論風生於素不相識者。面晤時亦未嘗無益。可互通性情。變爲知己。不致枯坐而窘於詞。昔有某領事者。代本國之民控訴於道署。某道接見如儀。且詳詢底蘊。懇切和藹。彼見某道之不憚煩勞。卽勸其民自行和解。注消訟事。以爲勿再勞此賢長官之舌。敝唇焦也。美人之目的及習慣。惟在節省時間。鐵路之須繞河而行者。恆於河底築隧道。費銀達數百萬。亦所不惜。因繞河而行。須多費二三分鐘之時間。故寧出此絕大之代價耳。觀於此。則美人言語之直捷了當。固毋庸深疑矣。但以事實論。吾仍不能不有所私議也。美人既不肯費時間於言語。時何以發語。時恆遲緩。其辭令人不耐耶。彼等言語時。於音之高下重濁。不涉苟且停頓尤多。其時則長短不等。如爲人述一古事。往往詞未告畢而發言時。所云者已令人難於回溯。英人言語之速率。倍於美人。儻美人言語與英相等。則每日所省之時。不更多耶。美如仿而行之。獲益必多。就經濟學言。較諸費巨資築隧道。其所得之利益。必有不可相提並論者。余因美人有節省金錢之癖。故敢貢愚見。美人其亦俯納否耶。

人之感覺最靈好勝之心亦所同具。數年前某處開大宴會。公議路過之某達官。吾國

有長於交際之某君與焉。雖廁於高朋之列。而座位則居第三。居首座者之身分。反不若某之尊。某君因居於其下。心滋不懌。不列席而去。美人感覺之力。尤強於中國。微文末節。偶有不周。亦能知之。然度量寬宏。未嘗因之。而斤斤宴會時。因位置之高下。而啟爭端者。吾未之聞。此不可謂非美之良俗也。美人恆遵守其獨立時之宣言書。宣言書之大綱。即「人類平等」四字。但所謂平等者。僅用於社會上人與人之交接。若法律上所承認固有之權利。則從未有自甘放棄。或故爲侵佔者。美之儀制。不特於名位相同之人。可顯其平等。即總統之於公民。主人之與傭僕。父母之於子女。股東之於店夥。除應行之恭敬及順從。與應受之恭敬及順從。彼此各遵守不逾外。卽一律平等。再無他種之儀制。以束縛之。此誠足以改革舊世界之陋俗。及觀念。而爲新世界所獨具之優點也。美爲新造之邦。多強毅有志之士。有鑒於舊時階級之說。牢不可破。受錮者衆。故於改革政治後。遂繼以改革社會。舊染之汚除。而新闢之徑成。蓋亦非一朝一夕。一手足之烈矣。致因省時刻。而遂簡其禮節。則爲美人特創之見。古人以寸金喻寸陰。時間之寶貴。固盡人而知之。然如美人之對於省時間問題。遂發生迥異於人之僻舉。殆亦所謂矯枉而過其正者歟。美人之意。以爲最可貴之時間。當行

之於有益之事件不當費之於過繁之儀制故美人中知儀禮之有益於人類而不可忽視者亦頗有之惟不若吾國之重視耳吾國之重視禮儀殆猶外人之重視宗教也美國未成人之人染祖傳之遺習故幼時卽知與父母平等父母亦以平等視之而與以完全之自由權中國則不然子女之於父母敬而不違勞而不怨服從父母之命如軍士之服從官長美則爲父母者必以服從之義爲子女詳解之使知服從云者非服從父母指公理而言凡事之有利益而理由正當者則服從之夫教育兒童爲異日成人之基幼時腦力薄弱一有所觸至易深印故美國兒童恆於賓客前矯正其父母之非事後絕無追悔之心爲父母者亦樂聞而順受之或更表示其感謝之心子女聞父母談論古事苟對於時日地點事實有自以爲是者可大聲以駁斥其父母之非父母則顧之而樂獎勵有加使吾國之爲父母者聞之不將深致駭異耶吾國古禮長者未有命少者不敢言侍父母之旁而言語任意攙越必目爲不知禮前清時中國官場亦有類於此上司有意思表示僚屬雖深知其誤心不贊同亦不能面斥其非否則自居於不敬之列矣昔余謁見當道某公因余不隨衆唯諾致大遭申斥事後私命余往且慰之曰爾意余甚嘉納惟不當於大庭廣衆中斥余之非以後宜知所戒云云綜以上

二者論之美與吾國實各有所偏。過猶不及。互相補救。則各得其宜矣。吾人對於美之社會風俗。當採其自由之精神。注意於普通人民。各能獨立之原質。遺其短而取其長。庶乎免於流弊矣。

美雖受僱於人之傭僕。亦不失其遺傳之特質。特質惟何。平等是也。存平等之觀念。故如吾國之忠僕義僕等。於美未之見也。惟有數優點。爲各國傭僕所萬難企及者。身爲下人。亦知與其主平等。無自卑自賤之態。主人出金錢。以得勞力。我出勞力。以易金錢。苟出於契約之外。卽兩不關涉。彼此同居。公民地位。法律上亦承認之。勞力之。女僕與僱僕之。女主無稍差別。故不加以奴僕之名。呼爲助理人。猶之加拿大。新金山。不稱英之殖民地。而仍與以自由權。其意同也。奴僕之風。吾國至今未能掃除。舊俗之深。中於人於此。可見爲奴僕者。多視爲專門之業。服從之外。無所知他種之營業。非所望。雖稍有才智者。亦思改就他事。然束縛於陳舊之見。壯志銷而欲望亦不敢奢。能升爲管家。領袖羣奴。已十分滿志。不再他求。美則不然。質言之。美實無所謂奴僕。偶時受僱。暫而不常斷。無以奴僕爲事業。而終其身者。以爲受人之指揮。不特名分上較主人爲卑。且消失公民之資格。有違平等之本旨。故一有機遇。必辭而之。他暫時屈辱。不過爲異日。



進身之階。耳人見美之傭僕不能與他國相等。可不。必。不。以。爲。然。須。知。彼。非。不。敬。其。主。亦。存。有。不。甘。自。棄。之。心。望。後。日。之。得。以。自。立。耳。

美國憲法上於封爵絕對禁止。尊號則偶有之。Honorable 用於國會議員。Excellency 用於總統大使。但用者絕少。因加有尊號則與美之平民政體不相符。余就外交上之習慣及先例。稱美總統爲“Your Excellency”但總統頗不以爲然。囑以“Mr. President”代之。Mr.之稱呼在平民政體之美民視之一若較他種稱呼爲尤相宜。故對於總統稱 Mr. 對於總統之御者亦稱以 Mr. 有時則逕稱其名如“John Smith”原可於名字上加尊號者即僅稱其名亦不以爲怪也。社會上有名望之人並不拒絕綽號。設於名字上加以美人公衆所歡迎之“Teddy Bear”二字。必受之而不辭。此等事實蓋仍原於美人喜平等獨立及節省時間之特質而然也。在明定稱呼職銜之國內除禮制館人員外恐未必能悉數明曉而毫無舛誤。乃身居高位之人他事可極含融而稱謂則必斤斤果何意耶。即深明儀禮之人知“His Serene Highness.”“His Highness.”“His Royal Highness.”“His Imperial Highness.”及“Rt Rev.”“Most Rev.”之區別。欲於倉猝之間稱人之職銜名稱。錯銖悉當。恐即禮

制館內之人亦未易辦此否則必帶一袖珍之貴族人名冊而後可繁瑣不便爲孰甚焉如遇人而稱以 *Mr.* 不問其履歷若何豈不甚便美人行之於先吾國近亦仿行之且名之前後不加職銜於本人之身分未嘗稍損若 *Mr. Gladstone* 不加伯爵或他種之尊號於姓名之上伯爵固有之尊榮豈遂因之而未減況卑以自牧謙以處世則國民敬愛之心油然而生較諸假虛名以求榮者果孰得而孰失哉

要之美之儀禮所以異於他國由人民具有二大特質所致余已於上詳述之且此二特質不特於儀禮有關卽關係於他事者亦復不少其愛自由平等由於幼時已受諄諄之訓誨不喜糜費時刻由於邦基新造不得不致力以治事全國儀制及風尚之純一正足以表明全國之確守自由平等亦趨於一致也嘗見男子行則揮手於袋息則疊膝而坐亦無非根於特別之習慣耳如必斥爲非禮過矣

世界民族如美之熱心溫和平善交實不多見事非必要余故不贅且畧知美之情勢者亦無不知之彼等對於素不相職者亦披誠相見宜人多樂與之遊矣他國雖不無善交之人而非常審慎一遇新知必不能水乳交融傾蓋如故惟相識有素則知彼亦未嘗不和藹易與耳如同乘一車聯座數小時手中報紙終終不釋蔽其面目其度態既

不示人以相親欲與之談論殊不易則亦惟有失諸交臂耳試以余之曾經親歷者證之當余肄業倫敦林剛法校時倫敦有一著名之法學藏書室備法律學生暇時自修之用余亦日蒞此處就室隅之座而坐焉座之對面亦爲一法律學生經旬未通一語初以爲由余之過於矜持因借端與之接談無如彼仍垂首不語余亦中止繼知此乃英之習慣也儻無正當之介紹人斷不輕易與人交接但余以爲墨守此習實不如從速破除之爲愈同學而相隔如陌路其如切磋磨琢之謂何

美則不然出而散步時或乘車遠行時恆有不相識者前來招呼而結納焉他國人對於異族存種族之見美則對於異邦人親密益甚此亦美之特性美人對於己國之民與他國之民固同抱平等主義未嘗存歧視之心者也

### 第九章 美國之婦女

婦女問題至難言也高材之士不敢偶涉愚昧之徒或妄肆其雌黃焉夫以至難之題而余乃謬有所論列無知妄作之評亦自知其難免然以宿與彼邦女友立有成約謂苟筆余美國之觀念者不容於婦女問題有所缺畧故雖知其難而不敢畏避以免食言之罪焉大概世間婦女可分三種喜聞諛辭一種也甘受譏評又一種也懷好奇心

而顯聞他人對彼之見解者。此又一種也。美國婦女大概不屬之前二種。而屬於第三種。以其願聞人言。故人或有公平之言。常爲彼等所樂受。且復富於進取。勇於改良。一聞其短。卽急急自改。不稍遲疑。坐是之故。余於當言之處。乃不敢稍自放棄。高坐堂皇。而爲之下評判之辭焉。美國婦女與各國特異之點。約有數端。精神活潑。一也。辭令雋妙。二也。知識豐富。三也不論何種問題。自美國婦女言之。皆能風發泉湧。不虞竭乏。是足徵其學問之博。詞采之富。卽以余個人言。得益於女友者。亦良非淺鮮。然其意見之強固。則至可駭人。余居華盛頓時。嘗有一女友。見訪於使館。談論之頃。涉及女權事。余固提倡女權。而以現今女子所享之權利爲未足者。然於數點。則良不若此女友所持之激烈。辯論至數小時。余意終未能盡洽。彼見余不能悉合其意。則以恫喝之辭恐余。謂非得完全同意。而表示服從之態度。終將固守余室不去云。

美國婦女恆有嫁異邦人者。而其男子。則絕少娶客邦之女。說者謂異邦人之娶美婦者。利其財。美國婦女之嫁客邦人者。重其爵。此亦容或有之。然尙有他故。不可不知也。美國婦女形貌之昳麗。姿態之飄逸。實有吸取外邦男子之魔力。復加以活潑之精神。淵深之學問。好高之天性。無論何種男子。皆不難降心以相從。設余初次遊美時。而爲

單身者。余亦不能自保其不爲所動也。知乎此。則美國男子之所以恆娶美婦。而其婦女多嫁異邦人者。其故亦從可知矣。當余第一次任駐美欽使時。嘗在華盛頓爲人作意外之蹇修。時適大理院長之女公子出閣。余被招觀典禮。既入餐室。見伴新女郎。及少年紳士羣集一處。女郎中有上議院議員某之女公子。係余素稔。因戲詢其何日當作新嫁娘。女郎答以不知。云時尙無求婚之人。余乃轉向羣少年中一人曰。是女殊婉戀。君有意否。少年答以甚願。余復詢女郎謂是少年求婚之辭。有允意否。女意微慍。云素昧生平之人。何能於俄頃之間。爲正當之答復。閱數日。余復於尋常家宴時。晤此女郎。大受責讓。謂不當於少年男子前。漫加調謔。余告以余實出之誠意。非謔笑也。數日後。女郎父母以柬邀余。襄觀其女之婚禮。余急欲知其新婿是否爲余所紹介。因即應召而往。至則其母告余。謂余實此新夫婦之第一紹介人。新郎新娘既見余。亦深表謝忱。不忘余作合之功也。

美國婦女品性之最卓絕者。爲獨立與自由。女子一至成年之期。即可自行之意。而不受父母之管束。女子隻身旅行。無伴媼朋友爲助。爲美國常見之事。余前自舊金山至華盛頓時。於火車中遇一女郎。年事猶在二十以下。云將至紐約乘舟赴德。入德國大

學肄業者。隻身遠行。一無伴侶。此在中國。必不能行。即在英國或其他歐洲各國。余亦不信。謂以妙齡女子。而許其獨行致遠。一無可信之朋友親故爲之伴護者也。然在美國。則視爲恆事。而毫不以爲可怪。此實其良政治之效果。故能使青年女子獨行而無所虞於強暴之或凌也。

獨立自由。二主義。其影響能使父母與兒童間之關係。因以變遷。兒童對於父母。本有孝順之天職。乃以尊重自由獨立之故。一變而爲友愛。父母之對子女。雖有至理。不願有所命令。相待之情。純如友朋。卽女郎之視其母。亦不以爲較尊之人。而甘服從其命令。恆待之若女伴焉。且美國女郎之婚姻問題。純屬自主。匪特無待乎父母之命。時并父母而不得聞之。余嘗偶與美之少年夫婦討論此點甚久。余詢其曾否得兩家父母之同意。二少年堅云勿須。謂此爲彼二人切身之事。非彼父母之事。余告以雖係二人之事。然爲慎重婚事。尊敬父母之故。亦何嘗不可於事前稟承。有所商酌。彼二人終不能與余同意。謂婚事結果。僅關於二人前途。故二人有完全自主之權云。此實可見美國獨立主義之極致。且余猶深懼二少年之談辭。非僅其孤立之意見。或爲代表全美少年之言詞也。雖美之少年。當其決意訂婚時。亦有稟承父母者。然余不知其能順從

父母之命而改其意向否。或表明其意思而求父母之承諾否。今請述中國之婚禮。中國婚制。與婚事最有關係之新夫婦。無發言之權。兩家父母。以朋友或專爲媒妁者之紹介而聯締其姻事。然於兩家兒女之人品德性地位等各要端。必細加諮詢。審慎端詳。而後聘定。有時兒女亦得預聞。然此非恆事。一經聘定。雖兒女本身。當時并未預聞。亦莫由中悔。婚約之在中國。實視爲最莊嚴之契約。迨至結婚之日。新郎新婦。十之八九爲初次晤面者。然率能靜好無間。婉戀相得。無參商之虞。離婚之事。亦極少見。蓋以兩家父母老成之見。兒女鮮有不得其偶者。余之述此。不欲以吾中國制度介諸美國也。特以明美國獨立主義。由少年男女自行擇偶者。其婚約誓言。恆不能得圓滿之結果。不慎於始。鮮克善終。蓋女子一入情網。每墮愛而不能辨別其所鍾愛者之短處。迨結婚數月。始行覺察。則已追悔莫及矣。設於締婚以前。預商其母。使以其老成之見。爲之審慎端察。則後日之悔。當可獲免。故余以爲本身自由選擇之權。固不容有所干涉。然苟美之少年人。能於其訂婚之前。預告其母。使之詳慎其意。中人之品性地位。而爲旁觀者之考察。則裨益於少年夫婦。後日之幸福者。當不在小。父母無不愛其子女。而爲之計畫將來者。故對其子若女之終身問題。必能爲公正無私之判斷。而爲之擇一。

良好之伴侶。若美國少年能於此點有所覺悟。則配偶非人中道乖離之事。當可決其日減也。余嘗以此說與前述二少年反覆討論。彼終不能有所領悟。則其愛情也。亦可謂之盲愛而已矣。上所述中國婚制。奉行已至數千年。顧自晚近新學說流入。亦漸變更其故轍。少年男女羣起而爭婚姻自由之權。不願其家長之獨行把持而無所商酌。然中國女子之自擇其夫者。固不皆以閏年行之也。惟以余之見。終不願吾青年傳染美法。雖若自由而弊竇滋多也。（西俗逢閏則閏女之婚配倍多）

美國人子對待父母之道。實與吾中國古昔相傳之理大相逕庭。敬重父母爲摩西十誡之一。而爲一般耶教徒所當遵守。然由孔子之徒觀之。則此說殊不必成立。蓋孔子之義。人子於父母。不特當尊敬而順從之。且有服勞奉養之天職。誠以父母既鞠育兒童。以至成人。以教以養。以立於世。則子女對於父母。自當有反哺之思。以酬其劬勞。然美國人對於此問題之見解。則深足令余駭異。嘗聞某少年解釋父子間之關係云。父母生彼。未嘗得其同意。故父母對之當盡其撫養教育之職分。若奉養父母則殊非其職分內事。莊肅其辭。若極鄭重。苟在中國。是等子弟。必爲衆人所鄙棄。人子而不知奉養其父母。則刑戮隨之矣。其父敢謂此少年之極端見解。爲美國普通人所同認。然以



余觀之。美國人民之對待其父母。終覺有所未當也。卽美人之爲人父母者。亦不望其子女之奉養。蓋其普通人之境遇。雖非富有。大概足以自給。且卽至饗殮不繼。亦寧自食其力。不願使子女擔負重責。而因以阻礙其進行。雖余觀察容有未周。然大率美國少年。無奉養父母之事。顧余嘗得一例外焉。華盛頓上議院議員某君。少年英俊。以辯才聞於時。奉其老父同居。父年八十。雖復老健。而跛其一足。故依其子。人有告余者。謂少年夫婦之待老人。極盡敬養之忱云。美國少年之能敬愛父母者。固亦不乏其人。然以之爲恩誼。而不視若天職。且相待之忱。純若敵體。不以父母爲較尊。子女一成家室。雖年事尙稚。一無閱歷。亦必離其父母而獨居。庶可以自由行動。而不受其父母若翁姑之管束。卽父母亦不以新夫婦之析居爲不然。蓋可由之而使得治家之實踐也。新婦多不願與姑同居。若必須老成人爲之指導。則恆迎其母。亦美國習見之風也。美國婦女。大率志願高。而擅才藝。故恆不難謀一職業。不獨商業場中。多女子營業之所。卽各項職業。亦無不有之。美國各店舖中。如司賬書記（俗謂寫字）等職。幾無一無女子者。且其任事之才能。時或較男子爲勝。卽學藝之林。亦常有男女角逐之事。年前某州有一檢察長缺出。候補當選者二人。一爲男子。其一則青年之女律師也。二人皆

有當選之望。選舉票數。男子略佔多數。然至終結。則女律師大獲勝利。蓋此競逐之二人。未幾即成夫婦。結婚以後。女律師因得實際執行其夫之職務。數年以後。其夫任滿就農。終由女律師繼續其職。是可見美國女子之才能。雖非較勝於男子。要能無所懸殊也。美國婦女。談鋒甚健。率爲能言舌辯之人。余嘗於公共會場。聞一女演說家說公共問題。其詞源之妙。理論之長。實爲余畢生所未聞。且彼中亦多長於著作之流。如韋爾考克斯夫人。如漢特森夫人。如湯痕夫人等。皆以文學優長。有名於世。其所著述。率有精深之見。優美之思。以餉吾人。是等女子。才智既優。自不甘屈伏人下。且在閨時。已廣張勢力。成婚以後。更恆有憎服其夫之勢。而爲之夫者。又皆能恭順將命。甘受其指揮。而不以雌伏爲羞。蓋智能服人。於理固爾。世之爲人婦而怨其夫之桀敖難制者。盍亦取法於美之女子乎。以歐美婦女比較而言之。美之女子。於活潑靈巧辯才上。較歐爲優。柔順則不及。故於社會交際中。爲歐爲美。不難一辨而知。惟若美國女子。嫁異邦人而久居他國。則恆失其本有之特性。余嘗於航海時。與一美國女士同行。以其品性之柔順。余初以爲英人。後知其固生長於美。因嫁一英人而移居英國者。

美國女子之劣點。則其專喜探聽是也。此雖爲一般婦女之通性。然於美爲尤甚。美國

女子大抵能刺取人之隱事於不知不覺之間。苟其立意欲知一人之歷史。則立談之頃。即能有所覺悟。故余謂美之女子。皆偵探才。設能用於此途。當必有明效可呈。一民族之名譽。大率係於其婦女之品性。蓋婦女之數。佔全族之半。而母教所及關係尤巨。若以此點而言。美國民族之榮譽。實高出他國之上。美之婦女。活潑誠心。優於才智。且復臨事不懼。獨立不撓。和易可親。無間貴賤。然苟有誤解。美國女子高尙純潔之操。而欲行非禮。則實屬大謬。異邦人對於美之女子。恆易誤會。尤以東方人爲甚。數年前余嘗爲一吾國人指迷。彼蓋於一女友之情。惘有所誤會云。夫美國女子。自少及長。均與男子同校。且社會交際。男女無別。行動自由。無所限止。則其較他國女子爲個儻不羈者。固屬理所必然。自其舉動言之。雖若近於男子。然以卑下粗暴之思言之。則相去之遙。固不啻南極北極之間也。中國婦女。操守之純潔。不下於美國。顧致之之途。則大異。內言不出。外言不入。閫教之嚴。實不容男女有接觸之餘地。更何言交際。然譬之於鳥。久困籠中。不見天日。一旦藩籬盡抉。則高飛遠舉。容或一去不歸。若育之既馴。自來自去。機猜悉忘。則早出晚歸。尠至遁失。使吾國婦女得多享自由。雖不致有玷辱之行。然欲其能悉如美人。則尙有待夫教育之功也。

## 第十章 美國之服制

何謂時行時行者萬惡之魔淵也。惡魔之芻狗人類也。時行爲其披堅執銳之先鋒。奴役人之心思剝奪人之自由無貴無賤無老無少胥服役於其威權之下而莫敢或叛。帝主之威嚴尙或有不臣之人若時行之令則率天下之人莫敢不遵。每季必有其新出之制令。上季所行下季又易。雖盡陸離詭異之致而天下之人靡然從風。譬之於冠。數年以前寡婦之冠徑逾三尺進而愈大則其爲時行也亦愈甚。終至戴冠而行不能逾戶限。繼此而行者爲烏羽之冠。夫冠飾烏羽何足爲美而變本加厲者且以死鳥加之冠上。此尤可笑之甚者也。禁止虐待禽獸會宜於此問題加以討論而制止以羽傷禽者。俾明定律法制止羽冠之制。解之者曰。人以求食故而殺禽獸則又何嘗不可以死鳥加之冠上。此語也。蓋尤愚蠢無意之甚者。全美之人雖迄今猶多信肉類爲必需之食者。然曾亦有人云。及死鳥於冠爲不可分離之服飾者耶。且人類之有衣服也。果何居乎。以余思之。避寒煖爲第一義。求安適爲第二義。合儀式爲第三義。形美觀爲第四義。今美人之服式其果合於以上諸義耶。第一以氣候言。美國女子之服爲能避寒氣耶。受寒而致疾者日不知其凡幾。因亦有致疑其衣服之不良者。全身所被厚薄不

勻時俗所尚。上部恆若裸體。卽有所服。其薄已甚。微風乍起。或天氣驟更。苟非體質健全。足抵禦外界之危險者。鮮有不以缺乏衣服之故而感冒寒疾。是非特不能保護。且并足傷害其身體焉。下所引倫敦太晤士報之說載。實足爲女界之警鐘。一勃臘特福特之暴風。其結果乃致一女郎暴死。女郎名馬利倍蕾。爲某電機師之女。年十六歲。肄業於漢孫中學。當暴風起時。適在校外場上。狂飈捲地。吹衣裙作雨傘形。因舉入空際。離地約二十尺。始行下墜。受傷甚重。半小時後。卽行斃命。云。一設此不幸女子。而服中國衣者。可決其免此危險。而不致虛擲其生命於無爲也。由第二義言之。服時行之衣者。又未見其能安適也。普通婦女所御不衷之服。姑不置論。卽以束腰之腰圍言之。束縛腰支。氣逼不舒。寧特去安適之義甚遠。且至不便。簡言之。實不殊爲永久之桎梏。而戕害身體之健康。故苟腰圍及束縛腰支之具除。則美國婦女死亡之率。必可大減。世之醫學家。當不河漢斯言。且余嘗聞跳舞室中。有因束腰過緊。而致孕婦於死亡者。是則尤束腰直接之害矣。以言第三義。美之時服。又未能雅合乎儀式也。一此言美國實已含歐洲各國。蓋歐美固同式也。一此或係於教育之故。若自東方人觀之。則女子衣服。以寬爲上。庶形狀不致高聳可異。然美之友人。必不以余斯言爲然也。甲國以爲可

異者。乙國或以爲當然。炎夏六月。江蘇工作之婦女。以怯熱之故。恆裸其上體。舍抹胸而外。一無所服。西方婦女。則雖至熱之天。斷不作裸體之想。然在隆冬之際。晏會戲園跳舞等事。則恆露其肩胸。低至乳際。不以爲冷。此在東方。又爲可詫。昔香港有杵米者。以便於工作之故。赤其全身。僅於腰際蔽一圍布。乃以猥褻無禮之罪名。爲警廳所逮捕。罰鍰二元。否則拘禁七日。當科罰之時。英之行政官。嚴加訓飭。謂赤身露體。不當見之文明之域。非特無禮。且極蠻野。杵米者云。彼恆見西土婦女於跳舞會時。亦作此裝束。云蓋羞恥之心。純根於習慣。由有閱歷之考察家言之。樵樸之生。番終身不知有衣服者。被以錦繡。反至忸怩不安。亦猶文化之民。露體而至通衢。必將無地自容也。其言曰。一衣服之起原。非由於羞恥。羞恥實由習慣而生。人類之有衣服。苟非以保衛寒暖之故。卽因男女之各欲自飾。而然。一旦半穿衣服者。其狀又倍醜於裸體。雖於理似奇。而實際觀之。固爾爾也。以言第四義衣服爲美觀也。然美觀要以無害爲主。不獨求服之者己身之無害。必亦求無害於他人。然由下引日報之文觀之。則美之服式。又未必然也。五月初七倫敦日報。昨日浙歇埃省某股票商之女。因帽針穿入鼻管。傳染血毒而亡。女郎名馬利愛立薩伯桑敢。年二十四歲。其父爲股票商。語人云。四月二十日星

期六晚。其女與女友辟克福特夫人在店外閒話。明日即云鼻痛。是後連嚏鼻痛。云爲帽針所傷。且言當晚與辟克福特夫人共話時。夫人小孩顛躓道旁。二人共俯身攙取。乃爲辟夫人帽針刺入鼻管。因成重症。於上星期六隕命。辟克福特夫人爲紙商之妻。云當死者拾取小孩後數分鐘。告以曾爲帽針刺入鼻管。辟夫人上堂時。亦戴此針。針長十二寸。鋒出於帽者可二寸。好威司密斯醫士云。敗血炎症。率由傷口傳入。因染及神經而成腦膜炎。驗尸官云。由帽針直接致死者。雖不恆見。然帽針所生之禍患則實不少。多有傷及眼珠而致盲目者。夫帽針之鋒出於帽者。恆至三四寸之長。此豈非至可懼者耶。漢堡婦女之帽針。律法限定其有保護針鋒之物。英國於帽針。別無限制之法。因常有危險之事發生。設婦女之帶帽針者。強迫其必須連帶護針之物。則損害旁人之事。當可因以絕止。陪審官判此事爲誤殺。且發表其意見云。嗣後長帽針當將針鋒保護或斷去云。

夫戴項圈。佩寶石。珠飾滿頭。綢帶絡髮。此誠足爲適觀之美飾。若長裙曳地。則美於何有。然歐美婦女。別有見解。其美麗之觀念。恆若以裙之長短爲比者。跳舞晏會之時。欲不觸及婦女之長裙。蓋大屬難事。若衣禮服時。尤須以二侍者夾持衣裙。此誠爲東方

人所大惑不解者也。夫裙爲裳衣之一。單諸褻服之外。斷不因其式樣而生何種之快感。且裙式之變更。又不能增服者之美麗。若霍勃爾式之裙。則徒足使兩足之行動受其妨礙而已。步武之時。必極其謹慎。跳舞之時。尤必拽起之。而後可行。否則一舉足而傾跌隨之矣。新行之司拉許式裙。較爲便利。裙緣亦可稍形清潔。然時行不久。其後更必有新奇之式樣。繼之而興。可斷言也。吾國留美女醫生某。當其在美時。亦易美服。迨一回國。卽衣本國之衣。其評論西方之文明曰。一吾人服中國之衣。並非膠守陳見。以中國衣服與歐西各國較。於理自有較勝之點。譬如吾國女子所服之襖。開其一邊。肢體胥可自由行動。毫無束縛之病。較之巴黎時行之裙。其安適便利。自不可同日語。故設歐西服式。而有便於吾人者。吾人亦不難舍己之短。以從人之長也。一旦以余觀之。美麗適觀。不過爲教育上之事。苟至奇極怪之事。而日與目相習。積久以後。自不能辨別其差異之點。當余初至外國時。見少女之往來街市者。類皆披髮於肩。頗以爲異。謂其父母何不經意。若是。乃不爲其兒女櫛沐。後知其爲時行之裝束。則心理漸變。積而久之。且以爲美觀矣。是可見習慣之能轉移人心也。然無論何種習慣。苟其違戾自然。或妨害肢體之自由行動者。斷不能謂爲美觀也。歐美婦女夙以勇於進取。急於改良。



名乃對於邪侈有害之服飾。獨不思革新之法。夫時行習俗之拘繫。猶不能脫然自解。則欲享男子同等之權。又安可得哉。女子之服。固如此矣。而男子之服。亦初不能較高。於婦女式樣狹小。緊縛身體。使服之者受過分之熱氣。暑熱之症。大率因之而起。美國女子名渥爾克馬利者。近已改其服式作男子裝。余不能不佩其膽略之宏。然以其獨立進取之精神。何不竟創一較佳之服式。而仍拘拘於男子之衣。則仍五十步百步之殊耳。由余之經驗言之。當余初至英國學律時。亦因英國友人之敦促。棄華服而易西裝。然未幾即覺其不便。冬日過薄而不暖。夏日過緊而太熱。所穿革履。困余尤甚。足指駢而跣疣生。迨至回國。易余故服。跣疣盡去。寒疾亦不作。余非謂中國服制完全無缺。特以余之見。較之美國時行之式。不獨安適。且更美觀。即於世界各國衣服中。亦當首屈一指。若有疑余言者。苟一試服。當信余言之非謬也。且衣服爲適體而設。要不當以此拘束身體之自由行動。亦不可過緊而致妨害血脈之流通。阻礙汗液之分泌。以美國人之聰明慎慮。而於服飾一端。則不顧身體之安適。此真余所百思而莫得其解者。夫事之關係最巨者。莫如一己身體上之健康問題。美人所御之衣。既不便於行動。又妨害其衛生。乃仍因循不改。其事不亦大可異乎。且美人非所謂自由之民乎。日宛轉

於時行命令之下而莫敢或叛。衣服之賈挾時行之令以詔世人。新式之興層轉靡已。賈者於以獲大利而普通人則從命不敢抗。此又安得爲自由者。美之人欲恢復其自由者。盍亦攘臂而興以與時行抗乎。余今欲以中國衣制紹介於美人。不可謂非放膽之辭。且有似乎鹵莽。然苟或見採。余敢決其必有明效。且世界各國衣服之制。既若是其相殊。何不聚萬國之人而會議之。以定普天下公同之服式。萃各式之男女服制。合各國之男女議士。於以共同討論。決定最佳之式。以爲天下男若女所共遵。服制既同。利益之因以增進者。必不在少。昔見異服之人。一市之人必從而指目之。旣歸一律。此弊可除。且以同服之故。交互間之友誼。必可日就增加。益形親睦。余深信此一得之愚。必能邀美人之宏議。數年以後。或將見之於實行也。

### 第十一章 中國之文化上

中國文化廣博而無涯。類別詳陳。非專書不爲功。亦斷非區區短章所可盡。故此章所述。特如東鱗西爪。使讀者於此略見一斑。欲審其詳。有專書在今。欲述文化。當先明文化之爲何物。韋勃斯脫之言曰：「文明者。進化之動作也。進化之氣象也。名教之歸。雍穆純美之風尚也。」懷勒斯之言曰：「文化之源。肇端於禽獸之始馴。惟其馴也。爲禽

獸之自馴歟。抑由人之馴之歟。則模稜而未判。然於義觀之。兩者皆適。蓋文化始肇。教育始開。則動物由野進文之期也。培克有言曰。吾人之儀節文化。及其他種種係屬於儀節文化之善事。於歐洲大陸上。實連繫於二大精神中。一曰君子之精神。二曰宗教之精神。余常聞西方人自稱爲高等文明人矣。雖有數點。似能無愧於此稱。然不知其於培克之言。能悉安之而不疑乎。凡其舉止行動。誠能盡善盡美。而足爲所謂半開化人之模範者乎。其無乃亦有偏僻自私之舉。爲半開化人所羞道者也。余知讀者諸君。要皆能辨別之。而自爲鏡證。顧余仍欲引吾中國人所詮釋之眞文明人格以解文明。中國文明人之規模。一曰守身如玉。謂潔其身如寶玉然。勿使道德心靈上有絲微之污點。又曰食無求飽。居無求安。謂對於實體各事。適可而止。不當沈溺於其中。孔子曰。暴虎馮河。死而無悔者。吾不與也。謂不當以無益之事自戕其生。又曰寧使雪中送炭。不願錦上添花。謂君子施與。當周人之急。不當繼人之富。中國之大英雄。惟在光耀其德。故成湯自銘其盤曰。日日新。又日新。故中國之有君。其意在一國之律法。由人君作之。則人民胥於以奉行之者也。

文化亦如宗教。肇始於東土。而流傳以至西方者也。當歐美文化未關。土酋部落迭相

雄長之時。東土各古國。如中國等。其政教文化儀節。優出於西方者。已無慮什百倍。而藝術物理。且爲西方人所未及聞。自存自利之心。役使人類。周轉靡已。東土之人。漸就西展。因挾其文化。灌溉西方。西方人民。日與相接。乃得受東土之所傳。東西相接。而西方文化。於以誕生。以漸得揚其波焉。中國古諺有之曰。青出於藍。而勝於藍。以譬弟之勝師。若以今日之東西文化較。則藍之於青也。蓋文學藝術等。雖導源於東土。而發揚推闡。則功在西方。及至今日。已儼然勝師之弟。余甚欲得一弟勝於師。而師仍勝弟之成語。迄不可得。此或表今日之猶非其時。然不可謂因此而并無其事也。

以言西方之文化。余深佩美人之二特性。一曰專心。二曰堅忍。當其立意成一事時。無論其爲發明一新事物。或解釋一難問題。率瘁其心力。而又副之以堅忍。如愛笛生君（愛笛生爲電學家。泰斗電燈電話等皆其所發明）當其專心思慮時。終日伏處廠中。不稍旁騖。恆至寢食俱忘。此正如吾先哲孔子在齊聞韶之時。三月不知肉味。其專心堅忍。爲何如也。飛行家膽力之豪。尤爲可貴。此不獨美國爲然。歐洲各國。莫不如此。航空而行。偶有不測。卽易損命。而航行與製造者。仍一致進行。不稍畏卻。夫以若是之堅忍專一。而又副以才智。飛艇飛船之航行。將不難歸於平穩。余深企其早日成功。俾可

航空至美。而得海陸程途所未曾有之奇趣。

美國各業組織法之完備。通國一致。大小無別。使身遊其地者。不能不起愛羨之心。入一商舖。見巨室之中。伏案而操作者若干人。皆能鎮靜無喧。有條不紊。或至大銀行中。交易之人。往來擾攘。不能名其數。每句鐘進出之數。不知其累千百萬。然以分工之故。交易往來。整然有序。有所諮詢。片時立答。余嘗屢至其處。見其秩序之整。條理之清。工作之勤。每至心折。不能自己。此其總其事者。思慮之詳。規畫之精。爲何如耶。吾中國人。夙以能商聞。獨規一業。或數人合資。其成效常大著。然以言大計畫。如合資大公司等。則尙有待乎學習。此不足奇也。合資集股之公司。在西方以爲常。而中國則互市以前。未之見也。自通商以後。香港上海各埠。漸有純爲華股之集資公司。然總理之者。未得西方整齊畫一之管理法。故以組織之秩序而論。卽以無經驗者觀之。亦可見其不足之點。而必須有俟乎改良也。以此而論。日本乃較吾爲勝。卽以橫濱正金銀行而論。其基本金爲三千萬元。分行不獨偏及日本各處。卽中國各大埠。以至倫敦、紐約、舊金山、火奴魯魯、孟買、加爾各答等處。皆有之。管理之法。純爲新行合序之制。報告賬目等。半年一刊。於以顯其金融之狀況。貿易之贏虧。清晰無遺。中國官私各銀行。雖貿易之數。

亦非細小。然其管理之合法。總不若正金及美國各銀行也。股份公司等。中國猶在幼稚時代。然中國商人及銀行家等。鑒於已往之損失。管理制度。必漸就改良。數年以後。不合法之事。必可漸歸消滅。以臻於美備。

晚近一二十年來。美國商業界中。有一風行之制度。曰託勒斯。積久而其焰彌甚。然亦惟美國商人之才智。爲能鼓促進行。使有今日之盛。迄今貿易場中。託勒斯之勢力。不僅被於美國。日就推廣。駸駸焉有周及世界之勢。託勒斯之主義。爲以偉大之資本。併合同業之各公司。使聯合爲一。而消滅同行之競爭。總公司乃可於以節省費用。增添出品。畫一貨價。而莫之或抗。右之者曰。託勒斯之發生。實以大利益界諸世界。蓋貨物均同。貴賤一致。而後買者不致無所適從。反對者則以爲有害公衆之事。謂託勒斯以偉大資本。壟斷市利。使資本淺者。莫之或抗。以競爭消亡之故。而用物者。乃恆受其弊。兩家之說。各有其理。余於此不敢妄下評判之辭。昔有二童。爭龍蝦之色。一童謂蝦色紅。一童謂色黑。持黑色說者。恆於海濱見其遊泳。主紅色者。則於其父餐碟中見之。余於託勒斯之見。則二童之於龍蝦也。顧其實際。殊不用辯。總之金錢之勢力而已。世無一人抵制金錢者。亦無一人知足者。巨富如卡匿奇。洛克勿婁等。雖揮財如泥沙。似較

急於積財。然從未聞其有怨富之言。謂何不幸而爲富人。也。美國人民。大多數以求財爲其唯一之主旨。終日營營。勤於所業。舍聚財而外。別無他念。其求富之心。不以飲食奄息而少止。日有思思財。夜有夢夢財。金錢爲其思想之歸束地。卽幸而獲至。亦不以之自足。中國人固非厭富惡財者。其愛財之心。亦猶常人。惟不以求富爲唯一之目的。操作奄息。安靜鎮定。而處之以堅忍。無浮躁欲速之心。余知其必能保持此特性。永守勿失。而不以美人求速富之狂態爲師法也。

古諺有云。守信爲商業之精神。此實美人之特長。吾國人所急宜效法。而行之。必有殊效者也。美國商家無不守信者。此實其成功之一大原因。苟於美國商舖約期定貨。期至無不備者。日常工作皆有定時不少紊。無費時無屯事。故恆能踐約不爽。中國人不知寶貴其光陰。此實一大缺點。其遠因當肇於吾國計時法之不精。因循以致於此。西方一日分爲二十四小時。每一小時爲六十分。中國古法則一日爲十二時。每一時合西法二小時。其約期也不以分數而以時數。故釀成不知寶貴光陰之習慣。而常有爽約逾期之事。及與異邦人交接。或以鐘錶之時刻限之。乃恆見其遲緩。自有定時火車。而此風一變。長行火車。或每日僅開一次。失時以後。須展緩行期一日。乘客於是不得

守其晷刻。數年前。余居北京時。友人有邀余菜館午餐者。約時爲正午。余於十二句鐘往。則館中虛無人。不特客無至者。即主人亦未到。余因尙有他約。不及俟。乃命數碟自食。迨至食畢。猶無至者。余不得已。命侍者傳達謝忱。故知中國人遲緩之習慣者。於公共集會時。其預告之時間。恆當較早一二時。若西方人則準期可矣。余以不知此理之故。嘗於集會時準期前往。因坐待至一句餘鐘。故余宣言謂以後集會等定期之事。當待余如異邦人。

文明之人。無不有衣服者。故言文化。不可不及衣服。然余於前章已專論之。故此僅引英女士尼古拉斯夫人之說以實之。尼古拉斯夫人評男子之服爲不美觀。而其精神之所在。則專注於女子之衣。下所引皆夫人書中原文也。（尼古拉斯夫人所著衣服之評論一書。專述衣服與美麗安適健康之關係。於倫敦發行者。）女子衣服。大都與其身體健康之關係。絕少注意。而影響及於兒童者。尤非思慮所及。然母儀之重要。則又舉國所皆知者也。吾人欲知衣服與身體健康之關係。及其影響於兒童之重大。則於女子服式。當逐層細爲考察之。近世女子衣服。率以美麗或入時爲第一義。安適與健康。卽有顧念者。亦置之後圖。誠欲改良。當倒易其次序。便利爲首。美觀次之。美觀當



附麗於效用上。不可偏重。以爲衛生第一要義。（十四頁）第廿三頁云。有多數煩贅之衣服。衣之者徒爲入時故。并不以取暖而然也。其最普通者爲重笨之衣緣。拖曳髀際。此不獨腰髀累墜。且亦爲脊骨之重負。是等衣服之害。不勝枚舉。而於孕婦爲尤甚。分娩時之危險痛苦。恆以平時衣服之不合宜而加甚。脊梁及關於生產之神經。皆因之而受其損害。於三十二頁云。余第一次於城市蒞宴會時（夜間之會）見婦女皆衣短衣。深爲駭怪。卽至今日。余固甚不願見男子注目於婦女半露之酥胸也。蓋衣服求其適中。過多固有害。過少之病亦正復相同。且過多而感熱。過少而冒寒。以之較示人色相而激動浪子如沸之熱血者。其利害又此輕而彼重矣。故吾人對於衣服正當之舉動。合乎人心。而又不違時尚者。莫如以衣服配天時。求其適於衛身而可貞靜合度。尼古拉斯夫人以切身之經驗言之。其書中自多論婦女之服。然西方男子之服。其弊病又不亞於女子之衣也。領高且硬。衣狹而小。終年束縛。不問寒暑。其不安適爲何如。四季之衣。幾爲一律。寒溫帶所行之式。在東方酷熱之暑時。亦不知變。斯誠大可異也。暑時所服之衣。余實未見其有大變易處。寒暑表溫度在八十至九十度間時。余見其所服之衣爲襯衫。一背心。一外罩。一外罩之厚。雖不如冬季所服。然仍爲羊絨嗶嘰等不

合宜之物質。無論熱度如何。市衢行人。鮮有不衣外單者。此所以中暑猝亡等事。時有所聞。而在中國。則幾乎並病名而不之知也。（中國工人操作烈日下。因中暑熱者。雖間有之。然亦甚少。）中國衣服。隨天時而變更。自重裘以至單葛。嚴冬之際。有重裘棉衣。入春則易輕裘薄棉。至夏季則有絺葛絲羅之屬。以天時之寒暖。而迭相更易。式制亦因時而變。不操諸北京或其他各城市衣賈之手。歐美各國。每年因衣服不適而致疾病以至死亡者。爲數必甚巨。特醫生於病狀上。斷不敢謂死者之病。乃造因於衣服之不宜也。二十世紀爲強權之世界。強權卽公理。世人亦已盡知之。卽於服制上。其現狀亦如此也。以公正不偏之眼光觀之。男子之衣詭譎。而女子之衣拙陋。然以歐美各強國胥同此衣。強權展其勢力。東方人民。因亦有舍其國服而習歐美之陋習者。設歐美之制。卽不能較勝。而可同於吾之古制。則其改之也。猶曰爲一軌。故今利害相反。彰彰若此。而猶盲從。此何故耶。抑世界何故。必取此卑下之制爲共同之式耶。吾國人又何所取。而必自消其優美之國服耶。在昔留學生之返自歐美者。一履國土。卽易本服。蓋苟仍西服。國人且詈爲半夷鬼也。自一千九百十一年共和肇建以來。此風頓變。陋觀之西裝。不以爲可鄙。而以爲時尚。不獨通商大埠。外人居留之所。奉爲時行。卽內地

呂始終未見異服者。亦靡然有從風之勢。中國婦女亦如日本然。無傾向新服之意。此足表其普通知識。有優越男子之處。顧余亦嘗見有三二愚蠢無知之少女。改作西方婦人裝者。西方服式狂熱病傳染至速。卽北京立法院中人亦爲其所中。當籌議服式時。欲決以高帽長套爲大禮服。白襯衫燕尾服爲常禮服。議會此議之騰笑中外。震驚世人。固不容說。蓋內地人民。第身未見西服。亦無西式成衣。何能服高帽長套於大禮之時。白衫燕尾於晏會之時耶。後開公會討論。決議以此式爲不合。且同時有多人提議現行男女服制。亦尙有應行改良之處。當北京服式會議消息傳佈時。綢緞業帽業等。恐易服以後。營業受損。大起恐慌。公舉代表入京。運動議員。使從緩改革。勿遽於根本有所變易。其結果乃於上述之二種服制外。更益以二種。一爲男子常禮服。一爲女子服。皆遵中國式。而盡須以中國之貨製之。此蓋所以慰製造者與貿易者之心。以苟遵西式。則質料雖不盡取西製。而大半皆須取材異國也。

余近次進京時。嘗反對前議之式。而呈遞一意見書於袁總統。請其移交議會。謂高帽長套及燕尾服。當聽人民自由選擇。而以余所擬議之中國服式爲正當之禮服。余深望議院中人於此細加討論也。蓋余意外交人員。出使異國。及遊歷外國之人。爲免惹

外人指目及歸於一律故。可易西裝。內國人民。其有願爲此鄙陋之變更者。亦任其自由。惟不能強迫。不願於冬季受寒。夏季中暑之人。使遵之爲國服。余爲此折中之說。以調和兩方。蓋欲使議院平反其適所議定之案件。固大難事也。中國衣服之較勝於泰西文明各國也。爲舉世所皆知。其晚近服制之改革。亦爲多數久居中國之西方人所深惜。下文所引。爲旅華某西人所著。載諸上海日報者。實足表示一般有識西人對於此問題之公意。一中國近時諸大改革中。服制亦爲其一。毅然棄去其寬博之國服。而採用西式。實足引起全世界之歡呼。街談巷議。僉云中國真文明矣。各國人民。亦莫不佩少年中國之毅力。謂以欲列入文明世界故。不惜採用吾不安適不美觀不衛生之服制。西式之成衣舖。靴舖。帽舖等。風行全國。徧地皆是。余於九月時過廣州。見昔售厚底靴之靴鞋舖。今皆改售西式之靴鞋。足見改革政策。已有根據。中國服制。將來當與高加索人同式。然余則甚爲中國人惜。服寬博之古制。何等安適美觀。堂皇合度。而忍遽令絕跡。且以余觀之。中國之所重於改革者。要不在服制一端也。一此君所語。深合余心。蓋吾中國之所當效法西方者。不在服制各事之有待於改革者。固甚多。然斷斷乎其非服制也。

## 第十二章 中國之文化下

世界之上。稱爲文明之族者。若干國。答者曰。全歐及美國。設進而問之曰。東方之民族。何如。答者必曰。除日本已進化爲文明外。其餘各國。雖亦有教化。而不足謂爲全文明。更進而問之曰。中國何如。答者又必曰。半文明。或雖文明。而程度不及西方之民族。吾人欲研究此諸答辭之是否確當。先平心以一考其事實。所謂文化者。實包含一民族之名教。良風及其人民之德性。純行者也。愛迷爾氏之言曰。文化係於道德者也。夫西方民族。上世紀之進化。誠不可謂不偉且速矣。新發現新發明之事物。不知其凡幾。今世人民之所安享者。近古之人。夢想不能及。自物質上觀之。吾人則誠進化矣。然西方文明之人。其壽命能較長於吾東方所謂半開化之人乎。文明之人。其已得延長生命之方乎。文明之人。其快樂固有以勝於常人乎。此諸問題。余甚願一聆其答辭也。且以實事言。美國人民。其受寒非較易於亞洲之人乎。空氣絲微之改變。或偶有至小之時。行症。其感受傳染非較易於亞洲之人乎。若是者。何爲也。以其發明新物之才智。何獨不能發明。保衛身體之事。而延長其在世之年乎。且美人亦能言較樂於中國人耶。以余個人之觀察言之。中國人恆較美人爲知足。而以全體論。且較美人爲快樂。上壽之

人中美相較。中國爲多。曾遊兩國者。當能道之。因美國政治之佳。財力之富。物質上供給之安適。俱遠出中國上。美人因恆思較吾中國人爲樂。然果能較樂耶。無友無告。困乏無依之人。不亦甚多耶。若吾中國。則曾無無友之人。卽或有之。亦其自取。孔子云。德不孤。必有鄰。此自中國社會構成以來。所歷驗不爽者也。設美國而或不然。毋亦其所自詡之文明。容或有謬種之遺流。而其對於天然力物質上。戰勝之所獲。或不足償其精神上內見之所失乎。余今引老聃語孔子仁義之言。世當能明此誼也。老子曰。夫播糠眯目。則天地四方易位矣。蚊虻嚙膚。則通昔不寐矣。夫仁義憊然。乃憤吾心。亂莫大焉。吾子使天下無失其朴。吾子亦放風而動。摠德而立矣。又奚傑然若負建鼓而求亡子者邪。夫鵠不日浴而白。烏不日黔而黑。黑白之朴。不足以爲辯。名譽之觀。不足以爲廣。泉涸魚相與處於陸。相响以濕。相濡以沫。不若相忘於江湖。亨利渥特皮邱有言曰。財富不足以生文化。惟文化乃可以生財源。財富用得其當。本可增進人之快樂與健康。世人鮮得其用。因每致有損而無益。快樂爲公正坦直勤勞服務之效果。而其反照卽爲健康。故以余之意。人之具有以上諸質者。卽爲文明人。其良質愈多者。卽其文明亦愈進。且文化肇始於東方。而流傳於西方。上章亦已言之矣。

天然定律。如螺旋焉。環轉而靡已。東方文化。既播子於西方。則西方文化。於吾爲同源。且必將反其本也。居今之世。天下各國。既無能守閉關主義。而不與他國交通者。則東與西斷斷乎。其不能截然爲二也。加之近世交通之便利。水陸航綫之安全。歐美斐亞。近若比鄰。設航空業。更能進臻安全之地。如今日之海線。則各國間之友誼。必將益形親睦。誠有此一日。則其呈効於人類者。將何如乎。余敢爲毅決之答辭曰。其第一步。必爲世界之安全。蓋利益既同。爭端自息。而皆將注意於和平。近數年來。至可欣幸之事。而足爲世界和平之預兆者。美國人民之致力於和平事業是也。和平會議已發其軼。各省皆有與會之會員。每年會議。皆於遏止戰爭。維持和平諸端。三復致意。其主義之正大。實足挽既倒之狂瀾。而示人心以正鵠。如馬霍克湖之萬國和平會。爲斯密蘭君私人所獨創。每年夏際。遍邀名流。至馬霍克湖避暑。卽藉之開和平之會。今斯君雖不幸謝世。而會務則仍由其介弟台納爾斯密蘭君繼續進行。已開年會十九次。與會者皆一時名宿。不獨美之意。立哇脫博士。哈佛大學校長。意茂立得司君。前美欽使。託活君。蘭門愛薄脫博士。泰婁博士。望薩大學校長等。卽異邦聞人。如英議員倍溝君。維也納斯帝能君等。皆與其會。於此醉心和平。日進月加之衆人中。安特魯卡匿奇君之熱

心尤可欽佩。卡匿奇君於萬國和平事業最爲致力。其光陰及金錢之大半皆播植於此主義中。嘗以一千萬美金爲卡匿奇和平貯蓄款。於致其付托人之長函中。首段表其堅強之信心。今爲引之如下。一余今以一千萬元五釐息之押契付托君等。爲卡匿奇和平貯蓄款之管理人。收入之款專供銷滅國際戰爭之用。企得早日洗刷人類文明之大污點。雖吾人今日固無相食之事。或虐待獄囚劫掠城池屠戮平民等事。然戰爭之時互相殘殺。仍與野蠻人無異。夫二十世紀中自相殘賊之事。僅野獸行之。或可邀恕。若戰爭之行。決於力而不決於理者。又烏得爲人道。故戰爭與罪戾常爲不能分離之事。而一國人民不願聞和平之評判。以驅人至於不辨是非之法庭者（戰爭）實極世界之大惡也。

余深幸常得流覽美國關於和平事業之各種雜誌週刊等。因推想各國是等著述亦必不少。蓋今日固和平主義萌芽茁長之時。舉世人民皆漸知戰爭之害。而信其爲不道矣。如海牙萬國和平會。世界各國皆有代表。實足徵此時代和平主義之精神。然一方面竭力提倡之。而一方面仍不能絲毫有所遵守。此則至可怪也。如近日歐洲之戰。意土興於前。巴爾幹各國繼於後。中國及世界各處無論矣。此何以異於戒童子勿食。



毒藥而聽其吞嚥以死也。明智之人當於此深致思也。兵凶戰危人皆知之。而干戈相尋無已日。既知戰之害而不知所以免之。則吾人於持之方必有其隱隱存焉。國家主義之狂熱發揚於大地。此豈非禍害之根乎。校中男女生徒自幼即教之以愛國。各國自政治家以至平民無不以愛國爲精神。而忠誠於其本土。設有服役異國。而有違害其本土利益之政策。則羣目之爲背國。爲奸慝。其政策之是非曲直不計也。生於甲國者。終其身當忠於甲國。乙丙各國亦如之。而不以正直爲率由之途。政治家欲求當選。必借愛國爲捷徑。曲護己國。或己黨之短。詳數他人之非。而勸諭其同黨。或同國者之忠誠。人民既日日浸漑於此主義之中。安得而不漸趨於自私自利。營近忽遠。以致與鄰國有違言爭執之事哉。

愛國主義固爲一國生命之所寄。二千四百年前畢薩高拉斯於希臘殖民地那克森說愛國。其辭曰。一國人其締聽之一國國民對於國家之職務當何若乎。其關係之親切較父母夫婦昆弟朋友而尤甚。國家者一國國民之父也。母也。夫之婦也。婦之夫也。一家善則一家之人夫婦子女皆享其福。一國之大不僅一家然也。國爲家之保障。無國則家無所蔽而不足以自存。敬愛其夫爲婦天職。夫者婦所繫也。敬愛其婦爲夫當

然婦者保育子女者也。然一國之敬愛又不止若夫婦而已也。若夫若婦若子女之平安。胥賴國以保障之。身之安家之興。如荼如火。如華如錦。光明燦爛者。國之賜也。國強盛而藝術興於以判文野別人獸焉。勇士樂爲家而犧其身。死於國事。其樂倍也。一然國家又必以正誼爲之導也。畢薩高拉斯又言曰。一有機社會之存在。所以謀人類之幸福及快樂也。苟背此誼。則其本體已蒙罪戾。今日之國家。何如苟有違言。而兩國開釁。卽一國之人明知己國之非禮。而他國爲被動。斷不敢爲公正之宣言。以設主公正而違國意。則冒奸惡之不韙。而以欺國戮矣。今世男女雖無買賣之條。如古畜奴之事。然究其實在。猶歸奴伏。如歐洲各國大率強其民爲戰爭。而不問其意志之何。若且其爲國民。也有出於強迫。而莫由自擇。中國暴徒以肆劫爲生。謂劫掠人之私財。而出之以強力。然強迫戰爭。而奪人之自由者。寧有逾於此乎。此極端國家主義之害也。攻城掠地之風。鼓勵不遺餘力。泰東西文化之殊流。卽以此而分支矣。中國政府民聽民視。取決於輿情。西方之人。其拓地自封之志。存之久矣。鮮有解此者。蓋國小而民多者。思擴土以殖民。大國則欲拓地以營商。列強同逐一鹿。於以討論而均分之名。曰勢力範圍。而互尊重其商業。若吾中國社會制度。則以友愛重工爲基礎。而不尙攻掠。且

余更欲問增加領土之益固何在。試平心考察之。凡一城邑既下。勝者必須以大軍隊維持其和平之秩序。且苟人民心理未嫌於新主。一時又必有反抗擾亂之阻力發生。凡此皆與吾孔子之教相反馳者也。孔子教人萬事皆當究其原。而無取乎暴亂。寧先詳細討論。尋繹其意義之所在。而後加以相當之設施。尤必審慎於戰爭之結果。而不輕爲一試。西方民族則一往而不知顧慮。設開拓領土。純出於善意。欲以良善政治導入其邦。拯民於水火。進治爲文明。斯誠卓然義舉。吾人頌揚之莫及。又何敢攻擊。然余深悲所謂善意義舉。僅屬之口頭禪。而按之實際。百不得一焉。其差強人意而稍合此誼者。爲美國之購斐律賓羣島。夫斐律賓奪之於意者也。余斯稱之曰購。蓋既以兵力佔之。而復酬以重價。微與世之野心家有別。故謂之曰佔。無寧謂之曰購之當也。當時美政府之意向。爲天下所公知。自歸管理以來。盡力開闢其富源。發展其商業。改良政治。振興教育。啓迪土人之心思。而教之以自治之預備。且復屢次爲嚴重之宣言。謂斐人苟有自治之能力。自設良好之政府。而不虞隕越。美人卽當與以獨立。余深信斐人自治之力。既充。美國必有踐其前言之一日。此不亦爲世界各國立一良好之模範乎。英國之於香港。雖設施與美不同。然亦爲推廣新領土者之又一證也。以余觀之。推

廣新領土。而不以博愛普濟爲宗。則所得恆不足償其所失。中英之役。英得香港地。斯時香港幾爲一荒島。舍二三漁舍外。一無所有。英人欲蕃殖其商業於東土。而藉此爲轉輸地。且欲闢之爲巨埠。而鼓勵人民之移殖也。年復一年。耗巨金以建設之。加以香港政府管理法之美備。自由貿易策之採用。迄今蔚成東方巨埠。爲英國繁盛之殖民地。戶口之盛。幾至五十萬焉。然英國於此其所獲之利益。固何若乎。以經濟論。則香港自歸英領以來。久爲英國財府之大漏卮。耗於此之金額。不知其凡幾。今雖爲自給之地。然英人於香港所享之利益。曾有異於他國之人乎。香港爲開放之埠。各國之人來者無拒。英國商人所享之利益。與他國之人公之。據千九百十一年戶口之調查。全境人口爲四十五萬六千七百三十九人。內非中國人僅一萬二千零七十五人。而一萬二千七十五人中。英人亦僅居其小分。是可知香港之盛。全恃中國。而中國人所享利權。同於英人者。又不庸說矣。外國商舖（非英國）日見增添。英國行家。反行減少。英人自得此領土以來。以金錢論。實爲損失者。雖英國國名由此而遠揚。然曾以是區區空虛無益之名。而以國民之重稅易之乎。

雖然。以道德經濟之眼光觀之。則英國有大功德於香港者也。自英領此土以來。中國

人得實見西方政府之構造。近世政治之優點。英人復於此擲無數之金錢汗血。變荒島爲市場。至今日遂成中國海口第一巨埠。且其公正無私之法律政治。崇尙人道之獄囚管理。又不能不起土人頌功感德之信心。故設英政府得此荒島之初心。純欲以良政治。教迪土民。使得享西土人同享之樂。則吾人感謝之忱。爲何如然。余深懼其動因。乃不能若斯之純正溥愛也。卽歐洲列強在中國之領土及租借地。以及英國其他殖民地。如澳大利亞新西蘭加拿大等。所謂有自治權之領土。亦寧能有異斯誼。英政府之對待殖民地。純取放任主義。一以和平爲宗。任其自行管理。而不加以限制。殖民地之見待既厚。英政府復爲之完全保障。因不虞其或有脫離母國自謀獨立之事。卽或有之。英國鑒於前此英美之戰。亦斷不致再有戰禍。且英國當局亦既深知援結殖民地人歡心之重要矣。近年以來。定徵召殖民地人員至英倫會議國事及殖民地事之制。帝國聯邦之制。漸見發展。將來英格蘭蘇格蘭埃爾蘭韋爾斯必各各自有其議院。而於韋斯敏斯脫建帝國議會。各殖民地及三島皆出代議士。以共議聯邦政府之要政焉。然持義正大。而能以公直爲懷者。厥維美人。許殖民地以自治也。宣言使半開化人獨立也。皆美人倡之。自東西交接以來。能不利吾疆土而無絲毫侵佔租借之地。

者列強之中亦惟美國焉耳。抑余又欲問列強之拓地自封日關新土者其意果何居乎爲推廣商業乎推廣商業固無需乎疆土者也。居今之世萬國交通曾無閉關自守之國車輟馬跡所及無不可自由推行其商業者英國各殖民地土人與異邦人所享利益相同曾無虛文縟節爲之束縛是則推廣商業之說曾無領土之必要爲以殖民故乎殖民又無取乎領土也。自歐美以至英國領土白色人民苟不爲社會之贅者皆得自由移殖不加限制數年以後卽同土著政治家乃解之曰強國在世界各處必須有海軍根據地及上煤添水之區故領土爲不可少之物然以是而言是備戰矣苟世界和平能永久維持亦何取乎戰備其經營締造領土之金錢汗血不幾與擲諸東海等乎故無論以何義言締造殖民地開闢新領土實爲無益之妄費且軍備亦實爲政治家時行之一物而余又深悲舉世之所謂大政治家者胥孜孜焉盡力於此而不稍悟其非也持之之說無非謂以欲保全和平不可不以武力爲之盾兵力強則國威盛斯其言能聽信於列國然按之實際斯說實兩無所益徒使弱國深其畏懼強國積其猜嫌而公理日趨消滅已耳終此繼長增高極誼將至何地行見各國之民人人武裝以爭己國之威嚴盡耗其寶

藏於無畏。艦戰鬪品之製造。而不知有他業。此境長存萬國之和平。固可冀乎。各國人民既日以備戰爲事。機緣一熟。終有相見疆場互較短長之事。諺有之云：箭在弦上。不得不發。又云：操刀不割。何用刀爲。既種備戰之因。必收戰爭之果。所謂備而不用者。特欺人語耳。天下安有是理哉。英國財政大臣佐治勞奄君嘗悲軍費之日增而無俾實益也。於議院致其悲悼之辭曰：「余深信長此增加。要必有至慘之結果。雖余不願其見諸吾國。而以現狀卜之。亦難保吾國之能免此災殃也。」持械之人。或招攻擊。初意原以自保而結果。每至加甚。其父報仇其子。每至殺人。變本加厲。事恆如此。況軍備日加。又不止自保報仇而已哉。余論西方民族開闢新土之非計。嘗言白人可以自由移殖。不加限制。然此惟白人能之。吾黃種則不然。有數國僅許白人生殖。取締黃人入口。條約至爲嚴酷。且其律法規定黃人住居。雖久不能認爲國民。且有數處完全禁止黃人之移殖。主此政策者。其意謂白人之智識教育風俗習慣。皆高出黃人之上。若黃人者。實不值與之相接觸者也。然黃色民族若中國者。有禮儀有藝術。有倫常。且其經營良好。鉅大之社會者。已數千年。於茲如社會上階級之仇恨。階級之界限。階級之競爭。在西方爲阻滯進化之機者。中國從未有之。且復能愛金錢而不爲金錢之奴僕。喜奢

逸而不沈溺於奢逸。樂生命而不營逐於末節。誠所謂樂天安命之民族。若吾顏色之不同。則亦如語言之不同。然所謂物質之偶。有性根於風土氣候及其他遠因而最初固皆出諸一本者也。遠始之時。天無偏愛。吾人固均一而無別。後此之差異。則人自爲之。且以才智論。吾黃人未嘗有較遜白種之處也。日俄之戰。黃人才智不較勝於白人。耶。故余嘗謂亞細亞當再以文化灌漑西方。此非無聊之辭。漫相嘲諷已也。誠以白種人當受教於有色種之同胞者。其事尙多。如印度中國日本等。其優美之制度。多有非亞洲以外民族所能知者。宗教於西方文化。影響甚微。而亞洲文明。則無不以宗教爲社會之基礎。究其所詣。則有色種人處置道德問題之地位。崇實之白種人。則以之處置其經濟問題。以吾人之思。西方白種人直若不解安樂爲何物者。其故蓋以白種人實無享受安樂之餘閒。終日營營。惟以聚財爲人生之標準。不若吾人之以道德爲標準也。家庭之維繫。有色種人亦較無責任之白種人尤爲強固。因之而社會之感覺。較爲敏銳。個人之受苦。亦於以減少。雖吾人要亦不能免缺陷不足之處。然非獨具之劣點。而以通體而論。柔和之風。實爲中國人所特長。海外華僑所在之處。其評論恆曰。中國人爲良好之國民。前中國總稅務司勞勃赫德之評中國人曰。一中國人品性馴良。



奉公守法。勤忍節儉。優於才智。事無巨細。無不能學。亦無不能爲者。謙和有禮。尊才尚德。主公正而嫉強暴。橫逆之事。掩耳不欲聞。崇尚文學。尊禮道義。學官徧於全國。以道義文術相琢磨。全國之人。莫不彬彬然有禮。愷惻慈祥。勇於爲善。施無不報。恆以大德酬小惠。雖亦重財。而好名尚德之心。較勝於求富。聰明易化。勤忍務實。而於普通智識尤富。工人靈巧有才藝。誠實可信。商人重然諾。尚信義。而孝敬父母之訓。守之甚嚴。實爲其家庭社會之基礎。中國民族之國性。天下萬國。自古及今。無有能與抗顏行者。中國之所以能長保國土。亙數千年者。非無因也。

美人恆自號於衆曰：「美國者。美人之美國也。」澳人亦恆曰：「澳洲者。澳人之澳洲也。」然以理論言。二說皆無所根據。蓋美、澳二土。非今茲美、澳之人所固有。若吾東方人。亦爲此論調。曰：中國者。中國人之中國。日本者。日本人之日本。於義似較爲確切。余今欲引中美公平會英秘書色登君對此之評論。以告世人。色登君曰：「世上最愚蠢之言論。無有過於美國爲美人之美國。中國爲中國人之中國等者。此實貪嗔嫉妬。自私自利。無知妄作。諸惡之根。凡有稱爲人類爲耶教徒。爲有意識者。皆不當作此卑陋無值之言。以自取罪戾也。造物之創天地。爲人類也。設造物而有偏愛選擇之心。存則

宜若重視中國。蓋其於中國似有勝於他方者。美洲者土著印人之美洲也。此說亦嘗風靡一時。迨英人來。遂一變而爲英人之美洲。後更變爲清教徒之美洲。而在新哇利痕。則曰法人之美洲。在本薛凡尼。則曰荷蘭人之美洲。實則造化以美洲爲大冶之鎔爐。四方之民來者。無拒萃天下人而鎔化之。使成一鎔合之大民族。而爲舉世範一色。登君此論。言辭雖似強固。而持義正確。無可答辯。

今請略舍本題而敘西方美俗之爲吾東土所未知者。曰國際婚姻問題。異國人民互爲姻媿。不特在合種之美洲。爲恆見之事。卽歐洲各國亦視以爲常。自皇家貴族以至平民。無不交互爲姻。故歐洲各國幾全爲姻媿。此實世界和平之佳朕。異族團結之先聲。亞洲人近亦有與歐美互婚者。此事大可勉勵。蓋凡事可以增進。東西人之交誼而減少。彼此之誤解者皆足多也。且異族互婚。其生必蕃。而所生子女。又必稟有父若母兩族遺傳之佳性。香港皇后大學校長語余云。一校中各族生徒數百人。前此考試中國生徒恆冠其曹。近自歐亞雜種人進校以來。中國生徒屢遭敗北。漸有後來居上之勢。一此足見互婚之效。且不獨學校中生徒爲然。商業場中亦無不爾。香港首富爲雜種人。斐律賓著名領袖阿琴鐵拿之父爲中國人。此尤黃白兩種互婚之明效大驗也。

故異族互婚。生殖必佳。然嘗有女友問余。謂中國人固能爲良丈夫乎。余於此乃欲引證美國婦女一事以解之。數年前余在華盛頓使館時。曾有國人來見余者。與之偕者爲一美婦及一女郎。婦爲其妻。女爲其子。余意其必爲母女。然此婦告余。是女爲其亡友所遺。自女友之死。知其夫爲溫厚敦愛之良人。因卽願爲其繼妻。而爲女後母焉。輪迴再生之說。世有信之者乎。（世界不可思議之奧蹟。實以斯爲秘鑰。余深冀讀者篤信之也。）依輪迴之理。吾今生於斯土。吾前世未必適生於斯土。而吾又不能必吾來世之仍生斯土也。歐亞斐美。迭主而無擇。余往嘗有所思慮。思吾前世之一。必曾生於美洲合衆國者。然余乃無絲毫怨恨。謂今世何不幸而生茲亞洲。余爲此言。欲使持獨占主義之白人。明今茲爲白人。來世或當生於斐亞。而爲黃黑之人。今茲所行拒絕黃人之主義。來世或且身受之也。

吾中國人雖良多缺弱之處。待教於西方。學法於美國者。然度量之宏。則殊足自信。勤儉溫恭。尊重和平。諸美德。亦可居之無愧。吾國人之遭人輕視。受人苛待者。屢矣。逆來順受。不悻悻作小丈夫睚眦必報之舉。吾人深信水落則石出。公理必有勝強權之日也。中外交涉事件。發生至今。更僕難數。而曾無一事爲吾中國人首禍而挑釁者。今特

譬諸事之小者。以明外人之罪。吾恆多失實者。西人習尚賽馬。上海西商設有賽馬場。每年春秋二季。舉行比賽。當賽馬時。中國人不准至總閱臺觀賽。另有入口觀賽之地。一若中國人皆有傳染病症者。人有告余者。謂數年前有中國人挈婦女數人往觀。有乖方之行止。因遂有此禁令。夫公共聚集之所。自當維持秩序。糾正儀節。然曾有以二三人之故而遂擯絕一民族乎。設乖方之行止。出諸一二異邦人。如德國（此特取譬）賽馬會。其遂敢以此而拒絕德國人。使不得與於此樂乎。若吾中國人所為。則適與此相反。中國人既審西人賽馬之習。而格不得與也。自創一賽馬會。而名之曰萬國體育會。購地於江灣。距上海約五英里。闢之為賽馬場。廣修過於上海舊有之所。每屆比賽。中西人士皆可享觀賽之樂。無分乎種族。無問乎國界。且贈優待券於上海賽馬會之西商。而邀其蒞至焉。會中會員。半為外人。執事公正人等。中外兼有。與賽之馬。有為中國人所有。亦有為外人所有者。中國競馬者。與外國競馬者。互爭勝負。比賽之時。興高采烈。而和氣盎然。交互間發現其真摯之友情。此實江灣賽馬會之足多者也。夫中國人非西方所目為半開化。而崇異教之民乎。而萬國體育會及江灣賽馬會。則直以直報怨。而聯係各民族間。前此所謂不能平行之情感矣。以若是之民族。謂可以拒諸澳

大利加拿大北美合衆國國門以外乎苟此諸國之主持拒絕者進而與之交接其所獲利益不亦大足觀乎澳洲移居條例余聞其較美國所行者尤爲嚴酷凡屬中國人幾完全拒絕不特對於中國之工人爲然卽商人學生等亦不容入境一千九百二十二年時英女士愛難皮孫曾於英國演說英國殖民地有色人種之公民問題於其國人種族之偏見痛下鍼砭女士演辭中所舉事實深堪玩味足爲吾讀者告尤足令澳洲人民發深省也其辭云一自吾民移殖澳洲以後頓生大變革澳洲天時氣候能使居此土者深其顏色現在該土居民已變黃色因之於移居條例大起困難此等變色之民以後尚可容其居留澳洲否蓋白人之色已有較土人爲深者一由此言之澳洲之人爲其切己之利害故今迨其廢棄拒絕黃人條例之時而當使其議會消滅或修改前此對於黃人之移殖條例矣且澳人又熱心於推廣商業者也嘗委商業委員至日本及東方各埠考察情形以謀推廣其商業於東土蘇叨君者新南韋爾斯之商業代表也嘗爲以下之廣告曰一新南韋爾斯爲工商大埠其出產物皆爲無上上品今爲便利交通推廣貿易起見特開定期輪船航行於澳洲商業中心雪特南及上海間一夫商業與友誼非相依並進者耶奈何澳洲人民欲推廣商業於其所拒絕之國於此

則欲其發達於彼。則拒不得達。雖以通商之故。猶必摒諸國門以外。斯真余所百思而莫得其解者。彼澳洲人民。其或夙聞吾國人度量之宏。因思彼之枉吾其報以直。彼之怨吾其報以德。於以歡迎其商業。而爲不平等之往來乎。四海之內。皆兄弟也。爲吾平生所篤信服膺之主義。以嫉妬自私之故而摒絕一民族。使不得立於大地之一端。斯實大悖乎造物生人之初心。違天自私之舉。必且自受其弊。施於人者。終必反諸其身。所爭者。遲早之間耳。天下之人。各爲其己身之祖先。而備夫未來之日。今世作之。因來世收其果。吾人今世所受者。胥前世之收穫也。犬在食糟主義（自利主義）實行之者。不啻自卑而下儕。犬類且文化而無取乎公正和平。吾人亦何用此文化爲哉。余於此節。欲使英詩家維廉渥此渥斯代。表其天然界之觀念。其遠遊篇第九節云。

嗟乎。人人之間。初有何別。且其界限之分。起於何時。而誰實爲之哉。圓顛方趾。天下之人。同斯形。日月星辰。天下之人。同斯見。海水長流。而不息。陽春和煦。以迎人。天下之人。同斯享受。有識之世。一物一景。無不有其優美純潔之態。公諸衆而無所蔽。威權至莊嚴。勢力至偉大。同於衆而無所偏。造物賦人。無所厚薄。是非之心。人人有之。本乎是非之心。而喜樂分。思想生焉。意志之自由。天良之規導。死亡之預慮。知覺之

不朽。上智同於下愚。在世而成聖。則其靈魂可上升於天堂。且茅屋炊烟。與御廚餘  
焰。其上升於天也同。苟明此誼。庶週遊塵寰。無往而不足。然猶有煩憂亂心焉。則古  
義消亡。公道滅絕。人人之間。廣爲區別是也。

### 第十三章 筵宴

吾人爲維持身體之健康。除免饑饉之侵害。故每日於一定之時間進食。名之曰餐膳。  
然近時文明人之餐膳。則有不僅爲身體健康饑饉侵害者。人爲喜羣之動物。進膳之  
時。恆樂成羣。因之而有餐會有筵宴焉。赴餐會之客。其主意初不在果腹。僅爲尊重主  
人之禮意而尋求娛樂。故恆以談笑快樂爲主。珍錯羅前。每有七箸不下者。然客意雖  
不在飲食。而主人邀客。則須備極豐腆。饌脯之外。兼備酒品。酒肉二事。爲必不可少之  
物。雖主人平時或爲戒酒素食之人。而賓客日常亦已厭此。然不備則不恭。習俗如此。  
牢不可破。筵宴之時。能破除陳例。毅然改之者。蓋不少見。美國庖人。皆烹調能手。知所  
以饜美人之口味。專其心志於烹炙一事。才智愈練而愈精。因時有新奇之精饌發明。  
以適食者之口。陳於客前之肴饌。豐盛異常。卽饜餐嗜食者流。亦不能盡享。於時行之  
筵宴中。雖僅僅徧嘗各味。亦有所不能。以肴饌之多。進食自不能較少。然各式肴饌

之烹調。皆馨香撲鼻。使聞之者饒涎欲滴。不能自己。惟苟涎其味而盡納之。則貪口福而胃承其弊。明日腹中之呻吟。卽其收效。口與腹雖同爲嗜味之官。而結果每不能相合。肴碟之多。則美不及中。美國巨富之筵宴。肴饌之數。恆較中國盛筵爲少。中國紳家宴會。碟數每自三十以至五十。有時且及百數。惟中多陳設者。不皆能食。主人邀客。苟非有別故。不盼其遍嘗各味。卽賓客會飲。亦不若美人之恣放多食。每味輒嘗一二箸。卽止。任侍者更易。而於其間談笑吸煙等。以娛同坐。此則中國筵宴之優點也。歐美之俗。以糕果爲尾菜。而中國則以之爲首供。二者之間。不知孰愈。吾國人恆喜擇善而從。不事泥守。自西法東漸以來。筵宴中糕果一事。多採西法。然仍不棄故俗。故今逢筵宴。食前食後。以至食時。皆佐以糕果。此東西兼採之法。余意良以爲合。而有推廣之價值。苟能推行普及。則前此偏頗之故習可除。蓋此亦如人之肉食然。純乎其爲習俗也。美國盛筵中。以鼈羹爲必不可少之品。嗜之者謂其肉味精美異常。馨香可口。膠性之頸皮及鼈裙。尤爲佳特。然其滋味之佳。亦特時尙使然。四十年前。鼈賤而多。工人至與雇主訂納。謂一星期中。不得食鼈過於三次。嗣後鼈產大減。物稀爲貴。至今日遂成盛筵中必不可少之品。蠔蠣亦爲西方珍品。且恆生食之。余深不解何以上流婦女及紳士



輩既知其爲食腐類之動物。伏處水底。吞食穢質者。而當其啖食之時。津津若有至味焉。余友某君。食蠔蠣不及數枚。至離席而去。歸家以後。臥病數日。故一人於其所食之物。亦不可不審慎也。美國有慎食會。專注意於飲食之清潔。然苟其知中國僧家素食之清潔。而委人至吾叢林中考察。必當有所裨益。蓋大寺院中僧家之食品。皆極衛生之蔬果類也。各人所食之食料。殊非一致。此事大堪詫異。管理公共衛生之官。固爲有益之司。然文化日進。各人不皆當爲其己身之衛生官乎。

中國肴饌中。亦有至佳之品。爲西方庖人及主婦所不當忽者。如魚翅燕窩。爲中國筵宴上品。與西方鱉羹同其尊貴。自衛生之眼光觀之。魚翅爲鯊魚之鱗。似非必需之品。然較之西方筵席中之嫩山雞。及其他肉類等。爲一般人所酷嗜者。有過之無不及焉。若燕窩湯與鱉湯較。則不知其高出幾什倍。燕窩一物。曾經美國化學專家考驗。非特平和無毒。且足消滅獸肉所生尿強酸之損害。因之可減少風濕等諸病症。紐約芝加高諸大城市中國菜館之雜碎。已爲美國一般人士所歡迎。此足表吾人口味之同。余以是深盼美人或接受余所推薦之言也。美國宴會時。酒品之數。恆至多種。而視香櫝爲必不可免之品。斯何故耶。富有之家。開筵邀客。恆不惜重費。某夫人一筵之費。消

耗至二萬金磅之巨。雖宴客之主意。誠如余前所言。賓客固以談笑快樂爲上。而飲食其次焉者也。故發醇品之飲料。使人精神提激。迷其本性者。筵宴之時。皆當摒絕。勿用。雖天下之人。不能皆贊余斯說。而余則深以此爲不可稍緩之舉。然濁醉之世。亦間有清醒之人。能摒絕酒類者。雖尙不多見。而余深冀其日增。以余所知。如漢特森夫人。爲著名之素食家及戒酒者。不特一己涓滴不飲。亦從未以酒類款客。如國務卿白賴安氏。報紙稱其於饒別勃拉哀斯大使時。筵宴中無香檳及其他劇烈之飲料。實足爲崇酒者之模範。前駐上海美總領事懷爾特博士。亦爲贊助戒酒者。博士在華。交際極廣。以其反對酒類之故。交際宴會之時。恆視酒爲例外品。今不幸以疾去職。回美養病。識博士者。無不深爲惋惜。

酒類之蕃殖。其勢力於歐美也。既若是其深久。每年消耗之總數。又如彼其廣溥。則公衆對於飲酒之意見。自不能歸於一致。然美國之各省禁酒律。則實足爲天下立一禁酒之規模。天下無論何處。禁酒疆域之廣。無有如美國乾省（禁酒之省）者。中國刻方厲行禁絕雅片。風行一時。漸見滅絕。甚願伸手大洋中。與隔海之兄弟共和國相握。冀其得早日脫離酒害。如吾之望於雅片者也。每有一弊。卽有曲爲之護者。數年前余於

北京遇一荷蘭美術家。雖年事少壯。而困於風濕。每月間發。必有數日不能事事。余知其酷嗜杯中物。然不知其爲貪杯無節者。因與之論酗酒之害。戒之以若不戒絕酒類。則風濕終難全愈。彼傾聽良久。答余云。『余深信君言之當。惟與酒爲友者既久。實以酒爲第二生命。苟聽君言。不啻自絕其快樂。故寧受風濕之苦。雖時時間作。而一二日即愈。仍可續余飲酒之樂。不願去風濕而摒於快樂之外也。』余仍戒之云。設長此沈湎不事。改則風濕之侵。積久靡數。且歷日亦必較久。受苦亦必較甚。彼終不悟。蓋人每有一習慣。無論其爲利爲害。欲一旦革除之。非易事也。漢特森夫人嘗著一書曰。『衛身提綱』。議論精絕。余所深佩。其論吸煙葉飲烈酒食毒食之害。闡切詳明。洞中要領。披讀一過。不自覺其心折。頓成爲戒酒攝身之人。而思實收其效。『余素不嗜煙。往亦深惡煙葉紙捲等。然爲友朋敦促之故。偶或勉受。今則一概戒絕矣。』然獨秘斯善於心不安。必思所以推廣之者。而一經試行。即知其不易。蓋人自樂禍。吾必欲拯之。其功倍難。羣因誚余爲幻想家。然余曾不以此少挫。轉余熱心於本國友人。而傾向於居留北京之西方人。以西方人思想鑒別之力。或較吾國人爲優。當能審衛身之重要而贊成之也。於余所告勸之西人中。一爲外交家。一任事中國而有大名於世者。二人皆

年事已長。而身體健康者。余冀其讀余所寄漢特森夫人之名著後。當必能察知其前此之誤。而卽行改作。然竟不然。當二人璧余原書時。答辭幾出一轍。云「漢特森夫人之書。良有深意。惟余實不能改。余平生之習慣。余飲酒極少。肉食亦有節。」二人答辭似皆於肉食含毒之問題。未嘗注意。苟知其毒。當無再食之理。吾人從未聞明理深思之士。間食砒礪木鼈精及其他毒質者。惟愚蠢之婦女。或欲使面色灰白之故。而服砒礪。無知之男女。有以木鼈精與他種藥類混和。而以爲補劑者。然曾有以是等爲食物者乎。故有節云者。僅可施之於榮養身體。或平和無害之物。若含毒有害之物。不論其所含毒分多少。皆不可誘云有節而食之。蓋其所含毒質。雖至細微。而要爲有毒。無可辯也。

筵宴之時。談論風生。以娛四座。爲不可少之事。故健談之客。到處歡迎。美國人民。素以急進改良。不拘故俗稱。乃於談論一端。獨不謀改良之方。此則余所深爲不解者。人之長於辯給。豐於故事者。宴客之家。自必竭誠羅致。以求其助主人而娛賓客。然設賓客衆多。一人之談論。斷不足以供衆聽也。近坐之人。能共笑樂。離坐稍遠者。聽而不全。其尤遠者。必至一無所聞。而抱向隅之嘆。旣不能享他人同享之樂。又以旣有談者。而不

能自揮議論。不亦拘束之甚耶。滑稽善辯者流。大宴之時。僅既娛半數。而不能悅全賓。此實美國筵宴之缺點。而急宜改良者。筵宴之時。談笑者宜謀全羣之快樂。亦如鼓琴者。恆於酒酣耳熱之餘。鼓弄以娛衆賓者。庶可無偏頗之病。或特用談說之人。於以行酒令。述笑談。以共歡樂。其結果當較今時所行使賓客之自娛者爲樂也。中國則有歌伎。日本則有舞女。設此法行。則東西混合之良法矣。大宴會時。賓客衆多。其意見斷不能脗合。蓋人心不同。各如其面。雖同爲上流人。皆溫和有禮貌。然苟邀請之時。不就其意見。而就其社會上之位分。則結果每至不能相合。設使同意見之人。聚於一堂。則雖位分不同。而言談笑樂。必不乏真誠之忱。且若聽者表其同心。談者詞源。必可益因妙發。苟坐無知音人。雖善談者。亦必歸於緘墨。此又爲主人所不可不知者也。宴會時之談論。習慣上大都不之記憶。此大可惜也。人爲最靈之動物。其詼諧談笑之才能。遠出他族上。詞源之富。有如吾國東流之江水。滔滔然不知其極。而所記憶者。僅存在於渺茫間。若庖廚中肴饌之氣。一任其蒸騰飄散如浮雲。不亦良足惜。且主婦何不振作賓客之氣。一如其烹庖之功乎。常見少年坐隣女郎之側。以生平未嘗交接之故。含羞侷促。不能自安。致不得恣意飲食。設有特用談笑之人。以娛衆賓。可使含羞之少年。免

酬應之苦。不致常以籌應對之語。而乖其飲食。則主婦之佳肴。不致妄費。寧非事之佳者。且在女郎。亦可免無聊之酬應。而不致有拘束之苦。矧主人勞神費財。張筵邀客。原欲博賓客之歡心。乃以互相酬應之故。致不得盡飲啖之樂。不亦大悖其初心耶。故余意莫如使一人專事談演。餘人既可恣意飲啖。亦得聽講之娛。於事實兩便也。宴會亦實爲發生佳事之良機。少年男女之聯坐者。不盡非偶。亦有一雙兩好者。或爲新知。或爲舊雨。得於宴會之際。聯繫其情感。重溫其交誼。而導之以婚姻之途。藉宴會作蹇脩。此實吾中國人所當效法者也。然凡事有利必有弊。宴會亦然。是則當局者所當審慎從事者也。個人行止上之缺陷。或特異之處。可於宴會時覘其談吐飲食而知之。故每有於同處宴會以後。而中悔其已結之婚約者。然談判重大之事。亦嘗於宴會中行之。且較他處爲便利。重大之商業交易。數至百萬以上者。恆於飲酒之時成之。卽國際交涉。關於條約等重大事件。亦常有於宴會後吸煙時開始談判者。華美之房屋。殷勤之主人。歡樂之衆賓。自由之談笑。恆使一室之中。春氣盎然。滿布誠摯之友誼。意見於以消除。障礙於以廢撤。積恨於以鎔解。使人知有歡樂而不記愁恨。此尤宴會之大功也。中國朋友有違言和事者。恆借宴會以消除其積忿。名之曰和事酒。美國亦大可仿行。

之蓋彼此猜疑懷恨之點。一經宴會時之談判。即可解釋於無形。假使國際交涉。亦能仿此行之。則談判困難。不致若今茲之甚。誤解之處。不致若今茲之多。往返之勞。亦不致若今茲之數。吾不解何以國際交涉。必依照舊式之會議行之。而不加改良。且於宴會及平常社交之時行之。似更較得體也。飲食恆與友誼相聯係。阿拉伯民俗以食鹽爲不可毀之誓約。卽太始之時。毒蛇與夏娃之相識。亦以食物爲進身之階。美國社會中於宴客之日。似有無形之定例。某日宜某日不宜者。雖余不信美人爲迷信。然星期四似爲其特喜之日。年前余在美時。曾憶已故總統葛蘭脫夫人。先期邀余夫婦於星期四晚夜宴。時距定期尙二旬。當余等僉知署諾以後。請帖陸續而來者。有十餘起之多。約日皆同。因已有前定辭之。然除此星期四晚。則一無相邀者。星期四之前一晚。夫人來函取銷前約。謂以戚族之驟死。不克踐約。余等終乃自饗焉。若吾中國則不然。筵宴之日。無所選擇。自星期日至星期六。其合於宴會也同。爲欲免重疊之故。亦有選星期五爲宴日者。然異無如華盛頓及其他各大城市之所謂茶會季者。際此時期。上流中人恆僥忙於茶會家宴等事。余嘗於下午半日間。應茶會至六七處之多。然從未有人能於晚間應宴會一次以上者。此則美國所宜效法吾華者也。中國宴會。一夜間。

一人可應酬至六七處之多。坐席後菜上一二道。即可請主人原恕。興辭以赴他處。蓋如是則既可免卻請之不恭。而又無偏頗之病。西方筵宴。恆有以卻請之故。而主客間因以介介者。若吾中國此法。則友誼之間。平等無偏。略無絲毫軒輊於其間。選舉時代之候補當選人。斯實其交結新友之妙法也。美人進食恆少。即無筵宴相邀。亦畧嘗輒止。不恣意大嚼。斯則吾中國人所不及者也。余草此篇時。美女士某告余云。紐約市執袴少年。近有改良之新式筵宴發生。其制於同日間設席多處。賓客循環赴宴。每至一處。輒食一二道。果點則於末席食之。余於此說。深致疑慮。女士則堅云其確。是直以筵宴爲遊戲矣。苟得間。余願一嘗試之。

華盛頓官吏及外交官。恆有大宴會。定席安位。視爲極重要事。而須以精審出之。長幼貴賤之序。不可絲毫紊亂。設偶一不慎。而倒亂位置。無論爲紳士爲婦女。應高而卑置者。皆視爲輕慢不敬之事。宴會之時。談者笑者說故事者。皆肆言無禁。盡撤往日人類自私自隱之藩籬。而無所顧忌。

美國交際社會中人。交友既多。宴樂亦廣。然欲其準備一新異之事。則恆至不知所措。余於上述之意見外。因再欲有所紹介。美國不乏靈巧之庖人。何不使之試辦中國筵



席肴饌等品。盛之以案。而不用碟。仍用叉匙。而以箸爲飾。謂中國肴饌不能通行於美。余實未見其故。蓋西式之餐。吾中國上流人固多採用之者。而東西肴饌不同之處。亦惟其形式有異耳。夫優劣生於相形。中國庖人欲顯其烹調之佳。恆先之以淡澁。不入口之味。烹飪如是。卽飲食力役娛樂調情等。蓋無不爾爾者也。故烹飪而佳。精製之蔬食。亦未嘗不可以代魚肉雞禽等類。特世界之上。能精製蔬食者。惟吾中國庖人耳。西俗有所謂禮筵者。較前述之尋常筵宴。更爲鄭重。大概有特別事故。始舉行禮筵。如重要事業之結束時。先賢之誕日（如華盛頓林肯葛蘭脫等之誕日）商埠及各大埠著名之商業會社開年會。以報告一年之貿易而討論進行方法時等。皆舉行禮筵。大禮筵時之肴饌。略不較尋常筵宴爲勝。然人恆喜逢其盛。而以得與爲榮。禮筵以後。必有演說。此爲不可破之故例。故人之預會者。不重哺啜。而以得聽演說爲主也。然禮筵除演說及聽演說外。亦實無可取。若云飲食。則寧以家宴爲得。開筵之時。有名之演說。家政治家異邦之外交官。恆爲必邀之客。或值有異邦聞人。則爲特別欽敬之客。是等禮筵。每年有之。與美有通商關係各國之公使。亦恆與會。所論旨趣。幾爲一例。今年所說。欲其不與去年之演辭相同。殊非易事。嘗憶僚友某君。爲機敏之外交家。而余所心

折者。禮筵以後。有請其致辭者。某君起座徐曰。會長及諸君。寵召鄙人。與斯盛會。不勝感謝。惟鄙人上年已有所陳。今茲更無異說。謹仍以上年之說祝諸君。一言畢。卽復歸座。其言辭之新穎。實足博全坐之贊美。然余不知坐客之心意果何若。以余之見。不能不贊其言辭之敏妙。蓋一言之頃。舉坐客唯一之希冀而掃除之也。

美之禮筵及尋常宴會。亦與中國同。恆鄭重將事。而無嬉戲之容。大政客常於筵宴後發表其意見。卽總統有時亦以此爲演說之機。筵宴以後之演辭。恆爲各報所登載。宣露於全國人民之前。而邀其評判。智愚賢不肖。皆得肆其雌黃。故說者於其演辭。必詳加審慎。不肯苟發。吾國總統。則誥勅等文。自束於儀制之內。與美總統之蒞任演辭。或國會演辭。同其性質。惟所以表現之者。則不同耳。商界中人。抗直無文。不知異邦公使。有政治上之束縛。當其欲得人演說時。任意徵求。不拘界地。猶憶余在美時。加拿大某商會嘗邀余赴筵。當時余足跡未及加拿大。頗思應召而往。得借此一遊其地。然余爲駐華盛頓中國公使。不得本國政府之特許。似不能擅離職守。遨遊異國。因違余心意而辭之。

演說亦如其他藝術。然須練習而後能。非可貿然從事者也。苟乏實習之功。則無論其

人學問如何淵深。才能如何卓越。私談時之語言如何鋒利。一蒞演臺。恆至窘狀。百出不能自掩。外國顯宦。平時以聰睿才智名者。筵宴後之演說。恆多振越。失其常度。而枯窘萬狀者。邀其演說。則遲疑顧慮。有千呼萬喚始出來之勢。及至登臺面衆。又復格格不能吐其真意。以此義言。則美人普通演說之才。爲較優矣。美人即無事前之預備。請其登臺演說。亦率能侃侃自陳。不露枯窘之態。此或其積學之功。美國教育。訓人以自信。勗人以自勉。以己身之才能。表其意見。故常能無所畏懼。謙讓遲緩之人。行止溫和。而恆鈍於口給。惟美人則無此缺點。然非謂美人以外。天下無長於演說者也。美人亦斷不可自謂專長於演說。各國名家之演辭。議論優長。言詞動衆。耳聞與目見者。交口稱頌。多有非美人所及者。特以普通論。則美人實較勝。無論何種問題。即無預備之功。亦能隨機應變。而爲動聽之詞。此則美人之特長也。美國女流演說才。亦殊不在男子下。余嘗聞至佳之演說。出之於女子。即著名之男演說家。亦無以過此。特女子演說。終有一短。聲音細弱。廣庭大衆。不及徧聞。女演說家之演辭。聽者以距離較遠之故。每苦不能領解。然余亦嘗聞具雄大聲浪。專長演說之女子。特屬例外。不多覩耳。枯窘之演說家。無論其爲男爲女。勤於練習。而留意於音節聲調頓挫等。余信其必能有效也。

除上述之筵宴外。美國更有家宴茶會等。所邀客數。恆無一定。或十餘人。二十餘人。或百餘人。二百餘人不等。其開宴之原因。大約爲家有新客。有名之異邦人。或主婦新嫁之女故。邀客既多。主人不能徧記來客之數。且或不能盡憶其所請之客。來者投刺卽入。雖非素識。亦昂然逕入。若歸其故家者然。新客既入。導至主婦或尊客前。寒暄一二語。卽有後客繼至。賓客衆多。爲主人者。不能徧爲酬應。以是而下次相遇。或不復記憶姓名者。往往而有。此亦事之無可如何。而可曲恕者也。中國近有流行之新法。主賓初遇。交易名刺。此法若仿行於美。則此弊可除。拙眼健忘之人。亦可不以此而開罪於人矣。於是等大茶會時。主人房屋。雖誠廣大。以來賓之多。恆至無容足之地。而空氣因以窒塞不良。所最足致異者。客室之中。士女雜坐。而窗戶則緊閉。其結果使室中空氣。盡含損害之味。故余每蒞會不多時。卽不能不興辭他適。雖高朋滿座。二難相并。極欲多享談笑之樂。而以空氣之窒塞。不能不驅余他去。蓋苟少作勾留。則余肺卽將受病人人所呼吸者。卽他人肺中吐出之惡氣。苟非體質健旺十分。鮮不至病。不僅余一人然也。大宴會以後。主人主婦。身體不舒者。時有所聞。其翌日身體之不良。非誠心待客。而不得善報。蓋此非道德上之報施。而實體上之受害也。呼吸衆人吐出之惡氣。而復加

以勞困雖欲無病其可得乎苟明此諳而以衛生爲宗教所當行之職分則得矣開洛格博士倍得爾克利克之衛生官而有大名之醫師也余今引博士衛生論 *The Living Temple* 中論呼吸清空氣之要一節以告讀者（衛生論爲開洛格博士 *Dr. F. H. Kellogg* 所著由蜜歇根省倍特爾克利克衛生書局印行者）「呼吸者由空氣中吸取養氣以榮養血液滋長全身者也。養氣爲滋養生體必需之物。每一呼吸所需之養氣爲一零四分之一立方寸。此一零四分之一立方寸養氣吸入時有一立方寸炭氣呼出。以與吸入者相易。當呼出炭氣時。同時有肺中本存之種種毒質。隨之并出一呼吸所吐出之炭氣與毒質。已足使三立方尺空氣盡染毒質。而不長於呼吸。平均童子及成人之呼吸。每分鐘爲二十次。則一人每分鐘所敗壞之空氣。爲三乘二十。卽六十立方尺。或每秒鐘爲一立方尺。夫壞空氣與人身健康。其關係若何重要。世人奈何忽視之。重大不可醫之損害。每有以數百人同聚一室（如學堂教堂集會等）不知流通空氣之法。使肺中呼出之炭氣毒質等。得以外洩而成者。蓋任其流行室中。則吸入呼出。同爲一氣。周轉往復。毒質愈多。致血液污濁。減少其榮養身體之力。受寒較易。卽肺炎之黴菌及癆瘵與各種傳染病之微生物。亦恆易傳入。故多人聚集之處。不講呼

吸其事。蓋至險也。譬如以一千人處一廣四十尺修六十尺高十五尺之巨室中。經若干時。則室中空氣不合於呼吸之用乎。吾人已知每人一秒鐘間所敗壞之空氣爲一立方尺。今室中有一千人。則每秒鐘此室所廢之空氣爲一千立方尺。欲知多少時候此室之空氣盡敗壞而不合於用。則以一千立方尺除此室之容積。卽得室之容積爲四十乘六十乘十五。得三萬六千立方尺。以一千除之。得三十六。故知此室苟窗戶盡閉。則三十六秒鐘後。其空氣卽不合於呼吸。而有損於坐客。是等室中。若至一句鐘之久。則其空氣之惡濁。有非言語所能窮者。然以無知之故而處於此。不人道情形之下。者。日不知其幾何也。一上述之論。不特教堂學堂及公共集合時。良多此病。卽辦事室及家居。亦不可不留意也。呼吸清空氣。誠人身至要之事。然余不解留意此事者。何若斯之少也。試入一辦事室。無論其爲大爲小。雖辦事人或自六七以至十數人。而窗戶盡閉。不任空氣之流通。無怪商家經理以至辦事人等。每至病發。而須養疴海濱。或鄉村之間。以呼吸新空氣而怡養其身體也。私人之家。亦復如是。苟入其室。見窗戶之緊閉。與公司同。雖人數不若辦公室之衆。然苟嗅覺靈敏者。可辨室中空氣。有窒塞腐臭之味。斷乎其爲不合於衛生。然苟發議開一窗戶。則室中婦女必云。是將致寒疾而不

贊同也。其尤尋常日遇者。爲餐膳之時。衆人共坐一室。窗戶全閉。新舊空氣。無交換之機。餐畢則入煙室。以共領雪茄香味。恆至一二句鐘之久。而不開窗戶。若空氣中之微生物。可以描寫放大。或顯之於電影。其景象當如何。然彼縉紳先生。爲享受其有毒之煙味。故寧復計慮及此哉。臥室之窗。除夏季外。常事緊閉。此尤爲通常習慣。而余所深懼者。余嘗警告友朋。謂爲衛生故。臥室之窗。雖不全開。總宜開一二扇。以流通空氣。然以恐懼受寒之故。人恆笑余言爲無當。而不加採納。夫舍室外清新之空氣。不吸而寧吸室中惡濁陳腐之氣。此亦近今時代。不可思議之大怪事也。夜間所吸之氣。週而復始者。要不外陳腐之濁氣。吸入呼出。同爲此物。宜其晨起之時。毫無清靈高爽之精神。而反奄奄若不勝其疲者。缺乏清新之空氣。血液何由而榮養。精神何由而滋長。欲其身體之健康。又安可得哉。健康爲成功之基礎。苟乏健康。何持而不敗。近年來屢聞人言歐勤內克斯。EUGENIOS 歐勤內克斯者。十年前法蘭昔斯葛爾敦君所創。其證之之辭曰。一歐勤內克斯者。可以增進或改良將來人類身體上心靈上之原質之學問也。一倫敦大學已採用之。而設爲學科。此學科之重要有益。自無疑義。然使不除汚濁空氣之侵害。則其改良亦何自發生哉。含有塵垢之空氣。率有微生物在其中。據醫

生考驗。謂空氣之中。百分之九十爲純潔者。餘十分則含有塵垢等雜質。然城市之空氣。科學考察。謂其清潔。殊不亞於鄉野。特最要之事。則在使肺中常有充量之新空氣。而勿俾缺乏。房屋之構造。須使室內濁氣。得以外。出室外清氣。得以入。內常事。交換。勿使窒塞。緊閉之藩籠。其空氣必污濁。而有害。不良之房屋。空氣不得自由出入者。以實際言。亦何以異於藩籠乎。美國人民。宿自信爲有意於公衆衛生者。然公衆衛生。非卽窗戶洞開之謂乎。苟實行之。則陽光普照。陰霾悉除。快樂之意。卽自洞開之窗戶中。直躍而入矣。

#### 第十四章 戲劇

中國人重誠實。而優伶則尙詐僞。袍笏登場。忠奸賢不肖。胥藏其本性。而模仿乎古之人。先賢知詐僞之行。積之既久。必有危險之反動。變易其氣質。登場而能爲名伶。則其習於詐詭也甚。尋常交際。苟行譎詐。其法必工。且人之與誠實。又不能若齟齬之相連。可以演劇爲藝術。爲身外物。而無所沾染。故優伶之在中國。自古而賤之。若女優。則近世始有之。中古以前。未之聞也。童子習爲優伶。終其身不能執貴業。自本身以及子孫。可爲農工商而不能爲士宦。三代以後。始得駭其禁焉。以中國崇尚誠實之故。恆視優



伶爲至賤之品而不得齒於齊民。自有優伶以至晚近政體之改革。操斯業者皆不得預於考試。且褫奪其爲官之權。簡言之。實視爲社會之贅物等乞丐而下之也。清白人家。雖至貧困。罔有願其子弟習戲者。優伶在中國。其人格天然斷定之在通常道德。尊敬之下。又由風俗上恆不齒之於齊民之數。觀人如對鏡。美惡莫能逃其形。而卑視者。其自視亦卑。中國俳優道德之不進化。或卽以社會有卑視之習。而然。亦如釋氏之徒。自僧尼失其勢力。遂爲社會所賤視。而自社會賤視以後。乃益卑下自汗。不求振拔。益與人以可議之機。歐美則不然。社會交際。優伶齒於齊民。而不加歧視。此非謂歐美之重誠實不如吾中國人也。特東西進行之機。不趨於一軌。余聞英國古有所謂道德劇者。蓋英國戲劇如古埃及希臘印度然。其源流實出之宗教。然僅此不足以別東西之異趨也。余嘗深思其故。何以同爲優伶。中國則賤之。而西土獨否。其無乃西土重快樂。而東方崇誠實。注重之點既異。因以相推漸遠耶。同爲一事。見解不同。結果每以大異。如西方恆偏重於意思之快樂。中國則致意於一事之效力。上章所述。累巨金成一筵宴。曾不一加箸者。卽其明例。中國人除有特別原因外。終不願耗巨金於是等用途也。中國人喜諛人。吾人所欽羨者。恆不惜面諛之。若西方人則謂之爲喜諛。寧若謂之爲

嗜諛。歐美之人。終身所聞之諛辭。常溢於其所得之訓語。以嗜諛之故。乃以悅人爲要。義。因是而東西之視戲劇。其主觀遂截然不同。且社會以悅人之義。求則優伶固應此需求者也。於是優伶遂爲社會必需之品。而人亦多艷羨之者。故男女優能享大名於歐美舞臺者。其人必爲時行社會所優待而歡迎。英名伶亨利歐文。恆廁身卿相貴族間。聞人之家。無不有其肖像。登臺獻技。則報紙刊載長行之告白。身死以後。猶得享英國最大之殊榮。終其身得維多利女皇之殊寵。錫以勇士之銜。死後刊印行狀。讀者數千人。此與中國社會之待優伶。其相反爲何如。中國優伶。雖才能絕人。技藝出衆。人終不忘其爲行詐者。且演劇愈工。則人之防之也亦愈甚。故無論其才藝如何。一爲優伶。卽終身不復能得人之敬禮。女優在西方。亦無卑視之態。而中國則稍知自好之婦女。終不願顯身於舞臺。歐美女優之嫁銀行家商家巨富者。視爲恆事。卽舞女一嫁而爲爵夫人者。亦時有所聞。(舞女爲跳舞歌唱之女。亦獻藝於舞臺者。)故歌唱演劇。在歐美辭視爲尊貴之業。女子而有天賦之歌喉。往往以舞臺爲掄才之地。一若舍此以外。無足當意者。此實吾東方人所索解無從者。中國婦女缺少想像力。恣放不若西方。欲其面衆歌唱。膽力又不足。故女優至近時始現。且卽此少數之女優。亦必有不得已。

之故而入舞臺。北方良家婦女。間有業幻術者。此則屬於工作一類。隨其父兄夫壻以生計之必要而爲之。非他故也。西方之女優。則不然。其登臺獻技也。純視爲美術。而欲以其技能美貌。吸取富人或貴族而嫁之。勇敢之人。恆得人愛。自立之人。恆得人敬。且於尊重自愛之國中。無論爲男爲女。自以自立爲第一要義。懦怯之人。因無與爲友者。豪商巨賈。時有以女優爲妻。（歐美女優。俸給殊奢。服御飲食。擬諸貴家。故恆不願與措大偶。）非其社會交際所遇之女郎。盡不若女優之美麗。特良家婦女。勇敢果毅之氣。終較女優爲遜耳。故美麗之舞女。雖不學無文。而恆能得男子之歡心。良家婦女。雖柔婉有才。而角逐情場。則常遭失敗。今者爭求婦女選舉權之婦女。徧布歐西。氣焰之盛。凌厲無前。一旦如其素願。嗣後於擇壻問題。似不患不得果毅之夫壻。蓋是等婦女。固皆極勇果者也。然雖勇果而失之嚴峻。以余所言之。西方男子。雖重自立。輕怯懦。而於嚴峻之婦女。亦不能無所畏懼。故以爭女權之婦女。與女優舞女並駕於情場。則勝利所在。端在後者。女權大張以後。結婚問題。或反使彼女優舞女。先著祖鞭也。顧此特余個人之見。要不能必其無誤。蓋余從未以此問題與巨富女優等有所討論。亦未與角逐情場之女子有所談詢。然謂若輩既非以具有自立之性故。又非以畜有解愛

怡情之能力故。則求鳳之時。恆得佳偶者。其故余不得而知之矣。戲劇之設。果何爲乎。曰以娛樂也。悲劇之哀。人心肺令人悵然不歡。愴然涕下者。其娛樂何在。乎。愁慘之劇。中於人心。匪特去娛樂之義。至遠。且益足悵觸人之愁腸。然悲劇實爲戲劇之大支。且佔一重要之部分。名角登場。演悲劇。座恆爲之滿。不惜擲重資以資觀覽。當余草斯篇之前數旬。上海有以鬥雞之故而拘罰者數十人。各國之人皆有焉。墨西哥與西班牙之鬥牛戲。美國禁行之。然此與鬥之禽若獸。究竟受苦與否。猶一疑問也。當其爭鬥之時。凶殘之精神。高至無地。但以殺敵爲事。而不顧己身之受損。亦猶重傷之兵士。不至怒氣銷除。不知己身之有痛楚也。余不知鬥雞鬥牛等戲。其應禁之原理。固何在。不加禁止。則斯果一娛樂法也。且牛羊雞鶩等。驅走長途。或困諸貨車中。至數小時之久。僅爲運至遠道城市。以供人類屠宰大嚼之用。夫供人類之屠宰。寧有愈乎其自相鬥殺乎。且與其被宰於人。亦寧自相鬥殺之。猶爲死諸同族而出之本願也。力士比武。拳師角技。美人視之不爲不道。聚而觀者。空巷塞途。此與鬥雞鬥牛。有何擇。設云人道。則人貴畜賤。人類之爭鬥。宜先絕迹於世也。故美國當道之禁雞鬥牛。門非有憐惜雞牛之心。而出於人道。可斷言也。要或以是等鬥賽。雖爲展覽之舉。而其

凶殘之氣。恆令觀者不怡。故加以禁止。然觀雞牛之鬥。賽與觀凶慘之悲劇。其間要有何異。且精神上所受之刺激。後者時更勝於前者。故悲慘之劇。苟非以道德主義爲其中堅。而含有禁戒之義。則演者與觀者之神經。必同受不良之刺激。習見則成自然。而至麻木不仁。故感刺過人之劇。不宜觀。卽是等書籍。亦不宜讀。雖書藉勢力不若戲劇之甚。然要爲有損無益之事。爲父母者。於其子女所誦之書。不可不加之意也。

西方戲劇編製。恆出之名手。演劇者亦率爲盛名之角。扮演佳妙。無可訾議。以余無知。何敢妄論戲劇。余特取劇中主誼。而以觀劇者之眼光。加以評論。觀一悲劇。觀者所受之利益。何在。乎。當其家居之際。任事之時。操心致慮。非已多煩憂於其心乎。入院觀劇。原以求樂而享之。以悲劇雖極雋妙。於其心。君寧能有樂。又何以異於家居任事之時乎。雖曰嗜悲劇者。初不注意於英雄末路。俠士暮年之淒涼收局。特爲娛樂故耳。然少年童子。血氣未定。不能因之而得良好之印證。嘗聞謀殺等事。成於童子。而其起原。特以父母導之觀悲劇。故是以少年浮燥之人。導之觀慘劇。實大危險事。孩提之心。尙未成熟。斷不能生公正之評斷也。年前余讀美國報紙。有童子某。因其父醉後虐待其母。而以小刃手弑其父者。此童蓋曾於劇場見一慘劇。當其弑父之時。以爲斯果英雄。

事業也。苟善導之。則犧牲性命於公益。於此童非難事也。

戲劇之感刺力。其影響及於觀者。謂有益乎。謂有害乎。讀者苟平心評判。而不存私見。正確之答辭。當必歸於一致。劇場所演。其主意。應宗於娛樂鼓舞歡心。與教迪人心二者。當並行而不悖。人之赴梨園者。爲求娛樂而欲消耗其時間於快樂之地也。故凡有足以鼓動歡心而引人開口而笑者。必爲觀者所歡迎。嚴肅之劇。一掃科諱之辭。雖演以名角。運以全神。必不能使觀者不作莊敬之思。且時或生其厭倦。然編劇者不可純趨於科諱。而遺忽道德之點也。一方面固須運其全神於全劇之布置。角色之配合。使周轉靈通。首尾貫徹。一幕一節。各極其妙。然重要之道德問題。斷不可因以忽置。全劇教化之至意。斷不可因以或離。蓋教化者。全劇之幹。其餘皆枝節耳。枝節雖麗。離其本幹。安能久存。若吾中國戲劇。則恆以道德爲主幹。惡者受罰。善者受賞。千篇一律。報施不爽。而以史劇爲尤多。畜心善良者。皆樂見行善之得報。而奸惡之受戮。苟具異解。非奸慝卽有厭世觀者。今生來世。報施之遲早不一。而要視其行爲之善惡而定。此實戲劇教人不可少之要義也。回觀西方劇場所演之劇。則道德觀念之存在。恆至微細。且更多具障礙性質者。世人無不喜小說。而尤以少年人爲甚。入院觀劇。亦如讀小說。

然惟其動作較實在耳。戲劇之含道德性質者。除娛樂觀者外。率能深印其景於觀者心目之中。常存而不去。故其通俗教育之功。殊不在細。美之教堂進德會修道會等。似尙未知可從戲劇得助力。斯實至爲可怪。余嘗聞數處教堂。其唱歌人之俸給較宣教師爲優。是則美術之價值。教會中人似亦見及之矣。顧曷不更進一層。卽借戲曲以傳其教誼乎。借戲曲以宣教。而助以詼諧道德之入人心。當必較易。且教師之宣教。亦有雜以諧謔者矣。則何嘗不可以之播成曲本。故以有趣之教義。演成戲劇。非甚難事。縱不能使人人愉快。而可促進道德。則無疑義。蓋人民之赴教會觀劇者。其所希之快樂。固非與赴引笑之戲院同觀也。吾儕中國人。不若歐美人之亟亟以善勉人。亦惟孜孜爲善自勉。以己身作之。則而求他人之感化耳。芝蘭之馨。恆足染人爲善。亦若是實行而感化。其力殊不在勸導下也。使不以余言謂有排舐異種之見。余敢爲美人之亟亟以善待人。及勉人爲善者。收效反不甚大。若出之以潛移默化。其成就當不止此。余不能於此區區短章。縷晰余意。特讀者諸君。能研究吾國老莊之旨。見有所謂自然在宥等義。則於余所持。當可了然於胸矣。各國戲劇。多導源於宗教。余既言之矣。然何不卽利用戲劇。以間接促進人民之道德乎。間接勸導。較合自然。故其收效亦必較直接者。

爲親切而偉烈。講臺上之演辭。多出於箇人之私見。以余觀之。其感化力恆至薄弱。余書至此。適見報紙載有倫敦倍斯握脫皇后街進德會教堂演戲事。進德會教誼。主萬事萬物。總以使人快樂。合道爲歸。而其所宗進行之法。則以今日戲劇之趨向。不僅當以劇場爲通俗教化。勸善懲惡之地。且當借戲劇及各種藝術之助。表揚真理。指示人道。而以教堂爲人類之端模。余箇人雖於此。教主義無所關會。然總之不離耶穌教義。則可知也。西方之思想文化。成之於二大動力。卽宗教與戲劇。今得提携進行。不可謂非盛事也。報紙載其所演之劇。爲古道德劇 *EVERY MAN*。義卽人人。記者頗多評論之辭。蓋教堂演劇。固非習見事也。其評論如下。〔劇中衣飾及音樂。皆甚完備。當台斯（義卽死）出場時。衣藍衣。兩肩有修巨之藍翼。手持召將牌。止人人（劇中人名）而問之曰。欣欣而前者誰歟。一人人服紅袍。冠寶石冠。形狀至瑰麗。劇中以人人爲主。雖余於戲劇不甚了了。然起人人者。甚有精采。似深得劇中精義。全劇意主提撕。能使見者深印勿忘。飾人人者。當賄賂台斯。求其稍緩死期時。表情極佳。末一幕脫去長袍。爲末日之禱告。雖死神矗立其傍。猶遲疑顧慮。不忍回首。終乃遵善事之招而去。飾善事者。服博大紅絨之衣。面色活動異常。殊爲難得。閉幕時。斯丹敦可爾脫博士爲簡明之



訓辭云。「棄若虛驕。虛驕無裨於實用。」吾人苟能緊記此二語。且知大運一到。萬事皆虛。除善事外。不能絲毫有所携帶。則爭權奪利。欺詐奸邪。諸惡當可不作。而吾人生命。亦可日趨聖潔。塵俗間事。自有其地位。亦自應有相當之眷顧。然斷不可忘吾人靈魂之寶貴也。」余嘗聞德國惡培勞茂高演耶穌受難劇。耶穌一生事迹。皆按幕分演。然美國未演此劇。余亦從未見過。因不欲有所評議。若吾中國戲劇。則恆與神祇有關。其訓人之道德。復能深入觀者心理。特以先聖入戲劇。則吾人尙未敢耳。中國劇場。較美國特爲簡單。演戲之時。當地居民。集合衆力。架竹爲臺。支蓬鋪席。而以蔴繩聯繫之。故除蔴繩外。拆卸以後。仍復可用。觀劇者大半植立臺前廣場之中。空氣流通。無窒塞之虞。劇臺率在神廟之前。演期恆爲三四日。或爲神誕。或爲酬願。總以敬神而然。演時無圍幕佈景等物。觀客精神。皆專注於演者之動作。劇中旦角。亦以男伶飾之。萬事皆簡淨而美麗。西方繪麗精巧之佈景。輔助物等。有需夫機械工術之助者。皆未概見。余書此時。適見報紙告白。有與此相近者。因重引之。「紐約中央戲園。有專製風雷電等之機械。製風之機械。爲一鼓形之輪。聯輟以板。周轉時。觸動絲製之圍巾。而發銳利之風聲。電則以鎂粉用電燃之。雷聲則以千磅重之巨石。自上滾下。至鐵板上。繼以砲彈

及大鼓之聲。雖中國觀劇者。不願費巨大之資財於佈景及輔助物等。如西方。然服飾之華麗美觀。裝潢緋赫。雉尾金袍。耀人視線者。則中國尋常戲劇中所有者。余蓋未嘗於美國見之。西劇中佈景等品。近年來於吾國各大埠中。漸有仿行之趨向。然余所最欲使吾讀者領解者。則中國戲劇皆有興味。足娛人而極少哀感慘心之作。回觀美國。余昔年所見。使余不能不思美人於此。實誤用其心思。而未嘗以戲劇爲促進道德之機也。影戲源於戲劇。茲論戲劇。影戲亦已在內。故不贅及。

### 第十五章 樂部

樂部亦爲娛樂之一。英美各處盛行之。愛音樂者。恆蒞止無虛日。而交際社會中之時行人。則嘗先期預定坐位。至一季之久。余嘗見某會中人於紐約樂部之箱位中。綺羅徧體。珠飾盈身。狀至華貴。顧余則思吾中國之戲劇。如希臘古劇然。樂歌樂舞。皆源於樂。而其樂聲之柔曼悅人。繞梁不絕者。正又非此間樂部中比。中國歌曲。恆與樂協。高下疾徐。宛轉曲折。音聲相和。絲微入扣。曼聲高唱。則衆樂悠揚。鏗然一聲。則萬籟俱寂。與西方之樂。迥乎各別。而音聲感人。力至偉大。吾國文士白居易琵琶行中。狀琵琶云。大絃嘈嘈如急雨。小絃切切如私語。嘈嘈切切錯雜彈。大珠小珠落玉盤。間關鶯語。

花底滑。幽暗流泉水下灘。水泉冷澁絃凝絕。凝絕不通音暫歇。別有憂情闌恨生。此時無聲勝有聲。此狀吾中國音樂之感化力。余自大哀薄耳君中國事務一書中徵引而來。非鋪張藻飾之文。曾遊中國者觀察所及。當可證余言之不謬。稚魯不學之工人。夏日之夜。坐對明月。獨弄絃索。四顧無人。僅風聲蟲鳴。迭相應和。而怡然自樂。恆至數時之久。此足見樂之誤人。特雅鄭之別。則非聰於聽者不能辨耳。余居倫敦時。嘗一至樂部中。聆柏底夫人之雅奏。柏底夫人善曲之名。洋溢四海。奏曲之日。座無隙地。空氣窒塞。至不能耐。曲奏未終。余竟離座而去。至今思之。靡用自愧。然假使余習曲有素。必能會晤其意。雖至難耐。亦斷不至不待曲終而去也。余草斯篇時。上海報紙適載紐約新聞如下。特記之以告讀者。嗜樂者當必樂聞之也。中國音樂已享大名於倫敦。而爲一時流風所尙。羣稱之曰黃樂。有識者謂此樂不久將流入紐約。發展其勢力。而成此繁盛都市中新奇崇尙之事。前此歐美人恆鄙笑中國之音樂。此實西方人不能領解中國音樂之優點所致。非中國音樂之病。且見聞所及。不過中國婚喪等事。所用之俗樂。聒耳之鉦聲。惱人之哀挽而已。非特咸池之奏。鈞天之樂。陽春白雪之歌。爲耳所未聞。卽婉曼之音。柔和之樂。怡情悅性之歌。文人騷客之因以發其幽情。而舒其才藻。

者亦無暇得見。漫曰黃樂不足道。黃樂真不足道耶。西方樂中之大鼓（如北方之大鼓詞）近時始盛。而在中國則三四百年前已習用之。中國人得之於韃靼蒙古之族。惡其聲之粗暴不馴。不足與其本有協律之音比。因廢置之。愛茂森揮桑君英之名著曲家。而考究東方音樂者。上星期致函倫敦音樂會中人云。中國音樂之發展。現尙在幼稚時代。自今以往。當可日見其盛。雖中國音樂不成文（不成文意無曲譜）而其和諧之音。實具有攝人之魔力於美術一端爲尤甚。著名之畫家音樂家藝術家云。中國音樂之感化力。其偉大實不可思議云。中國音樂自西方人眼光觀之。恆有不公正之評判。如饒鈸弦索（如琵琶月琴等）簫笛等。西方人或訾以爲過澁。或以爲過銳。謂能振人耳鼓。使人腦漲。實未免失當也。一是等普通評判。其無知悞解。至可悲悼。爲此言者。顯於中國音樂不甚了了。亦未嘗得間一窺吾祭聖之典禮。一聆吾祀孔之樂章。吾國祀孔典禮。前清時半年一次。於黎明時行之。鏗鏘之石樂。集各色發音之石。懸之木架而並奏之。宏亮穆毅之音。莊靜和諧之調。令人肅然起敬。與世俗之樂。自有天上人間之別。非特歐西所未聞。亦實天下所僅有。故余深信天下各國。除中國外。無有能以石器爲音樂者。今茲中國音樂。已有聲於倫敦。不久且將傳播及於紐約。此訊固余所

樂聞。然欲歐西人士能領解吾音樂之妙。非勤聽習熟不爲功。而非旬日間所能。蓋吾國音樂。單純清越。初聽之特。每嫌其淡而易生厭棄之心。亦如余初聆柏底夫人之繁聲時。甚苦其與耳不習。然誠能熟習而通解之。則西方人民。必將有嗜於此。而樂得茲新樂也。中國戲劇。雖不分悲喜。而科譚之劇。實與西方之喜劇同工。若樂曲中。則西方之所謂喜樂者。中國實無其偶。劇曲中之喜曲。按之實際。不過俳諧之歌曲。而出之以柔聲。其精英所在。不外柔歌曼舞。而雜以詼諧。曲之本體。無關重要。所以存在之理由。特因以上述之柔歌曼舞。諸辭等。按序而蟬聯之耳。編曲家之原意。亦不外聯綴成文。故曲之合理與否。可行與否。皆所不計。觀劇者。則尤於曲體不加注意。其主意不過聽曲觀舞。耳詼諧之辭。而縱情於笑樂。若研究曲文本體。則實非所注意。中國俳諧之曲。恆助以翻舞諸態。以此與西方所見露體引入種種奇形之跳舞比。則吾之優長。自無疑義。喜曲在歐美二洲。日見發展。且日趨於滑稽一派。大半戲園中。時時演唱。與正劇並行。惟亦有摒絕不之演者。歐美樂部。畧與劇場相似。惟樂部重唱。劇場重演。斯其不同耳。然性質靡復相似。故亦時多相混。如喜曲本樂部所演。日趨於滑稽。乃亦與劇場相近。雖劇場經理人見喜曲之號召座客。恆較他種正劇爲易。一年之中。因屢屢

排演滑稽之喜曲。然以余觀之。是等曲在戲曲史中。特屬諸洪荒草昧之時耳。不特毫無文化是云。且至怪特而亂人心意。然趣味深長之滑稽劇。真有優美可笑之精神。及喜劇之描繪形容者。固不在此例。蓋是等劇於煩勞之身心。實可消除其抑鬱。譬如有入於此。粟六終日。庶事勞其形。煩憂困其心。入夜而見滑稽可笑之劇。於以開口而笑。一洗日間之煩悶。其裨益爲何如。特所演者。既非美術。又非音樂。更無才智。徒見披黑網之女孩。伊啞而唱。則於觀者心理。益增其厭。此非至無爲者耶。卽心無思慮之人。其入戲園。僅爲引笑。是等劇當亦非所歡迎。此等歌如以下所引。此歌余自倫敦戲劇月報摘出。卽庸淺之夫。亦將覺其無味而不樂聞之。一。所引詩原本已極無味。譯出更不成文。故從畧。不然美國近時所通行者。固明明此等曲文。美人旣以煩困之故。而樂得輕淡之曲。以舒其耳目。則此固至輕淡者。而不得謂此爲未足其意也。此或以余不能領解英文所致。若余觀之。則上所引曲。固極愚蠢無味。卽蘭格泰姆猶且不願歌之也。蘭格泰姆爲西方俚曲沿街叫唱者。樂部歌曲。雖亦有優美之曲。非盡無謂之詞。然其態度之鄙。則自好之人。實不宜注目。余於此不欲顯爲指斥。特引英人之說。以告讀者。魯易歌文於梅屈洛樸立敦雜誌云。一。露腿舞實爲近時樂部中盛行之式。享

盛名之跳舞女郎。幾無不行之者。如鈍根愛倫兩女郎。爲喜曲能手。技術之佳。無與倫比。設謂鈍根女郎。曾於樂部中裸體羣衆之前。則必將膺其嬌怒。然於實際。果曾爾也。當露腿舞者現身樂部。而與樂隊同上跳舞臺時。樂部中跳舞女郎。皆不勝艷羨。無不作得聞一試之想。古今論且且自益無財香以思過也益第一思過也中空屎哥

## 第十六章 幻術與馬戲

余既於上章述吾中國之所以視優伶者。今更言幻術之不當鼓勵。讀者當不謬余言之突峴。人受欺詐。究有何樂。水變爲酒。人喪其元。吞刀吐火。解鎖脫拷。以及種種幻箱秘戲。誠屬機巧之技。能然機巧不能變事實。究之此種種機巧。不許欺詐二字。特出之以靈敏。而不能爲觀者所調察耳。人之樂之者。謂其以幻術名爲娛樂。故然按之實在與賭棍之弄鄉愚。寧有何異。同以手術靈敏。而欺人視線耳。是等欺詐之技術。吾人何故而必鼓勵之哉。古代之民。處魔術勢力之下。而爲迷信所約束者。事實昭昭。載在史乘。若以娛樂之故而謂欺詐爲可行。則古代之以此爲宗教者。又何以必以爲誤而不當行哉。故觀於幻者。不僅不能得絲毫之益。且見施幻術而邀讚美。則腦海中常印一行詐之影象。事之可危。莫此爲甚。然人之喜擲金錢以買欺詐者。滔滔皆是。斯實至可

怪也。迄今此風益甚。直以受欺爲娛樂之事。手術疏而其詐易見。觀者必露懊喪之容。行詐愈工。施術愈幻。觀者乃相與讚賞不止。以詐相尙。其弊寧可言哉。道德家及宣教師。宜有以補其敝。而匡其失。使詐術之毒。毋得潛滋暗長於人心也。天然公理。迄今猶多未現於世。而芸芸衆生。不乏具狡猾異常之才。幻術之崇尙。其險蓋至甚。足以阻真理之闡明。助虛誇之波瀾。而使魔術復張其勢力。正如新約經所載耶穌事人民之久。爲魔術所熏淘。而樂於見欺於人者。耶穌聖跡。乃不能取信於彼等。彼見聖跡以爲是魔術也。語耶穌曰：「汝有魔在。」於耶穌成聖之預言。相爲告語曰：是行詐者。於其生時曾云：「三日以後。余當復活。」故人民苟熏染於幻術之中。不特奇其所當奇。且習於詐僞。而不事辨別。則浸久而失其觀察之才能。必至以眞爲詭。以不詐爲詐。而薰蕕莫辨焉。

## 第十六章

## 戲園與風潮

晚間娛樂消閒之地。合於衛身且有益無損者。當以馬戲場爲第一。馬戲場中空氣清新。不若劇場之窒塞。卽坐遣二小時。亦不覺有污濁之味。古時娛樂品之遺流。及今者。殆惟此戲猶有古代樸素之風焉。今日馬戲場猶如古代羅馬然。坐位周轉作圓形。其較大者則作橢圓形。然如羅馬最大之場。若潑靈奈所云能容人至百萬者。則今殊



無此壯麗耳。以今較昔。則昔繁而今簡。昔時羅馬之獻技場。爲永定之建築物。而今之馬戲場。則爲遊行之臨時結構。且以技術言。亦似今爲退化。蓋古代羅馬人所酷嗜之馬車競賽。今日馬戲場中。已成絕調。際此萬事競新。爭奇鬪勝之時。余不解何以無人創復古之說。而重行羅馬馬車競賽之舉。馬車競賽。其動人之興味。當不減於今。茲新行之汽車球戲。且危險一端。可不若汽車之甚。一汽車球戲。爲一種擊球戲。昔行之於馬上。原名撲陸。今以汽車代馬。爲西方最新流行之球戲。一近時遊藝。惟賽馬一事。其爛熟勇敢美觀等。實駕諸等技術之上。而差足與古羅馬壯嚴之競賽相彷彿。他若近時馬戲場中所演馬背跳躍諸藝。以少年演員演之者。如走繩跳索高躍諸駭技。雖誠爛熟可觀。然不始於今時。古羅馬已有走索技。且余思當時之走索。當不若今之荷擔而行。得借擔力以維持其重心者也。日本之演藝者。技術精巧。遐邇所知。然使西方人得見吾國蹻捷輕敏之繩索諸戲。當亦必讚美不置。演藝之人。幼而訓練。長若自然。輕盈可作掌上舞。柔順可作轉環戲。凡百耍戲。無不精能。而四肢之靈巧。身體之柔軟。若無骨者然。每演一藝。輒令觀者舌擡目眩。而不能自己。一試於空中。與鳥獸之戲。亦其吊棍之戲。尤爲難能。而最足震驚觀者。演者蹻捷若猿猴。自此棍以至他棍。飛越而前。

余觀此時。嘗自問曰。人既具此絕技。何獨不能凌空而飛耶。將來人類。或可飛行空中。若飛禽然。止須以吊棍之技。擴而充之耳。以飛船或飛艇。航行空中。與身體之飛行。比。不論有無人造翼。翅之助。則飛艇。又較平穩。使人類。果能飛行空中。其利益爲何如耶。空中空氣之清新。非火車或輪船中可比。其利一也。下視塵寰。如展畫卷。人細於蟻。屋小於拳。於以廣人心胸。擴人眼界。使知前此之見聞。盡爲支離破碎。此又一利也。然奸滑自私之輩。而得飛行之助。則傳虎以翼。其險愈甚。或拋擲炸彈。以報睚眦之怨。如今之聰明妄用者。恆用其才智於不正之途。以損人而利己。此又不可不知也。敍吊棍戲。而旁及人類之飛行。余語離宗矣。請仍言馬戲。馬戲中有丑角。爲場中重要人物。古時社會。野蠻無文。娛樂之品。既鄙且少。詼諧滑稽之流。爲社會所重視。因有所謂丑角者。馬戲場中之丑角。卽其遺風。吾中國則不以丑角爲必要。余亦不覺丑角之足尙。惟熟馴之犬馬等。所爲種種技術。則殊足嘉尙。新近斐律司馬戲。至上海時。余嘗親見之。斐律司君有牝馬一。宿演大盜之馬一劇。劇中大盜逃走時。鞭馬疾行。此馬以用力過甚。中途倒斃。其主人因不勝惋惜。於上海演此時。黑倍西（卽此牝馬名）適膺疾病。當奏樂時。平時奏此樂。則斯馬應入場演劇。勉思起立。然以病重不果。重復倒臥。若其宿

演之死狀。然臥後繼以腹瀉。侍者不知其病。猶欲扶掖之起。則腹瀉之時。臟腑已裂。黑倍西蓋演其末次之劇矣。

## 第十七章 運動

中西人娛樂觀念之不同。無有過於運動者。聚千萬人而觀一運動。中國人無此思想。費時耗晷。徒曰觀人運動。故中國人無此行爲也。吾國人於工作餘暇。恆喜自爲運動。吾國之普通運動。曰羽子戲。運之以足。鞠之過肩。一迭一來。以舒筋絡。運動之時。恆以吾人所穿之平底鞋。或以左足。或以右足。或以鞋面。或以鞋底。悉隨規矩而定。此亦如風箏戲然。爲吾國少年兒童所共樂之運動。西方網球及其他球戲。於吾國無類似者。女子運動。尤爲尠見。弓矢財藝。本爲有益身體之運動。自戰術革新。此制遂不復講究。且使吾千百年來所保存勿失之拳術。亦同遭厄運。至今日解此技者。寥落若晨星。良可恫也。余於航海之輪船中。見少年男子有爲擲沙包之戲。以消遣其餘暇者。此雖極佳之練習法。然較吾古時拉弓等技。爲不侔矣。西方運動。已漸引導入吾國各學校中。然此在吾國究能興盛與否。余殊不敢斷言。以其過於劇烈。而自東方人觀之。又嫌缺乏莊嚴也。然中國人之居留外國者。則又能從事於西方之運動。且得嶄然露頭角。如

小呂宋大運動會中國學生之成績。及夏威夷中國學生擊球會之遊美競技等事。然使吾中國人而得聞西方人之日購報紙。多有僅以觀運動之記載。故且別有所謂運動報。專記各處運動等事者。則必且以爲戲謔之言。而不之信也。以余簡人之見言之。運動一端。吾國至宜多所效法於西方。蓋可由之以增進體力。保衛健康。而此二事者。固吾人所當竭誠歡迎者也。中國之孱弱。其病皆因少年未嘗有相當之運動。故若少年之時。致力於運動。而分組競勝。各各爲己。組盡力求勝。則國民團結之力。必較堅固。蓋是等運動。其主義在振作精神。實練運動。勝負特其小焉者。不以之爲榮辱也。余嘗讚西方人之度量。要不能不歸功於運動。蓋求衛身而運動。則以運動爲娛樂之品。而自無爭乎意氣。正當之運動。恆誨人以恭敬正直公平諸美德。美人所行。尤堪師法。甲組而勝。不作驕人之態。而訾乙組爲無能。每自謙爲偶然徼倖之事。賽船之時。余嘗見敗賽之船員。讚美其得勝之敵組。此實公正之行爲。至良之師範。余深盼國人之學之也。

## 第十章 運動

百科全書中載運動家之獲勝者。恆爲蔬食之人。此事至足起余之興味。『百科全書第九版第三十三卷六百四十九頁』如柏靈至奪蘭斯敦一百廿五英里競走。如卡

槐庭客潑一百英里及狄倍爾六小時自行車競走。一九〇一、一九〇二兩年間。如英國網球比賽。一八九八至一九〇二年。及一九〇二年網球比賽。如印度三年自由車比賽。如蘇格蘭半英里賽跑。一八九六年。如世界自由車比賽。記載自四小時至十三小時。一九〇二年。如堯克歇埃會一百英里競走。一八九九至一九〇一年。如金牌獎網球比賽。五次。其得獎者皆爲蔬食者。雖後此之記載。余未得之見。然如高德掌教新近所言。謂蔬食家少精神而乏實力。則余敢決言其反於事實也。高德爲巴黎羅馬教薩龐校掌教。以上諸例。已可反證。而欲明其誤。可引美國蜜歇根省倍得爾克利克衛生官醫學博士開洛格君以重證之。開洛格博士爲嚴格之蔬食家。蔬食既有年。今年事已逾六十。而精強猶如四十歲人。博士親謂余言。每日任事十六小時。未嘗覺乏。通神學會會長皮森安難夫人。其又一例也。夫人蔬食至少已在三十五年以上。今已六十五歲。而通常六十餘齡肉食之人。罕能與之比強健者。故知蔬食家雖亦有缺陷之處。而斷斷乎其不乏耐久之力也。

田獵亦爲運動之一。其事之傷害天和。違悖人道。實有不可諱言者。夫彈一泥禽。射一動鵠。其樂寧有異於擊飛禽。逐走獸者。而耽此者。必以生命供其娛樂。此實余所大惑。

不解者也。郊圍之樂。洵足惑人。然苟知吾人當野蠻時代。嘗藉此以爲徵食之資。而此實野蠻時代之遺傳性者。當亦廢然自反。而不以今日猶稟此嗜殺之性。而自驕也。謂今日之田獵。其主意在得禽獸而食之。獵者必羣起。關其不然。獵得之物。雖有時以供烹庖。然出之偶然。非田獵之正意。惟戶外運動之。可以發揚精神。舒練筋骨者。非僅田獵也。卽不遺痛苦於禽獸。亦未始無娛樂之法。而今之獵者。徒沾沾於此。卽文明之人。吾人所共冀其立人類道德之模範者。亦不覺其非。而警爲當行人。道不講。良可恫也。人有所癖。雖平時誠藹然長者。而鮮克察其所短。尊重人道。饒有教化之民。於殘忍慘酷田獵之行。恆嗜之。而不以爲非。不特施之於其本土。且亦行之異邦。卽如美國。尙不乏嗜獵之人。他更無論矣。田獵之制。由來已舊。古之埃及敘利亞巴比倫人。皆習尙之。然不得謂崇於古時。而遂爲今日所當行也。田獵所需之善質。如堅忍靜穆等。亦可於他種運動發生之。且余聞田獵會一年之費。恆至萬金（美金）設移作別用。如賽船等。其他遊嬉。則其所生之快樂。爲何如。駛輕舟於風浪之中。以與怒濤爭勝負。以余觀之。其勇敢冒險之精神。較之騎馴馬而馳逐山林者。其難不啻十倍。且以運動論。射擊野獸。亦不足與衝冒風浪。比野獸之凶暴者。既不恆見受傷。以後尙有抵抗力者。尤少。且

獵者復有鎗以自衛。犬以相助。不若游泳及賽船之純。以實力與風浪抗也。故田獵之崇。尚非真有可崇之道。特習俗使然而積久難改耳。四千年前中國帝王亦有田獵之舉。年有定期。蓋處當時樸實無華之世。舍此亦殊無舒煩解鬱之方。英當斯多鐸皇朝時。田獵有禁令。爲皇家所獨享。而太古人民。則以田獵求飲食。蓋野蠻之時。實以此爲生財求食之法。故云今之田獵。爲野蠻時代之遺風。非污曠之辭也。際此二十世紀。文化昌明之時。凶殘之遺迹。宜其絕滅。而尚推波助瀾。張古時之遺焰。此余所不禁涓涓而悲者也。田獵一事。美言之曰運動。質言之。卽慘殺無抵抗力者。加憂愁痛苦於無告者也。雖曰凶暴之獸。殺以除害。然如狐狸麋鹿野兔水獺等等。無害於人者。獵者乃亦嗜之。若命追殺不遺餘力。此何故耶。人之以勇敢善獵自負者。恆至豐林長草深山遠地間。從事田獵。余不能不佩其膽力之巨。然心終不善之。仁厚長者之惻隱存心者。吾知其不若是也。若云爲練習射擊而殺禽獸。則尤不能曲恕吾人。稟何特權。而可肆行殘殺。彼與人無害與世無爭之飛禽走獸乎。余嘗見射鵠水鄉者矣。驚無辜之禽。使投其機械而鎗擊以斃。其殘忍慘酷爲何如。由嚴格言之。此等殘忍之行爲。宜懸爲厲禁。余居美時。幸尙未見是等慘酷之景。於余所居之地。因深冀美人之勿犯之。而法律且

從而禁止之也。世界之上。號稱文明者。皆不宜有此景象。吾人今日。自居文明。而深嗜此慘酷殘虐之舉。則其文明固何在。而後世之人。不將竊笑吾耶。使以運動遊嬉之故。而謀殺禽獸。視爲當行。〔今世之田獵實與謀殺無異〕則人之相殺。何以必爲罪戾。彼殺人之凶徒。固自以其殺人爲當。而有樂於此也。以彼律此。寧有何別。造物化生萬物。人獸齊觀。人人有其生命之權。禽獸何自而無之。若爲公衆重大之利益。則人與獸皆可棄其性命。以殺身而成仁。特云以殺之故而殺之。則公道何存乎。豈以人之聰明才智較勝於禽獸。因可以其性命供吾遊嬉乎。苟其是也。則他日地球之上有較勝於人之動物。出必將芻狗吾屠戮。吾以供其笑樂。而不容吾人之有所伸訴也。印度前此有暗殺黨曰色葛斯。其所奉之女神曰密利女神嗜殺。因殺人以祀之。其所暗殺之人。恆依預兆所示。而一准宗教以行之。迨英人握印政權。嚴行禁止。重懲色葛斯黨。以其所行非人道也。然自高等之眼光觀之。〔不以尋常人類之眼光觀之〕色葛斯黨之與獵者。寧有異乎。藉曰有之。則猶以色葛斯黨爲較優。蓋其殘殺也。尙曰以宗教故。若獵人之嗜殺。則除凶殘外。實無可爲之曲解者。余不解何以慈善社會。如禁止虐待禽獸會等。對於田獵一事。乃漠不關心也。中國人自西方言之。恆目爲虐待禽獸者。然余思處



琉璃室者。慎勿以擲石爲事也。

飛禽之射擊。不僅爲遊嬉。及得其肉。故利其羽毛。亦爲一大原因。婦女之冠飾。以鳥羽間接之間。實鼓勵獵者之慘殺。昔香港有中國人某。因虐待一鼠。爲警察所拘。此鼠騷擾其房屋。毀壞其雜物。偷竊其食物。已不勝其煩擾。故捕獲之後。釘之於板。以警羣鼠。爲警察所知。拘之至署。英執政科以十元之罰鍰。此人聲辯謂鼠之處死。以騷擾其室家故。英執政告以可卽行處死。不當加此慘酷之刑。此人無奈。徼其罰金。然喃喃誦冤。謂不許其自由處置一騷擾室家之鼠。而外人之在中國者。則可自由射擊無辜之禽獸。而不以爲非。彼實未見英國法庭之公允。世人見解。每不一致。事固爾也。

田獵一事。主持和平之社會。至宜提議及之。蓋田獵實爲戰爭之儀型。而世界各大宗教。曾無有認以爲是。而赦其殘酷之罪者。且卽如英德等國。崇拜軍人者。亦不過於尊視田獵。而以爲至高無上之業。故無論以何等眼光觀田獵。實爲野蠻之遺風。無可諱也。

出  
 縣田懸而以爲至高無上之業姑無論以何等則此舉田懸實爲理之彰風之彰  
 其會無洋艦以爲最而極其其類之舉皆且唯成英新等國裝我軍人者亦不感其會  
 田懸一事主將隊卒之極會至且對難久之蓋田懸實爲釋爭之對壁而甘泉谷大宗  
 趨而不以爲非對實未見英國志氣之公允也人只輪於不一好車何爾也

備不指其自由靈圖一懸對至案之息而代人之在中國者限何自由讓讓無享之禽  
 案姑英拜題若以何明洋戰我不當此也對語之休此人無奈其陪金於前前諸案  
 欲警察視狀既之至聲英拜題以十次之陪也人難無信息之試天以聽對其室  
 辦其與重製其製辦辦辦其食辦與不測其意辦姑能對之於後之於以警擊風  
 問辦之間育禮個懸答之對懸皆香對育中國人某因對對一風益警察視既此風編  
 乘念之振之不直爲對對又再其因對對其手衣爲一大原因試之試論以息休  
 美國視察記終以不爲事也